

**NATIONAL ASSEMBLY OF  
SEYCHELLES**

*Tuesday 23<sup>rd</sup> February, 2021*

*The Assembly met at 9am*

*National Anthem*

*Moment of Reflection*

*Mr Speaker in the Chair*

**MR SPEAKER**

Bonzour tou dimoun. Tou bann Manm e nou lodyans. Nou ava apel Minis ek son delegasyon silvouple pou kontinyen. Bon, bonzour Minis e bonzour *PS* e byenveni avek nou, mon ava apel Onorab Adelaide.

**HON FRANCOIS ADELAIDE**

Mersi Mr Speaker. Bonzour Mr Speaker, bonzour tou Manm Onorab. Bonzour Minis Hassan avek ou lekip. Bonzour tou Seselwa, prensipalman zabitan Baie Lazare.

Mr Speaker, an premye mon demann gran met pou kontinyen anvoy son benediksyon lo Sesel e tou Seselwa an zeneral pou zot kapab anbras sa nouvo realite ki sirman ordonn-en ki devret arive dan nou pei.

Mon oule dezyenmman remersye Minis Hassan, *PS* Thesee avek tou zot lekip kot

Minister Finans, menm dan bann sityasyon difisil kot ti annan bokou lensertitid zot in angaz zot e finalman anmenn en Bidze dan Lasanble Nasyonal, kot i pou ganny debat e aprouve pou permet Gouvernman fonksyonnen.

Mon oule osi profite pou remersi tou lorganizasyon e endividi osi ki'n kontribye zot letan e nide pou realiz en tel proze. Nou drwa zot en gran mersi. Kontrerman avek diskour bann Manm Lopoziyon ki zot pa'n mank lokazyon pou manipil ou bann parol zisteman akoz zot kontan senm konfizyon. Tou sa ki zot in dir zot fer lekotr.

Mon pa'n sirprann pou tann *Leader* Lopoziyon dan son premye *speech* dir ki zot parti ti adopte en bann prensip *Robin Hood*. Wi Mr Speaker, in finalman aksepte e dir an piblik ki son parti ti pratik bann teori voler!

Si ou en kretyen ou ava aksepte ki enn parmi sa 10 Konmandman se pa vole. Nou pa zanmen krwar dan sa bann prensip vole. Nou pa krwar dan trikmardaz. Nou, nou krwar dan respe sa ki pou lezot. Nou, nou krwar dan negosyasyon e nou, nou ganny dirize par *rule of law*. Si nou bezwen nou ava demande, sa pa en pese. Me

nou pa kapab enstri nou zenn lo laspe vole pou ou gannyen. Nou bezwen montre nou pep pou valoriz travay dir. Si en dimoun i vin ris akoz i travay dir, akoz ki Onorab Pillay i krwar ki nou devret vol li e donn sa ki napa. Sa ki napa li menm pa pe fer en demars pou amelyor son lavi.

Atraver sa *statement* iresponsab fer par *Leader* Lopoziyon, in montre pep Seselwa ki kalite dimoun ki nou pe *deal* avek dan sa Lasanble Nasyonal. Zot sel solisyon se zis vole! Fer lapenn Mr Speaker.

Dezyenman, Onorab Lopoziyon in atak bann Seselwa pou en rezon ou lot ki i vwar zot pe viv aletranze. Sa bann Seselwa i annan tou drwa pou eksprim zot e partisip dan devlopman nou pei. Oli problemanm avek sa Msye Onorab? Si ou pa dakor *just too bad*.

E mwan mon pou kontinyen envit nou bann frer e ser Seselwa pou kontinyen fer zot kontribisyon tre valab e relevans nenport ki parti lemonn ki ou ete. Ozordi i kler ki Onorab Pillay i santi ki son pozisyon koman *Leader* Lopoziyon pe ganny menase. Definitivman in konpran ki sa sez ki i lo la koman *Leader*

Lopoziyon pa garanti. I konnen ki sa bann privez ki i pe zwir koman *Leader* Lopoziyon i kapab ganny pran par en lot dimoun dan son parti. E vwala akoz i bezwen azir dan sa fason.

*LDS* in rekali bre lasenn politik Sesel e *SPFF/ Lepep/US* i nepli kapab manipil keksoz parey zot ti ava anvi. Politisyen *US* ki ti pe viv konfortab dan sakenn zot swadizan lanpir, in ganny en sekous tre for e byensir zot in santi danze. E byensir sa teori *animal farm* i vin an zwe. Sa ki pli for e pli enfliyansyel pou definitivman dirize. E sa ki mwen popiler pou bezwen sed laplas. Vwala Mr Speaker, akoz ki Onorab Pillay i bezwen vwar li pe azir dan sa fason. Son legzistans i an gran danze.

Atraver ou Mr Speaker, mon oule asir Minis, ki tou bann parol dekourazan ki i pe tandé sorti lo lot kote latab, pa zanmen pran zot kont. Sa i pe konfirman ki zot rigomortiz politik pe manifeste dan zot dernyen legzistans koman en parti. Bann lensilt, bann mo dekourazan zis pou sey denigre ou avek ou lekip. Se zisteman akoz ou dan Gouvernman *LDS*, se tou. Me santi ou rekonforte akoz ou kapab kont lo nou sipor

lo sa kote latab pou aprouv ou Bidze.

Parey mon'n toultan dir, nou pa bezwen zot. Si zot anvi met retar dan nou demars ler nou pe met sa fondasyon solid, pou fer ki Sesel i realize annan en Bidze soutenab a lavenir.

E la mon oule profite pou koriz Onorab Aglae ki ti dir ki Komite Viktimizasyon dan Lasanble Nasyonal, i devret rekomans. Onorab Aglae, ou devret konpran poudir vre sa komite ti pe fer en bon travay e ti pe rekonsilye bokou nou pep. Me avek ou *Leader*, Dokter Patrick Hermine, i ti anmenn sa komite Ankour zis akoz i ti pe *run* en laklas mark anndan dan sed lo konblaz, e i ti pe viktimizasyon drayver. E son drayver ti anmenn li devan sa komite e se la ki i ti santi li ganny menase e i pa ti anvi ganny ekspoze. Wi Mr Speaker, vwala akoz sa komite ti arete.

En tel Bidze ki pe souliny nesesite travay dir, met Seselwa premye, fasilite fason fer biznes, fer sir ki tou dimoun ki kapab kontribye e fer zot kontribisyon i fer e fer sir ki tou reveni i antre kot i devret antre. Asir en bon servis piblik, elimin koripsyon. Ankouraz prodiksyon e partisipasyon, fer desann kou lav dan Sesel e amelyor nou fason viv dan sa zoli pei beni,

byensir i bann zoli rev ki nou bezwen fer li arive. E mwan koman lavwa Baie Lazare dan Lasanble Nasyonal, mon pou egzize ki sa bann mo pou bezwen ganny transformen dan bann realite e aksyon.

Mon kontan pou vwar bokou lorganizasyon ki annan konesans e konpran ki mannyer en Bidze i devret ganny striktire e koz pozitiv lo sa Bidze, menm si i annan detrwa konsern ki merit ganny adrese. Sel group ki pa dakor avek sa Bidze se byensir parti minoriter.

Mr Speaker, i kler ozordi ki parti minoriter dan Sesel, pe perdi tou loksizenn dan demars pou zot reste relevans. Avek sa bann lanons ki plis Seselwa pe konsider al rod en lanplwa e aret depan lo bann sistenm *welfare* ler zot pa merite, sirman i en dezavantaz pou Parti Lepep. Ler en dimoun i endepandan, i pa bezwen politisyen pou li depan lo la. I pa bezwen faver akoz i konnen ki son drwa e son devwar.

Ler en dimoun i endepandan i konnen se zis li ki kapab anpes li ariv kot i devret arive. Se sa kalite pei i nou *LDS* nou anvi. Kot tou Seselwa ki anvi viv byen i a fer tou an gardan prensip travay dir.

Mon kontan ozordi ki mon vwar bokou dimoun ki pe promouvwar sa panse pozitiv. Mon apresye ler mon vwar Mr Rosalie avek bokou lezot ankor pe promouvwar lantreprenarya parmi nou pep. Mon panse ki plis platform i devret ganny met a zot sipozisyon pou persyade e ankouraz plis Seselwa pou devlop zot bann rev dan bann loportinite.

I annan sitan bokou keksoz ki nou pep i kapab fer si zot ganny dekwa sipor, tel ki finans, fasilite, kot prosedir i ava zistifyab e ankourazan.

Koman en Manm Lasanble, mon santi mwan en pe dezapwente ler mon tann Parti US ensilte e fann propagann sal lo bann biznesmenn sirtou bann dan sekte prive. Mr Speaker, i deplorab pou vwar kot moter lakomin pe ganny maltrete, zis akoz zot in azir dan en fason fran e eksprim zot lopinyon e afilyasyon.

Ozordi mon pa oule mank sa sans pou dir avek tou biznesmenn ki nou lo sa kote latab nou pou toultan apresye e valoriz zot travay dir.

Mr Speaker, dan sa Bidze Gouvernman in fer sir ki in sey adres bokou keksoz e mon konnen ki dan Staz Komite plis lenformasyon pou ganny

donnen ankor. Mazinen ki napa naryen dan sa Bidze ki'n ganny engrave, e i toultan annan lespas pou dyalog e azisteman. Menm si nou pa kapab ogmant sa sif ki Minis in prezante.

Mr Speaker, apre ki mon'n ekout sa Bidze souvandfwa aswar mon'n mank sonmey. Zisteman akoz mon eksite pou ekspoz mon kominote avek en levantay loportinite ki sa Bidze pe anmennen. Parey mon'n dir souvandfwa, Baie Lazare *is the land of great opportunity* e sa fraz personn pa kapab bliye.

Zabitan Baie Lazare i devret santi zot tre sanse pou reste dan en tel distrik parey. Lo en distrik ki annan bokou loportinite. E si sakenn de nou dan nou domenn spesifik nou kontinyen travay dir e defann nou teritwar, nou pou arive fer ki Baie Lazare i vin sa distrik ki pou pli gou viv ladan san Sesel.

Mon konnen ki nou pa'n kapab fer sa oparavan akoz Gouvernman oparavan pa'n vremen mazin lentere distrik me plito lentere personnel. Swa aste gran frekantasyon e ki fer ki nou bann zabitan in ganny kit ater. Mon konvenki ki la avek nouvo Gouvernman LDS, keksoz i bezwen ganny fer diferaman. Kot i bon nou a

konsolide, me kot i demann aranze byensir nou ava fer li.

Mon'n ganny aproz par bokou zabitan, zenn, adilt e sitwayen *senior* dan mon distrik, ki pe rod lespas pou zot fer bann diferan proze ki pou benefisyen nou distrik. Mon'n ganny bann bon dialog. Bokou bann bon sizesyon, e bon nide pozitiv lo papye ki demann met an egzekite. Wi Mr Speaker, mon oule dir lazenes ek popilasyon Baie Lazare, ki mon pou sey mon mye pou fer zot lavwa e konsern ganny tande dan pli o lofis pei.

Ozordi mon pe fer en demann avek Legzekitiv pou imedyatman met sa bout later ki Parti Lepep ti vole en pe letan pase ziska ozordi zot in fer bokou larzan lo la. Sa later i T3823 ki mezir 4mil 90square meter. Sa landrwa i sitye *opposite* sa vye bazar kot zot ti lwe avek etranze pou plant fler. I annan bokou potansyel. Mon'n fer sir ki mon'n kapab anmenn bann diferan lazans tel ki *Industrial Estate Authority, ESA, PS* pou Lendistri e lezot groupman kot mon'n kominik avek zot lo sa bout later, e ki manner nou devret pran pou devlop dan lentere Baie Lazare.

Zis sa bout later i a ede realiz bokou rev, nou bann investiser, antreprenner ki dan

Baie Lazare. Napa rezon ki sa bout later pa kapab ganny remet pou devlopman distrik. Lalwa pou akizisyon later dan lentere piblik i ankor egziste. Se sa ki *SPPF* ti servi e nou *still* kapab fer li pou met sa bout later a nou dispozisyon.

Alor nou pe egzize ki napa okenn leskiz pou Gouvernman pa ekout nou laspirasyon. E ler mon lo sa size, mon panse ki dan bann lezot distrik i annan bann tel later, ki devret ganny met a loportinite bann zabitan dan sa bann distrik pou zot fer devlopman kominoter. Mon demann Legzekitiv pou ekout nou.

E dan sa laliny mon pe demann Mr Speaker, pou konsider mon Mosyon irzan ki mon pou deside anmennen e demann Gouvernman pou rebran tou sa bann bout later ki *US* in vole e met a zot dispozisyon.

**(APPLAUSE)**

**HON FRANCOIS ADELAIDE**

E anlany avek sa mon pou demande ki imedyatman size Maison Du Peuple i ganny klarifye, e enn fwa pour tou ganny retournen pou son met o pli vit posibil.

**(APPLAUSE)**

**HON FRANCOIS ADELAIDE**

Later pou met a dispozisyon nou bann zabitan Baie Lazare i annan, me nou bezwen byen organize pou ki i annan lefikasite dan nou bann demars. Nou osi annan sa bout later ki *T11005* ki mezir 2835 *square meter* ki pe ganny espere pou ganny devlope. Sa bout later i sitye zis anba kot Legliz Katolik Baie Lazare. E la mon pe lans en lapel avek tou dimoun dan Baie Lazare pou zot konsider e gete ki mannyer nou kapab devlop nou bann later ki ankor sen.

*LDS* i fortman krwar dan devlopman son pep e mwan osi mon krwar dan devlopman pou zabitan Baie Lazare. Se menm lenerzi ki mon pe anvoye. Mon demande ki o pli vit posib zabitan i zwenn ansanm e diskit devlopman nou distrik. Mon konnen ki i annan personnel kalifye dan diferan domenn pou devlopman e planifikasyon nou distrik. Pa ezite, vin devan, pran sa *challenge* e Gouvernman *LDS* pou ekout zot e ankouraz zot.

Mr Speaker, i annan bokou artizan renonmen ki kapab kontribye pozitivman dan devlopman nou pei. Avek sa lanonsman kot *cultural tourism* dan kominote pou

ganny ankouraze, sirman sa i ankor en katalis ki pe fer mwan eksite.

Mon'n fer bokou rezon lo ki mannyer nou kapab fer Baie Lazare vin en destinasyon pou sa kalite latraksyon. Zabitan Baie Lazare i devret imedyatman sezi sa loportinite e komans angaz zot dan sa bann domenn. Nou annan en distrik ki son kalite devlopman pou sirman mars kot a kot avek nou pozisyon demografik. Profite zabitan, *MNA* pou siport zot.

En landrwa ki vin dan mon latet ler mon lo sa size artizan ki si nou devlop li byen i kapab vin en premye *hot stop spot* e byensir Anse à la Mouche akote lekol lagrikiltir. E en bout later *C2513* ki mezir 8475 *square meter*. Kot nou kapab kree en lesplanad avek bann kiosk artizanal, en *fun park* e lezot keksoz leze ki pa pou met presyon lo sa bout later.

Dan sa menm lokasyon i annan en laba eksepsyonnel kot i annan plas pou zabitan Baie Lazare investir dan bann fasilite *water sport* ki pou sirman anmenn latraksyon dan sa landrwa. Ankouraz bann zenn pou pran lentere dan spor notik ki pe vreman manke dan sa rezyon. Kree *job* e amenn plis reveni pou pei. Lekel ki pa

dir zot ki demen nou pa kapab fer nou prop *regatta* dan sa rezyon?

Mon okouran ki i annan NGO kree par bann zenn Baie Lazare ki pe anvi zer sa landrwa. Mon'n ganny sans sivre zot bann demars pou fer sir ki sa devlopman ki pou ganny fer e donn valer sa landrwa. E mon anvi dir zot ki mon pou siport zot dan tou zot demars pou fer ki zot rev i ganny realize. Vreman ler mon get zot determinasyon pou promot nou distrik, i fer mwan fyer.

Loportinite osi i egziste anba kot Ex Apana Studio, Anse Gaulette. En *plot number T3297*, ki mezir 808 *square meter*. Loportinite i osi egziste dan kre bann *trail* e bann sit touristik pou anmenn plis rekreasyon dan nou distrik. Nou annan bokou sit enteresan e si nou met lespri ansanm nou pou ede anbelir nou distrik.

Mr Speaker, pandan mon dernyen manda, mon'n sey mon mye pou rod tou lavenir devlopman pou mon distrik, me i kler ki Gouvernman US pa ti anvi fer mon lavi fasil. Me la koman en nouvo ladministrasyon ki anvi vwar prosperite son pep, mon konvenki ki Baie Lazare pou prospere.

Dan sizenm Lasanble topik klinik Baie Lazare, byensir in en topik ki'n ganny konsidere koman en lensilt pou bokou. Minis in vini, Minis in ale. Bidze parti Bidze sa klinik in touzour ganny mansyonnen. Bokou fo promes, rimer, menm fo deklarasyon lo sa klinik, in fer ki sa proze pa'n ganny materyalize. Me en dimoun ki'n toultan pran sa size aker, ki'n konpran nou problem, ki in akonpanyi mwan dan mon demars se byensir nou Prezidan, Wavel John Charles Ramkalawan.

Mon ti vreman apresye pou tann li dan son premyer loportinite pou adres Lepep Seselwa atraver Lasanble Nasyonal, pou deklare ki en sant lasante pou Baie Lazare i reste en priyorite lo son azanda. Nou tou, nou ti pe demann en klinik, me li in negosye pou en sant lasante. Eski sa pa i en lespwar pou dimoun Baie Lazare?

Mr Speaker, sa sant pou fer ki nou dokter pou dan nou distrik, ki diferan servis nou pou gannyen dan nou distrik e definitivman avek lagrandisman Baie Lazare byensir i pou en *plus* pou tou nou bann zabitant.

Mon byen apresye ki sa proz in osi ganny mansyonnen

par Minis Hassan e mon trouv li dan Bidze. Pa trakase zabitan Baie Lazare, dan *Committee Stage* nou ava ganny sans elabor plis lo sa topik.

Toudmenm mon oule remerci Gouvernman *LDS* pou zot komitman. E mon osi oule eksprim mon remersiman lo lapar bann zabitan avek sa *sponsor* ki'n pare pou ed nou avek en tel fasilite. Mersi bokou.

Dan Bidze mon'n osi vwar bann proze protez lakot dan Baie Lazare, presizeman Anse Gaulette avek Anse à La Mouche. Mon okouran ki Baie Lazare parey bann lezot *zone* lakot pe ganny afekte e nou bezwen entervenir artifisyelman pou protez nou bann lakot. Mon demande ki tre prosennman en dyalog ant Minister e departman konsernen avek bann zabitan dan sa de landrwa, pou fer sir ki sa proze i ava byen ganny akeyir par tou lede parti konsernen.

Mon'n byen akeyir lanons ki aprezan tou fasilite sport pou tonm anba *NSC*. Fantastik! Tro bokou letan i annan tirayman lo lekel ki fer lekel e se zabitan ki'n soufer. Mon pe demann en latansyon spesyal e irzan, pou ganny konsidere kot laplenn Baie Lazare. Tro bokou bann

zabitan obor sa laplenn in sibir domaz avek zot propriyete aköz *fencing* otour sa laplenn pa bon. Mon demande ki imedyatman sa problemn i ganny adrese pou redwir konfrontasyon e plis domaz.

Mon vwar ki dan Bidze i annan en proze lakaz dan distrik Baie Lazare, pli presizeman dan Dame Le Roi. Me ler mon get son finansman mon trouve ki i ankor lo petet. Mon pou fer demann avek Gouvernman pou eksplor bann lezot laveni, pou ki sa proze i materyalize. Lozman i enn parmi bann problemn dan mon distrik e mon panse ki sa proze pa devret ganny met lo petet.

Nou pou bezwen rod bann lot fason finansman, menm envit sekter prive, met later a zot dispozisyon kot zot a kapab envestir dan lozman afordab ki a permet adres bann problemn parey. E mon ti a osi sizer ki Minister ki annan sa portfolio lakaz pou vin pli inovativ e pli konpreansiv, ler nou bann zabitan pe fer demars pou zot ganny akse avek en lozman konvenab.

Mon senserman krwar ki Gouvernman in ler pou ouver en dyalog nasyonal lo sa size lakaz. E mon konvenki ki i annan nouvo fason fer, nouvo teknolozi e i annan loportinite



pou bann investiser, antreprenner entrodwi zot bann diferan prodwi, dan demars pou anmenn lozman afordab pou Seselwa;- tel ki parey mon frer pe fer promosyon pou son bann *container house*.

Nou fek selebre 250an depi premye zabitan ti etabli Sesel e byensir zot ti reste lo Ste Anne. Eski nou pa ti a kapab fer en proze *land bank* lo Ste Anne e ankouraz Seselwa pou konsider aste en kare later. E la mon krwar ki Onorab Pillay i kapab met son kandidatir laba e i ava ganny elekte pou vin dan Lasanble Nasyonal.

Lo sa size devlopman lo Anse à la Mouche, mon vreman apresye ki Prezidan koman lofis pli o dan pei in vin adres sa size, kontrerman avek bann largiman ki Lopozisyon in sey fer.

Petisyon ti ganny adrese lo Prezidan. Nou tou nou'n trouve kot petisyon ti ganny anmennen. Alors mon konvenki ki Prezidan in konpran ki en desizyon i devret ganny pran e in azir. Menm si i ti okouran ki sete mazorite bann siporter ki ti pe montre zot mekontantman lo sa proze. Se sa kalite kouraz ki en *leader* i devret annan e sa i devret en aspirasyon pou bokou nou.

Dan sa evantyalite ki'n arive i enportan pou dir ki malgre pa tou keksoz ki'n kapab tonm an plas pou tou lede kote, lesansyel se dezormen pou bezwen annan diferan fason fer. E ki piblik i ganny enformen e tou negosyasyon i ganny fer ler bann proze parey pe ganny antreprann.

Mon demande ki tou prekasyon i ganny pran ler sa proze pe ganny materyalize. E parey in ganny anonse, enplik sa bann NGO konsernen ler proze pe ganny fer, pou ki keksoz i deroul byen. Mon oule eksprim sipor kontinyel pou tou sa bann ki annan dezir pou fer sir ki Sesel i reste proteze a tou pri.

Ler mon lo sa topik mon oule lans en lapel osi avek lenvestiser ouswa bann partner, pou vreman konsider nou bann zabitan. Kot zot kapab ganny en lanplwa, swa biznes e amelyor zot lavi.

Bann proze ki pe ganny fer dan bann distrik, i bezwen ganny vwar pe benefisye sa distrik e sa rezyon an premye. E la ki *Mango House* pe fer zot bann rekritman, mon ti ava byen presye si zabitan Baie Lazare ti a ganny konsidere. Zis parey nou ti ganny promet ler sa proze ti pe ganny konsevwar.

Mon kontan pou dir ki mon'n ganny sans dyalog avek sa zantiy madanm *HR* ki pe antreprann sa bann *interview*. Ki in vremen byen korpere e mon demande ki i ganny tou sipor nesaser, pou li donn nou bann aplikan lespwar e mannyer *deal* an zeneral. Ankor en fwa mersi madanm.

Lo laspe kiltirel nou distrik mon vwar i annan en alokasyon pou ede amelyor nou sant kominoter. Avek sa nouvo fason fer kot distrik i ava bezwen, i bezwen vin pli aktiv e pli vivan, mon pe envit tou zabitan ki annan pasyon pou kiltir, biznes, entreprenarya, spor, e lezot domenn pou zot konifer anmenn zot leksperyans pou benefisy e lezot dimoun dan nou kominote.

Sa sant i pou nepli *SPPF* parey ti ete avan. Sa sant i pou a laporte pou ou partaz ou konesans avek lezot. Sezi sa loportinite e fer ou kontribisyon pou ou distrik. Nou annan en *gym* lanmenm la obor e travay pe ganny fer pou fasilite sa zenn agrandi son lespas. Byensir *keep fit, Zumba, weight lifting, body building* e lezot bann aktivite pou gard ou an bonn sante i lo program. Fer ou tim, fer ou program e aproz. Nou pare pou asiste ou.

Nou osi annan en pti *barber shop* ki nou pe ankouraze agrandi e azout lezot servis tel ki *hairdresser*, menm konsider en *beauty salon*. Ankor la i annan lespas pou lanplwa. Ler ou a vin kot sant byensir i pa pou en gat letan. Mazin lo al e anmenn ou kontribisyon pou ki nou a vremen elev nou *border* e nou a amenn li nou menm.

Mr Speaker, mon'n dekouver ki en proze ki bokou zabitan ti pe espere, pa'n aparet lo sa Bidze 2021. Sa i *west coast development*. Sa proze ti enkli en trotwar avek bann lezot fasilite sorti Anse à la Mouche ziska Anse Gaulette. Mon dezapwente ki mon pa vwar sa program lo Bidze, e mon pou demann leklersisman aköz nou okouran ki larzan e tou bann keksoz ti deza an plas.

Mon distrik i renonmen pour lagrikiltir. I bon note ki sa ki bann Manm *US* in sey fer krwar vizavi sa sekter i zis bann skandal. Mon panse ki zot devret azir pli responsab anver zot elektora. Si zot pa okouran ki pe pas, pa zis rabase. Silvouple al aprofondir zot kot Minister konsernen.

Mon konnen ki *Minister* Joubert avek son tim pe travay tre dir pou re donn sa sekter son valer. Kontrerman avek sa

ki bann Manm Lopoziyon pe dir. Minis Joubert son laport in toultan ouver e mon annan gran lespwar ki sa sekter pou rekipere.

Mr Speaker, i fermal ler pou en zanfan apre ki in travay dir e asiste son paran pou prosperite lafanmir e pli tar ou dekouver ki son leritaz i zis det e move zesyon resours. Ozordi politik *US* se politik sa manman 2 zanfan, kan devan mwan Mr Speaker, mon annan laprev ki zot *Leader* Parti, Prezidan Parti in kapab al depans 1.1milyon dan en lotel an form *complimentary*. E sa in ede ki *tax* pa'n anmas plis ki R199mil. E sa ti ava ede pou soulaz 25 travayer ki ti pou lo en lapey R8000.

Mr Speaker, mon met sa la avek Seselwa pou zot vreman konpran ki si vreman sa parti ki pe sante ki zot kontan malere, eski zot vreman senser?

Pou terminen Mr Speaker, mon demande ki tou dimoun i zwenn ansanm e sey siport *LDS* dans sa program, pour ki finalman nou ava ganny nou en Bidze ki soutenab. E nou tou ansanm nou ava rekomans rezouir nou pei e nou a fer sir ki Sesel i vin pour tou son zanfan. Mersi Mr Speaker.

**(APPLAUSE)**

**MR SPEAKER**

Mersi Onorab. Onorab Cosgrow.

**MR SPEAKER**

Mersi Onorab. Onorab Cosgrow.

**HON WALLACE COSGROW**

Mr Speaker. Bonzour Mr Speaker, bonzour Minis ek *PS*. Bonzour tou Manm Onorab, tou manm piblik ki a lekout.

Mr Speaker permet mwan avan ki mon antre dan mon deliberasyon pour *speech* Bidze Minis pou 2021, adres en pti size ki'n leve pandan ki Onorab Porice ti pe fer son lentervansyon yer, konsernan bann bato *cargo* La Digue.

Onorab atraver ou Mr Speaker, bann zabitan La Digue i dir mwan dir avek ou, ki si ou pa konpran en sityasyon en distrik, sityasyon ekonomik dan sa distrik parey *Sir* Rocky, Onorab Rocky in fer resorti premye zour diskisyon Bidze, silvouple enform ou lekor Onorab.

Pou ou lenformasyon sa bann bato ki ou ti fer referans lo la avek, yer swar zot in anmare avek lasose Mahe, aköz napa biznes. Sityasyon biznes lo la Digue i serye! Silvouple Onorab,

silvouple annan en pti pe pli konpasyon. Mersi Mr Speaker.

Prezan nou ava troun dan deliberasyon Bidze *speech* Minis e nou ava antre direkteman dan deliberasyon Bidze. En keksoz ki bokou bann Manm Onorab LDS ki'n koze avan mwan pa'n neseserman vreman fer.

Mr Speaker Onorab Wavel Ramkalawan dan son kanpany eleksyon zeneral 2020 ti dir e mon repete; "nou pou sakouy pye e zot pou kapab anmas bann fri." Mon mazine sa ti an referans lo ki mannyer nou pep pou benefisyte avek en sanzman Gouvernman.

Zis 3 mwan apre ki en Gouvernman LDS i vin o pouvwar, dan plas sakouy pye, nou war bann brans pe konmans ganny koupe. Brans URS pe ganny koupe, brans SETS pe al ganny koupe, brans FA4JR pe al ganny koupe, brans *long service allowance* ek *Scheme of Service* pe ganny koupe zot osi, eksetera, eksetera. Lalis i long.

Mr Speaker sa Bidze ki Minis in prezant avek pep Seselwa, ti sipoze sa prose kot zot sakouy pye e pep i benefisyte. Malerezman Minis in vin zis koup tou. Pou napa naryen pou sakouye, e ou ki'n krwar dan Mr Ramkalawan,

ozordi Prezidan Ramkalawan avek LDS. Malerezman ou'n ganny anbete.

Mon'n konmans mon repons lo diskour Bidze 2021 koumsa, akoz i fason pli senp dan en paragraf pou dekrir sa kalite Bidze ki sa nouvo Gouvernman Liberal in vin anvoy ek nou.

En Bidze kot nouvo Gouvernman i sakrifye en kous mazorite popilasyon e rekonpans e anrisir en minorite. Avek sa Bidze, sa ki annan pe al ganny plis e malere ya kontinyen ganny dir travay plis.

Mr Speaker, ler mon analiz sa prezantasyon Bidze, mon ranpli avek dezapwentman e lenkyetid. Mon dezapwente akoz mon realize ki Minis avek son tim, in mank en loportinite pou vin avek bann linisyativ pou kit nou lekonomi bouze e met li pare pou rebran ler moman i arive.

Mon vreman enkyet Minis, akoz sa bann mezir demi osteriter ki karakteriz ou ladres. E sa Bidze pou severman afekte abilite la mazorite endividyel ek fanmir pou fer de bout zwenn.

Bokou bann pti e mwayenn antrepriz ki ti deza pe pas dan difikilte, pou war li pli difisil e tre probab pou napa lot opsyon me ferm zot laport, akoz

bann *Policy* sa nouvo Gouvernman dan sa Bidze pe al abandonn zot.

Lo lot kote Mr Speaker, Minis i kontinyen dir nou napa, napa larzan. Be ler napa nou rod fason pou gannyen. Me non Minis i vin anons nou ki i pe al redwir *tax lo* biznes par 5poursan. *Tax* biznes par 5poursan Nou tou nou konnen *tax* biznes i ganny peye baze lo profi.

Sey dir mwan konbyen pti e mwayenn antrepriz, ki pou deklar en profi la ek sa *COVID-19* ki pe pet plafon? Tou sort kalite restriksyon kin anpes zot opere sirtou pandan sa peryod festivite kot i annan bokou biznes?

Ki lenpak pozitiv ki sa Polisi lo *taks* biznes pou anmennen pou pei sirtou la an se moman? Minis mon'n zis war ou pe met plis larzan dan pos bann gro biznes, ki petet bann sel biznes ki pou deklar en profi. Mon krwar rekonpans pou bann gro *sponsor* fidel pe konmans donn boner.

Mr Speaker en lot konsern ek sa Bidze ki mon krwar i bezwen ganny fer resorti, se bann lasonpsyon ki sa Bidze fonde lo la. Mon koleg Onorab pou Baie Ste Anne Praslin in osi fer resorti serten konsern dan sa laliny.

Mazorite reveni pa garanti a sa nivo ki'n ganny estimen e sa i poz en problemn posibleman apre milye lannen.

Pou premye fwa depi ki nou'n antreprann reform ekonomik depi 2008, Gouvernman pe prezant en Bidze avek en defisit primer fiskal. Sa li menm i met tou keksoz lo petet. Napa garanti ki en kantite keksoz ki'n ganny dir dan sa ladres pou materyalize.

Enn bann konteks ki sa Bidze in ganny formile lo la, se redwir depandans lo lasistans sosyal. Sa Gouvernman *LDS* i pe fer nou krwar ki nou en nasyon ki viv lo lasistans sosyal e ki mazorite Seselwa pa pe travay. Statistik lo to somaz i enn ki avan *COVID-19* ti dir le kontrer e ti touzour anba 5poursan.

Bokou bann pei devlope i zalou sa bann kalite statistik Mr speaker. Nou pep i enn ki travay. Parkont nou sistenm benefis sosyal in ganny met an plas pou soutenir bann ki malgre zot debourye zot ankor bezwen serten sipor.

Avek sa Bidze ek bann reform ki pe ganny propose dan sa domenn, pou vreman met an danze nou bann aki sosyal. Bokou fanmir vilnerab zot lavenir i sonm Minis.

Dan menm laliny avek sa, dan bann kanpany oparavan *LDS* in repete, ki benefis retret pou pansyoner pa ase. E zot ti menm propoz R10mil konman benefis. Ozordi Minis i dir nou ki bezwen revwar bann benefis pou fer li vin pli soutenab.

Personn pa koz lo sa 10mil pou pansyoner. E menm la Mr Speaker tou bann pansyoner ki ti ankor for e ti pe sibvansyon zot reveni avek en *allowance carer* pe ganny enformen ki sa pe al ganny koupe.

Sa i pa zis Mr Speaker. Ki kantite pansyoner ki ozordi i lo *payroll home care*? Eski zot pe vremen pe met en trou dan Bidze? Akoz ki ozordi sa pansyoner i ganny dir ki i pa kapab ganny de benefis e i bezwen abandon son pti *allowance* ki ti pe vremen ed li kot lakour? Me serten i kapab kontinyen tous zot pansyon ek en saler.

Avek tou respe Mr Speaker ou osi ou en pansyoner me ou ankor annan pou donnen. Alor ou pe travay e ou osi tous en saler. Sa i aplik osi pou serten Minis dan nouvo Konsey Minis. Silvouple Minis revwar sa Polisi e les nou bann pansyoner viv dan dignite.

Mr Speaker, serten bann program ki ti pe ganny zere par Lazans Proteksyon Sosyal in

aprezan ganny transfer avek bann diferan antite tel ki *Dedicated Fund e allowance* bann etidyan kin al dan Bidze Minister Ledikasyon.

Mon konsernen Mr Speaker aköz mon konnen ki Lazans Proteksyon Sosyal in devlop abilite diran bann lannen pou efektifman dil avek bann tel program.

Parkont Minister Ledikasyon zot manda e fonksyon, se pa pou fer transfer benefis, me pou plito enplimant Polisi Ledikasyon e asir bon fonksyonman nou bann lenstitisyon skoler.

Si Minis i santi i annan labi adres sa problem, me non pa transfer sa *burden*. Onnetman Minis mon krwar ki sa pou zis en latet fermal pou bann travayer Minister Ledikasyon.

Aprè tou *bursary* parey i ti apele avan, ti deza ek Minister Ledikasyon ler ti fek ganny entrodwir. Sa zafer Minis pa en bon nide, e mon *advise* pou ou se trou li anba *ASP* en lazans ki ti ganny kre pou fer peyman.

En lot konsern ki annan lyen direk ek Minister Ledikasyon ki Minis pa'n adrese, se sa lensertitid parmi bann zenn *graduate* ki'n kalifye pou ganny zot labours ek Leta.

Sa in en size diskisyon menm dan sizyenm Lasanble par Lopozisyon sa letan, sirtou lannen pase ler Gouvernman ti anonse ki bann labours pou ganny *difer* pou sa lannen.

Prezidan ti'n menm fer miting ek bann zenn kin kalifye e promet ki zot pou kapab kontiny zot letid sa lannen. Parkont ladres Minis pa kler lo ki pou arive ek sa bann zenn.

Nou'n remark en logmantasyon dan alokasyon sonm pou sa lazans, me is reste pa kler ki mannyer bann etidyan pou devenir. Minis laklerte i nesese lo sa size e bann zenn pe espere. Donn zot lespwar silvouple.

Zenn se la relev pou nou pei, e lepanouisman nou bann zenn, i enportan pou fitir e devlopman. Nou'n tandere saman ki *Board SNYC* pe al ganny aboli. Sa ti striktir e lavwa nou bann zenn dan diferan laspe.

Mon realize ki sa size lazanes enn ki normalman ganny reflekte *across the budget*, akoz bann loportinite vin atraver diferan sekter. Bidze 2021 pa'n anmenn okenn gran lespwar pou zenn Seselwa dan devlopman ekonomik nou pei.

In napa okenn mansyon ou linisyativ spesyal pou zenn. Parkont nou war en kantite

lenstans kot zenn in pare pou fer zot kontribisyon ki swa dan sport, lanvironnman e osi sekter profesyonnel e menm lo bann size pertinan tel ki gouvrenans.

Eski sinyal ki sa Gouvernman pe anvoye ek bann zenn, se ki nou'n ganny ou vot, mersi bokou e nou ava war ou ankor dan 5 an?

Mr Speaker *FA4JR*;- ozordi i en size ki pe ganny koz lo la bokou. La realite reste ki an 2020 parey bokou lezot pei lemonn. Gouvernman sa letan ti met an plas en *rescue package*, pou bann diferan biznes dan sekter prive pou soutenir zot pandan moman difisil ki ti devan zot.

Gouvernman ti realize tre boner ki i ti pou bezwen kit nou lekonomi a en serten nivo operasyonnel. Tout an prenon kont se sa bann menm biznes si zot kontinyen lo serten nivo loperasyon, zot pou kapab soutenir en lot Bidze son lannen answit.

Se sa ki ou war ozordi Minis ou kapab fer serten prozeksyon lo reveni ki pei pou anmase atraver taks. Set akoz Gouvernman in kit lekonomi fonksyonnel an 2020. Se sanmenm sa demann dan lekonomi ki mon ti pe fer referans avek boner dan mon

lentervansyon. Malgre Minis a plizyer repriz ou'n apel sa en depans artifisyel.

Mon osi rekonnèt ki bokou nou sitwayen in eksprim lopinyon ki zot santi in petet annan ki pa ti merit pe ganny asiste. Parey *Leader* Lopozisyon in dir, nou *welcome* e sipòrt okenn envestigasyon par ou Minister, Minis ouswa lezot lenstitisyon endepandan.

Lo sa size mon'n osi remarke ki en nouvo lalis in fek sorti lo sa ki pou kontinyen ganny akse avek sa lasistans. Sa i bann biznes ki plizoumwèn relye avek Lendistri Touris. I pa ase, me omwen i touzour keksoz.

Parkont mon war ki Minis ou'n *conveniently sneak in* biznes ki fer vini loto lo sa lalis. I sitan aparàn ki parmi tou sa bann lezot biznes, li i napa en sou relasyon ek zot. Me selman i la lo sa lalis. Tou sa bann lezot pti biznes i soke pou war sa, e zot, zot in ganny kit ater menm si nou konnen ki normalite dan biznes pa pou ariv deswit.

Minis eski sa i dezir ou Minister ek bann profesyonnel, ouswa en lord ki'n ganny donnen pou soutenir serten?

Bann lezot biznes i ankoler akòz zot pe *struggle* pou pey zot travayer, la ki restriksyon in ganny prolonze.

Lensertitid se ki si nou prolonz ankor ek sa bann sif lenfeksyon *COVID*, zot riske faid e met travayer ala port.

In annan bokou ki'n ganny dir lo kou pou soutenir bann diferan kontra pou *outsourced services* Gouvernman.

Sa i bann kontra netwayaz dan lekòl, lopital e an pli gran porsyon bann kontra *LWMA* ek Minister Lanvironnman. E osi bann kontra pou servis sekirite dan bann diferan antite Gouvernman pri mondyalman dan lekòl e dan lopital.

Ozordi bokou bann pti kontrakter i bann fanmir ordiner ki'n organiz zot e pe partisip dan devlopman ekonomik nou pei. Zot bann pti biznes ki Gouvernman oparavan in ede kre e zot pe osi ede kre lanplwa pou bokou nou frer ek ser.

Propozisyon Minis ek sa nouvo Gouvernman, se pou redwir lo lakantite kontra e larzan ki ganny peye. In annan propozisyon pou servi *camera* dan plas met en sekirite fizikman dan nou bann lekòl ek lopital.

Bokou ki'n eksprim zot lopinyon lo sa size sirtou bann *Headteachers* in dir ki sa pa en bon nide. *Cameras* pa en



*deterrent*. I senpleman ed ou ek levidans *after the fact*.

Tou sa bann kontrakter sekirite ki ozordi pe anploy de santenn travayer zot dan lensertitid. Sa ki pli sagrinan dan tou sa la se lefe ki zot konnen ki sa bann nouvo fason fer pou benefisye 1 ou 2 lakonpanyen sekirite ki annan lyen direkteman avek sa Gouvernman LDS, parey *Pilgrim Security* ki pou Mr Fonseka.

Tou bann kontrakter netwayaz ki'n pou pandan longman, espere pou zot osi ganny en pti kontra, pou zot osi ede dan netwayaz zot kominote nouvo Polisi pe dir ki sa i bezwen ganny revwar.

Mr Speaker, Minis in koz bokou lo redwir nou depandans konman en pei lo Sekter Tourism. In koz bokou lo devlopman bann sekter alternativ ki annan potansyel kontribye dan anmenn plis reveni pou nou pei, pou ki nou ava nobou vin pli rezilyan konman en pei dan le fitir.

Parkont Minis, pa'n donn gran detay konman ki nou pou arive akonpli sa. Ozordi sekter pti e mwayen antrepriz i preski lo son zenou akoz sa pandemik.

Minis pa'n donn okenn linisyativ dan Bidze pou re stimil sa sekter pour ki zot ava

kontinyen kontribye e agrandi reveni nasyonal nou pei.

Lanfaz in ganny mete lo *ease of doing business* ki senpleman satisfere en lendeks. En zour ler mon annan en pe plis letan, mon ava eksplik ou Onorab Mondon akoz ki Sesel i 100enm e Moris i 13enm.

Minis in koz lo potansyel Sekter Lapes. In anons serten mezir ki Gouvernman pou pran pou devlopman sa sekter. Ler mon ekout sa bann mezir, i fer mwan realize ki sa Gouvernman atraver Minis pou sa sekter Minis Ferrari napa gran linovasyon. E zot a pe selman *piggy back* lo plan devlopman sa sekter, ki Gouvernman oparavan ti'n aprouve.

Later pou fer lizin *Ile du Port*, nouvo port pou fasilite *long line* ti deza dan *Comprehensive Fisheries Plan* prezante avek ansyen Konsey Minis. An dot mo napa nouvo nide.

*Aquaculture* ki en lot sekter ki annan potansyel anmenn plis reveni pou pei, me pann trouv en plas dan ladres Minis. Eski sa i en koensidans, ouswa Minister pa ankor tro *convince*?

Ler mon ti pe ekout Minis Ferrari dan son *interview* ek Clive *TeleSesel* son larepons lo kestyon *aquaculture* pa'n *convince* mwan ki i 100 poursan

*on board*. Parkont nou war Mr Speaker *IDC* pe akseler plan pou relans *aquaculture* lo Coetivy.

Sekter Lekonomi Ble i enn ki annan bokou potansyel e i enn ki pe ganny bokou *prominence* mondyalman. Parey in ganny dir i sa lot, e nouvo frontyer ki nou bezwen fransir. I annan nouvo loportinite pou bann lanplwa tre spesyalize ki pou ede anmenn bokou plis reveni pou nou pei. E bokou plis loportinite syantifik pou nou bann zenn dan domenn konservasyon e osi bio teknolozi.

I pa zis en *extractive economy*. I en loportinite pou nouvo dekouvert e en potansyel pou devlopman nouvo sours lenerzi renouvlab. Malerezman Mr Speaker sa Bidze pa'n vreman koz lo sa potansyel apard ki en proze *biotech*.

Se sa nouvo sours reveni Minis pou nou redwir dependans lo tourizm.

Lenerzi renouvlab Mr Speaker in en size dan prezantasyon Bidze Minis. Malerezman bokou ki'n ganny dir i baze lo plan Gouvernman avan.

Napa nouvo linisyativ ki menm si pa ava ganny materyalize toudswit ti ava

omwen ed nou konnen kwa ki dan plan.

Nouvo Polisi lo lenerzi ti ava kapab re pozisyonn nou konman en Pti Leta Zil ki'n fer bokou pou promot devlopman soutenab. Mon konklizyon se ki napa nouvo nide avek sa nouvo Gouvernman.

Malerezman nou'n tann prezidan koz lo fermtir Konmisyon pour Lenerzi. En desizyon ki regretab e sa pou mwan i en regresyon an konparezon avek bann lakonplisman ki nou'n fer oparavan.

Mon konnen in annan bokou ki ti pe ganny fer, pou re pozisyonn sekter lenerzi lokalman e pou ankouraz plis bann *independent players* dan sa sekter. Minis ou'n mank en lot loportinite pou ogmant diversifikasyon reveni pou nou pei.

Lagrikiltir Mr Speaker; Bokou in ganny dir lo potansyel sa sekter oparavan. Dan kanpanya politik nou'n menm war fermye prominan Sesel pe zistifye benefis ki en Gouvernman *LDS* ti pou anmennen pou sa sekter.

*COVID* in montre nou lenportans ki sa sekter i annan, e lenportans bann pti fermye dan sa sekter.

Nouvo Polisi dan Bidze se pour servi sa pti fon devlopman pou lagrikiltir pou donn gro sonm *loan* ziska 5milyon ki pou benefisye gro fermye. Fon i limite e bann pti fermye ki pou soufer.

Petet sanmenm rezon bann gro fermye ti pe lager lebra kase pandan kanpany politik. Mon enplor Minis pou koz ek Minis Lagrikiltir pou rod alternativ pou bann gro fermye kapab ganny lasistans.

Mr Speaker mon pa pou kapab mank sa loportinite pou dir detrwa mo lo size lakaz e lozman. Bidze fer provizyon selman pou kontinyasyon bann proze ki ti deza an mars.

Bokou ki ti'n met lespwar dan en nouvo Gouvernman afen ki zot rev pou en lozman i ava realize i dan lensertitid. Akoz naryen pa'n ganny dir fitir proze devlopman lakaz.

E la mon pe mazin mon distrik Plaisance kot mon'n fer bokou travay politik, redevlopman *Société du Logement* ek *Ex-Murray* pou nouvo lakaz pou bann zabitan.

Petet Minis i kapab dir nou ki'n arive avek plan pou fer 3000 lakaz ki Gouvernman oparavan ti pe planifye?

Mr Speaker apre ki mon'n fer en rev i an gro lo bann pwen kle dan sa prezantasyon Bidze

fer par Minis, mon realize ki apard bann mezir finansyel e fiscal tre drastik ki sa nouvo Gouvernman atraver Bidze pe al enplimante, sa Bidze napa nouvo linisyativ.

Sa *LDS* ki letan ti dan Lopozisyon ti annan tou solisyon, ozordi dan Gouvernman zot ankor pe *piggy back* lo bann gran Polisi oparavan.

Petet Mr Speaker mon pa realistik. Petet mon pe demann tro bokou tro boner. Me pou bann ki konpran sa lyen ant sanzman Polisi, ek gran liny en Gouvernman ek prosis Bidze, zot ava dakor avek mwan ki pou dir Gouvernman i rat en sans, ki petet pli boner zot ava kapab ranmas li se dan lot prosis Bidze lannen prosen.

Pou konklir Mr Speaker mon pou fer serten referans avek konklizyon dan ladres Minis. En Bidze ki soutenab, en det nasyonal ki soutenab, in form parti travay dir sa ladministrasyon avan e menm sa enn avan li.

Anfet pou en peryod plis ki 10an depi 2008 e Minis konman en ansyen travayer Labank Santral i okouran sa. Nou'n otan ki posib reste drwat dan laliny program reform *IMF* ek *World Bank*.

Seselwa in travay dir e dan en tre kourt peryod letan nou kontinyen sirpas target ek lekspektasyon dan kantite laspe. Nou'n reisi grosi nou prodwi domestik brit dan en kourt peryod letan, ankor gras a travay dir bokou Seselwa. An gran parti, se Seselwa ki'n grosi sa gato

Malerezman Mr Speaker, an 2020 maler in frap nou laport e nou'n war frir rezilta nou bann bon travay dir, detri osi dan en tre kourt letan. Sa lannen ane lannen 2020 nou ti'n sipoze fini *achieve* nou target 50poursan *debt to GDP ratio*.

Mon met sa koumsa, aköz mon anvì montre ou Minis e tou dimoun ki pe ekout nou, ki lamazorite Seselwa laklas travayer pa merite sa kalite pinisyon ki sa Bidze pe anmenn pou li.

Wi nou nivo det i enn ki alarman. Minis, Seselwa i travayan e Seselwa ki'n grosi sa gato, pa abandon nou. Ed li dan son ler de bezwen. Apre i pou travay ankor pou re grosi sa gato.

Mr Speaker an terminan, mon ti ava kontan remersye tou dimoun ki ekout mwan, bann ki'n kontakte mwan, bann ki'n anvoy mwan en pti mesaz pou

mwan met en pe zot konsern dan mon ladres ozordi.

Mon oule asir tou bann siporter e Seselwa an zeneral ki nou dan *United Seychelles* nou pou kontinyen debout for pou defann nou prensip e zot lentere.

Mon enplor zot pou la dan sa moman difisil, pou kontinyen ekout bann konsey lotorite lasante piblik pou ki nou ava kapab war serten nivo normalite tre byento pou byennet e prosperite nou zoli pei sesel. Mersi Mr Speaker.

**(APPLAUSE)**

**MR SPEAKER**

Mersi Onorab. Onorab Loizeau.

**HON NORBERT LOIZEAU**

Mersi Mr Speaker. Bonzour Minis ek *PS*. Bonzour tou Manm Onorab e bonzour tou Seselwa ki a lekout ozordi bomaten.

Mr Speaker pou komanse mon anvì remersi Bondye pou sa lazournen ki'n fer mwan war, remersi li pou sa lafors kouraz, ki in donn mwan pou leve bomaten pou desann isi anba kot Lasanble pou vin aport mon kontribisyon lo Bidze.

Mr Speaker sa Bidze ki'n ganny prezante semenn pase par Minis pou Finans, a monn

avi i enn ki'n ganny prepare pou pran kont larealite e osi Leta ki Sesel ti ete anba Gouvernman US e lenpak ki in anmennen lo nou sosyete ozordi. Ozordi Sesel i lo son zenou avek COVID ki'n debark Sesel keksoz in vin pli pir.

Tou biznes in ganny afekte san okenn leksepsyon. Tourism ki ti pli gran pilye nou lekonomi li osi in tonm lo son zenou. E sa pe fer ki nou lekonomi in tonm net lo son zenou li osi. Parey Minis ti fer nou rapel semenn pase.

Me mon annan konfyans ki Minis Hassan avek son lekip, e avek sipor ki i pou ganny avek nou isi lo sa kote latab ki i pou reisi, mon napa okenn dout ki i pa pou reisi. Me osi apre ki tou popilasyon ya ganny vaksinen. Mon konnen ki nou pou konmans war laklerte, kot keksoz i a komans retourn dan son leta normal, e bann biznes i a komans rebran zot fason fer parey i ti ete avan.

Diskour Bidze pou sa lannen i enn ki'n montre Lepep Seselwa ki nou annan en Gouvernman ki kapab pran desizyon kan i nesaser. E menm ler nou dan en moman eksepsyonnel, parey nou ete ozordi.

Dan Bidze ki'n ganny prezante, mon konnen ki i

annan bokou keksoz ki bokou nou pa pou kontan sirtou bann lo lot kote latab. Zot pa pou kontan akoz zot ti abitye avek en lot fason fer keksoz. Me nou Gouvernman in war li enportan pou nou sanz kalite fason fer keksoz dan pei. Akoz Gouvernman in sanze e fason pou diriz pei osi i bezwen sanze. Sa bann sanzman in ganny fer akoz sa nouvo Gouvernman i anvii ki Seselwa i vin en pep ki travay. Parey nou ti ete en pe letan pase.

Kot ti annan bann zonm, fanm ki ti travay dir pou zot kapab sonny zot fanmir. Pourtan sa bann letan ti napa okenn lasistans ki ti ganny donnen.

Ti napa *welfare*, ti napa *carer* pou okip nou bann vye dimoun. Nou ti fer li nou menm konman en fanmir. Akoz nou bann vye dimoun, se zot ki ti okip nou ler nou ankor zanfani. Alors nou bezwen rann zot laparey.

Mr Speaker tou sa bann bon valer, in nepli annan dan nou sosyete. Ti napa Tribinal Lafanmir kot ti bezwen tay avek bann dimoun pou pey alimoni pou zot zanfani.

Tou dimoun ti pran zot responsabilite. Akoz zot ti konnen ki ler ou fer zanfani, ou bezwen fer sir ki ou travay pou

li kapab ganny nouri byen. Pou li al lekòl pou li ganny en bon ledikasyon, e apre antre dan en lanplwa pou li kapab kontribye kot lakour e osi pou son pei.

Mon kapab konpran akòz ki i annan tou sa bann koupir dan sa Bidze. Akòz sa nouvo Gouvernman dirize par Mr Wavel Ramkalawan, i anvè ki tou sa bann bon valè ki nou ti annan konman en pep i retournen dan pei.

Minis semenn pase in dir ki nou bezwen pran nou responsabilite. Wi nou bezwen fer li, akòz in nepli tan pou nou asize e esper Gouvernman vin donn nou tou sa ki nou bezwen.

Mon konnen ki sa ti en metod ki Gouvernman *US* ti servi bann letan ki zot ti o pouvwar, pou zot kapab raman enn de vot pandan ki i annan eleksyon.

Tousala i bezwen sanze Mr Speaker. Sa moman ki nou ladan napa letan pou swazir loubraz. Tou sa ki kapab travay i bezwen leve e al travay. Tou dimoun i bezwen pran tou loportinite ki vin a zot laporte.

Parey Minis in dir, tou moman difisil i annan loportinite. Alors nou bezwen atrap li kan i vin a nou laport.

Lefe *COVID* Mr Speaker wi, i enn pli pir ki nou pei in deza eksperyans. Me fodre pa nou

bes lebra. I normal pou annan kritik. Me pa zis kritike zis akòz zot dan Lopozisyon e alor zot bezwen konplent lo tou keksoz ki nou Gouvernman pe enplimante. Akòz zot koman en Gouvernman, zot pa'n kapab fer li pangar zot a perdi vot.

Parey Onorab Aglae ti dir yer, i normal pou zot konplent koman en Lopozisyon. Akòz nou osi nou ti konplent. Mr Speaker sa letan ki nou, nou ti dan Lopozisyon nou ti pe dil avek en Gouvernman ki annan plis ki 43an o pouvwar. Nou ti pe dil avek en Gouvernman ki ti pran pei par lafors.

Alors i ti enportan ki nou koman en Lopozisyon fer sa bann konplent. Met presyon lo zot, pou ki ozordi pei in sanze. Parey *Leader* Lopozisyon ti fer Vandredi dan son repons, apre ki in denigre Minis, ensilte lentelizans Minis.

Apre pandan *break* Mr Speaker ou war li taye tranp ek Minis, parey en pti lisyen koup lake, pe sey vin zistifye tou son lensilt ki in anvoy lo Minis.

### **MR SPEAKER**

Onorab! Onorab! Sa parol pa apropiye. *Retract*.

### **HON NORBERT LOIZEAU**

Mr Speaker mon a *retract*. Be pa nou pe promouvwar lalang Kreol?

*(laughter)*

**MR SPEAKER**

Mersi. Gard respe silvouple. Mersi.

**HON NORBERT LOIZEAU**

Ok, mon *retract* Mr Speaker me selman Kreol i en lalang ki ris, e parfwa i annan serten mo ki nou bezwen dir. Nou bezwen pa dir. Se bann mo ki fer nou konversasyon pli enteresan e pli for.

**MR SPEAKER**

Swazir en lot mannyer.

**HON NORBERT LOIZEAU**

Mersi Mr Speaker. Mr Speaker Lopoziyon i krwar ki zot annan 43an dan Lopoziyon, e nou, nou annan 43an dan Gouvernman.

I enportan ki i konnen ki se zot ki'n la tou sa letan. Alors pe sey vin fer dimoun krwar ki se nou ki'n detri Sesel, se nou ki'n anmenn Sesel kot i ete ozordi.

Mr Speaker ozordi si Minis in vin avek sa bann mezir, se pou nou kapab repar sa kales kase ki zot in kit avek nou. Dan son repons *Leader*

Lopoziyon in menm dir ki zot *Robin Hood*, zot pran ek sa annan zot donn sa ki napa. Tandis ki nou, nou pran avek sa ki napa e nou donn avek sa ki ris. Mr Speaker vreman Lopoziyon i konfize. Tou sa bann lepir ki annan Sesel Mr Speaker, lekel ki'n kree? Se zot laba lo sa lot kote latab.

Lekel ki ti vann St Anne pou R1? E ozordi i annan zot bann dalon privilezye pe fer milyon avek. Lekel ki partaz later konblaz? Ki ozordi i later endistriyel pou naryen avek zot bann dalon privilezye, apre *lease* i ganny vann pou de milyon.

Ladan menm en pti madanm li i dir ki li i ti ganny detrwa pti bout. Menm zafer in arive zil Eve lo Praslin, kot later in ganny donner ek serten endividi apre zot in ganny revann pou de milyon. Pourtan Lotorite konsernen ti konnen, ti ganny averti. Me zot pa'n fer naryen akoz ti zot dalon.

E la Gouvernman Mr Speaker pe bezwen met environ R17milyon pou fer bann lenfrastruktir, pour ki i ava kapab deblok environ 40 morso later, kot bann biznes lo Praslin a kapab rekonmans fer zot bann devlopman.

Ozordi Mr Speaker, si lapartaz ti ganny fer dan en fason onnet, Onorab Gill, ozordi tou bann pou pti antreprenner lo Praslin ti pou kapab ganny en morso later, pou zot kapab fer zot biznes. Me Gouvernman *Robin Hood* pa'n enterese avek zot.

In plifere fer son bann dalon fer larzan lo ledon Seselwa. E larzan ti ganny fer dan segonn, apre ki zot ti vann lezot *lease*. Mr Speaker i menm i annan ki zanmen in peye, in menm annan plis ki R25milyon ki pa'n antre dan kof Gouvernman!

Menm konnen lekel nou pa konnen, i annan nou pa konnen akoz napa rikord ki'n ganny kite. Pourtan kot *IEA* i sel landrwa ki'n sanz *CEO*, mon krwar anviron 5.

Ozordi Mr Speaker i annan en ta bann pti biznessmenn Seselwa ki pe rod en landrwa pou zot kapab fer zot pti *workshop*. Zot ganny dir napa. Selman ou war bann gro konpanyen etranze oubyen bann ki'n ganny natiralize akoz zot annan larzan, zot gannyen.

I menm annan ki annan plis ki 2 morso. Mon demande oli lazistis? Onorab Lemiel yer in dir, se zot Per Fondater Mr France Albert Rene, i sel Prezidan ki'n fer parey *Robin*

*Hood*. Be lekel ki ti pran 10 arpan later e vann son lekor Anse Polite, e vann son lekor pou R60mil?

En later kot plizyer zabitan Anse Boileau, Grand Anse Mahe ti ava kapab ganny en morso pou zot osi kapab konstrir zot fwaye. Me in pran tou pou li!

Lekel Prezidan ki son madanm ti ganny plizyer pti, pti bout. Apre vann *lease* e fer de milyon? Wi Mr Speaker se pa lot ki Per Fondater Msye France Albert Rene.

E son predeseser li Mr Speaker i ti anmenn *Irish*. Son siksese Mr Speaker eksiz mwan li i ti anmenn *Irish* pou vin donn bal dan nou larzan. Zot rapel sa *saga FIU/NDEA* Kot larzan ti ganny transfer Moris lo annan kont? Menm kontra pa'n ganny war, in disparet. Me sel keksoz ki ti benefisyer Mr Speaker se zis 2 boutey *whisky*.

Lopozisyon i dir nou pran aksyon, me ler aksyon i pran avek bann ki pe donn lenfirmite dan Gouvernman, avek bann ki pe pran resours Leta pe servi konmsi pou zot, zot dir nou, nou pe viktimiz dimoun pou rezon politik.

Zot dir Prezidan pa enterfer dan travay ki bann profesyonnel lasante pe fer pandan sa pandemik, me ler



Prezidan i les bann profesyonnel fer zot travay, e li i profite pou fer en vizit travay aletranze, zot plennyen menm. Zot dir Prezidan pa merit ale, i merit la pou dirize.

Be Prezidan pou reste pou diriz kwa? Kan zot in dir les travay avek bann profesyonnel lasante? *Comme* dir David Louise “pran zot en desizyon bannla.” Be la Prezidan in trounen, Mr Speaker. Mon pa tann person dir naryen mwan lo ki in al fer. Onorab Pillay ou pa'n dir naryen.

Pourtan in al negosye Mr Speaker, in al negosye pour ki *Air Seychelles* pandan sa lannen pa pou pey son det! E negosyasyon i ankor ankour, ankor sirplas pour ki *Air Seychelles* i vin antyerman pou Sesel. Mon pa'n tann zot dir naryen lo la.

Petet taler Onorab Loze a dir, i reste zis li pou koze. Mon ti pe ekspekte *Leader* Lopoziyon bomaten parey son labitid i ti a lev son lanmen, pou li dir i kapab dir en pti keksoz lo vizit ki Prezidan in al fer Mr Speaker. Ler i fer sa ki byen zot pa dir naryen. Mr Speaker mon anvi dir avek ....

*(Interruption)*

**MR SPEAKER**

Onorab Loizeau esper mwan en pti moman. Onorab Pillay ou'n fer, ou pa pe reponn li ou pe enteronpe.

**HON SEBASTIEN PILLAY**

*(Off-Mic)*

**MR SPEAKER**

Ou pe enteronpe ou napa, i pa ou tour koze, ler ou tour koze ou a fer ou komanter. I annan 5, 6 komanter ou'n pase la letan ou pe koze i tro. Wi, mersi. Onorab Loizeau ou a kontinyen.

**HON NORBERT LOIZEAU**

Mr Speaker i pa pe *disturb* mwan li. Mon abitye ek son bann kalite plennyen ki i plennyen dan Lasanble.

**MR SPEAKER**

Onorab Loizeau ou kontinyen, mwan ki pe adres Onorab Pillay pa ou. Mersi.

**HON NORBERT LOIZEAU**

*Ok, no problem.* Mr Speaker Onorab Pillay li i kontan plennyen parey son labitid parey en pti baba ki bannla in aras li son bibron. Kontinyen plennyen.

Mr Speaker dan sa bann demars ki Prezidan in ganny fer menm Onorab Uranie son lopital in ganny negosye. Mon

panse ki Onorab Uranie napa okenn petisyon ki pou ganny fer sa voyaz.

Kot dan sa lopital pou annan landrwa pou bann pti zanfan, ki ou'n dir ler ou vin lopital pou zot kapab prepar zot manze. Akoz dan sa enn la napa.

Mr Speaker prezan permet mwan al lo mon lot pwen. Minis in dir ki i annan biznes ki pou bezwen ganny rezerve pou Seselwa. Mon dakor avek Minis, akoz tro bokou fwa nou war bann pti biznes Seselwa pe ganny kit ater.

Mon krwar en lord i bezwen ganny mete, pou ki bann pti biznes Seselwa ki dan bann domenn tel ki elektrisyen, *air-condition*, plonber, *painter* ek lezot ankor i a kapab ganny en *survive*.

Kot *tender* i konsernen i bezwen ganny gete byen, akoz nou pa kapab war en *tender* ganny donnern avek en sel kontrakter pou li fer tou. Sirtou bann gro proze, akoz i annan kontrakter ki pran tou apre ou war li pe rod *GOP*, pou fer vini bann travayer dan sa bann domenn ki mon mansyonnen oparavan.

Kan i annan bann pti konpanyen Seselwa ki kapab fer sa bann travay. Alor mon pou siport ou lo sa pwen.

*FA4JR*: i annan serten Onorab dan Lopoziyon pe dir ki *FA4JR* se bann dimoun ki pli annan ki'n gannyen. Onorab Pillay li i le plis detay. Mr Speaker be pandan letan ki *US* ti dan Gouvernman nou osi nou ti demann zot Minis Loustau-Lalanne. Nou ti demann li pou donn nou detay lo bann peyman ki'n ganny fer depi Mars, Avril, an desandan ziska Zilyet.

Mr Speaker ziskan ozordi nou pa'n war, nou pa'n war, nou pa'n war. E pou zot kapab donn bal dan sa larzan *FA4JR*, zot ti dizourd Lasanble pour ki napa *oversight* lo sa larzan.

Mon panse ki zot pa'n detri bann dokiman, avan ki zot in kit lofis. E la mon ti ava kontan ki Minis i fer sir i met a nou dispozisyon si i annan tou detay lo bann mwan ki *US* ti dan lofis. Akoz dapre konpran se dan sa letan ki labi ti ganny arive.

Dapre konpran Mr Speaker bann teknisyen kot Finans, pa ti an faver avek bokou desizyon ki ti pe ganny pran sa letan. Me avek presyon politik zot ti bezwen fer li. Nou kapab pardonn zot pou sa. Akoz sa bann menm teknisyen zot ankor la pe travay. Zot ankor pe travay me sa voyaz san

okenn presyon politik. E mon felisit zot pou sa travay.

Konman mon lo *FA4JR* mon anvî dir Minis ki i annan biznes ki'n ganny dir ki dernyen peyman se Fevriye sa lannen. Me par natir sa bann biznes, i pou difisil pou zot kapab debut lo zot menm. Enn parmi sa bann biznes Mr Speaker, se bann *driving instructor* ki avek bann mezir lasante, zot pa pe kapab *operate* alor Minis get en kou ladan.

Zot in al konsilte ek lapolis, lapolis in dir zot pa konn naryen se lasante ki pou bezwen donn en desizyon. Alors Minis mon kit sa avek ou.

Mr Speaker aprezan permet mwan koz en pe lo mon distrik Bel Air. Bel Air i en distrik ki ou a krwar i ti'n ganny met lo poz pandan ki *US* ti dan Gouvernman. I annan proze ki depi 2018 pa'n zanmen ganny fer san okenn rezon.

Nou ti'n ganny promet elarzisman semen *Curio Road*, zis premye faz ki'n ganny fer larestan in ganny met lo poz. Spesyalman sa bout an de sandan kot lafanmir Elizabeth anba miray Bagatel ziska ou koup par lao lakaz Mr Freddy Louise.

Mon konpran konstrent finansyel ki nou pei i ladan. Me

mon panse dan pros lavenir sa i ava ganny finalize.

Lakaz i en pli gro problem dan mon distrik. Apre plis ki 25an ki premye proze lakaz ti ganny fer dan distrik Bel Air, se lannen pase ki en lot proze ti ganny terminen. E i ti menm pa ni ase pou nou bann dimoun Bel Air.

Be la Minis koman mon lo sa size, mon anvî ou get en pe dan *part payment* pou bann ki pe lwe lakaz, bann ki pe esper lakaz. Mon konnen i ti annan labi, me la deor Mr Speaker i annan ki pa'n fer labi. I annan ki pe ganny mwens ki sa bann ki ti pe fer labi. Alors get ladan, ed zot.

E mon panse Mr Speaker, avek sa alokasyon 120milyon ki'n ganny prozekte dan Bidze pou devlopman lakaz dan Sesel, mon panse ki bann ki lo sa lalis espere pou plizyer lannen zot a reisi sa fwasi ganny zot lakaz. Si tou keksoz i al dapre plan.

Pou bann lekip *sport* mon distrik e dan tou lezot distrik lo Mahe, mon anvî dir zot apre ki pei i troun dan son leta normal, nou bann konpetisyon pou rekonmanse. Pou bann ki lo *High Level Sport* zot pou kontinyen ganny asiste.

Malgre ki Minis Finans pa'n fer okenn mansyon lo *sport*, mon anvî dir ki Minis

responsab pou *sport* Minis Zialor i annan en bon plan zot.

Aprè ki mon'n zwenn li dan en miting kot nou'n diskite bokou keksoz konsènan *sports* e mon distrik an zeneral. Mon anvi dir avek tou dimoun ki kontan *sport* ki zot dan bon lanmen.

Pou konklir Mr Speaker mon anvi dir avek Minis ki mon pou sipòrt sa Bidze ki in prezant avek nou. Sa Bidze i pou fer ki tou Seselwa pou bezwen pran zot responsabilite. Sa Bidze i enn ki pe anmenn en kiltir travay dir dan nou pei. Letan asize esper Gouvernman fer tou pou zot parey ti ete anba Gouvernman *US*, ozordi pandan sa pandemik nou'n war son negativite ki in anmennen.

Alor i enportan pou nou solider, an vi sa moman difisil ki devan nou. Mr Speaker avek sa detrwà mo, mon anvi remersi ou Mr Speaker, Minis Hassan, *PS Thesee*, tou bann koleg Onorab e tou Seselwa dan lakour ki a lekout ki'n donn mwan zot latansyon.

Mon anvi remersi tou bann ki'n donn mwan en pti *call* pou reasir mwan, pou *remind* mwan lo serten pwen ki'n pase dan Bidze, pour ki mon kapab fer sorti.

E mon swete ki mon'n kapab fer li sorti malgre ki mon

pa'n kapab dir tou. Akoz letan i limite. Mr Speaker Mersi pou sa privez ki ou'n donn mwan.

**(APPLAUSE)**

**MR SPEAKER**

Mersi Onorab. Nou ava *adjourn* la e nou ava rebran 11er. Mersi.

**(BREAK)**

**MR SPEAKER**

Onorab Labrosse, ou annan laparol.

**HON RICHARD LABROSSE**

Mersi Mr Speaker pou donn mon laparol. Mon dir en bonzour salere pou tou mon bann koleg prezant, tou bann ki a lekout, espesyalman pou sa enn ki sorti dan mon distrik Plaisance.

Mr Speaker avan mon komans mon ladres mon ti a kontan fer sorti detrwà pti pwen, ki mon koleg *MNA* in koze avan mwan. Sa Onorab Cosgrow ki'n, mon'n ekout li vremen atantivman ler in koz lo lazènes.

Sirtou in koz sa lo vremen en ton emosyonnel, kot in *remind* nou ki bann zenes pe soufer, bann zenes i bezwen bouz devan, bann zenes in ganny kit deryer.

Be mon ti a kontan fer Onorab rapel ki detruwa mwan pase, (menm lannen 2020 nou pe koze la) ki son menm parti ti pe fer en nespes konpany asarnen Plaisance pou zet lazènes ater lo tapi! E mon ti a kontan fer li rapel ki li osi i ti form parti sa i ti kapab osi met en fren avek zot, si i ti vreman sènsè lo son parol pou protez lazènes.

**(APPLAUSE)**

**HON RICHARD LABROSSE**

Mr Speaker pou komans mon ladres, i en gran loner pou mwan koman en zenn parmi tou mon ban koleg zenn isi dan sa Lasanble, pou mwan donn mon repons pou diskour Bidze 2021 lir par nouvo zenn Minis pou Finans Mr Naadir Hassan Mardi pase.

Mr Speaker mon ti a kontan remersye Minis Finans ek son lekip, pou prepar en Bidze dan en letan ase kourt. Wi Mr Speaker, parey nou'n toultan dir, zenn profesyonnel ler ou met divan anba zot lezel zot pou anvole, e wi zot in delivre.

E mon ti a kontan Mr Speaker avek ou laprouvasyon ki Lasanble i donn zot en aplodisman pou sa travay nob.

**(APPLAUSE)**

**HON RICHARD LABROSSE**

Mr Speaker tit mon ladres pou vize parey mon repons ki mon i fer pou SONA ki Prezidan Larepublik ti donner isi dan sa Lasanble ki pou vize ver zenn ver en lavenir.

Mardi pase Minis Finans ti vin anmenn mesaz lespwar. Lespwar ki nou rev i retourn parey avan. Mesaz lespwar kot Sesel i debout lo son de larou. Wi Mr Speaker mon en zenn ki annan lafwa dan mon gran met, e mon annan gran lespwar ki mon pei pou sirviv sa gro defi.

Mr Speaker tou sa ki arive dan lavi i annan en rezon. Pou LDS ganny Sesel dan en letan tre difisil i byensir annan en rezon. Sa ki pi o in fatige tan lepep Seselwa kot pe gele in fatige tann Lepep Seselwa kot pe soufer. E menm parfwa sa bann dimoun i fer nou vann nou prop frer ek ser pou nou ganny lavans.

Ozordi nou pe ganny demande pou rekomanse, pou re batir nou pei dan sa moman pli difisil. Kot defi in vin pi o ki zanmen. Mr Speaker mon annan lespwar parey tou mon bann koleg zenn dan distrik Plaisance, ki malgre sa pli gro tanpet ki nou pei pe pas atraver

en tanpet kriz ekonomik, en tanpet COVID-19 Sesel e Seselwa pou sorti venker.

Wi Mr Speaker nou pou sorti venker. Akoz Sesel a sa moman i dan en pli bon lanmen ki zanmen in deza ete oparavan. Se selman sa ladministrasyon ki son finans pe ganny zere par en zenn profesyonnel Minis Hassan, ki pou annan lavolonte pou idantifye e retir gaspiyaz kot i annan.

Retir labi kot i egziste. *Streamline* kot fodre *streamline* pou asire ki Gouverner i reste efikas e i donn en servis kot tou Seselwa ava benefisyé. Wi, tou Seselwa frer ek ser Seselwa. Akoz Gouvernman LDS anba direksyon Prezidan Wavel, John Charles Ramkalawan Sesel byensir i pou reste pou tou son zanafan.

Mr Speaker sa premye Bidze ki Gouvernman LDS in anmenn dan sa Lasanble pou laprouvasyon, i en Bidze ki'n garanti saler sekter piblik kontré ek sa ta rimer ki ti annan deor sirtou dan mon distrik, kot mon bann zabitan ti pe kontakte mwan de tanzaot.

Par egzanp Lopozisyon ti pe fer zot krwar ki saler pou ganny koup lanmwatye: dimoun pa pou ganny peye, dimoun pou travay volonter. E mwan mon ti toultan dir avek

mon bann zabitan tan ki Minis pa vin donn son deliberasyon dan Lasanble, mon pa pou krwar sa.

E vwala monn dir zot aret ekout rimer, esper Minis fer son diskour. Mon krwar sa in osi kas tou sa bann demagozi ki zot ti pe senmen. Sa Bidze in osi garanti kontra tou bann pti kontrakter distrik, e tou bann lezot biznes ki deza annan en kontra avek Gouvernman.

Mr Speaker sa Bidze 2021 ki nou pe debat lo la, i en Bidze ki pe donn lo bann baz mezir fiskal e ase disiplin. Malgre nou pe depans an plis ki nou annan, nou bezwen rekonnet ki Minis Finans ek son lekip e i kontenir sa Bidze, olye fer li monte ki kouper to lenflasyon e to lesanz aktyel, sa Bidze in *real terms* in desann.

Savedir bann Minister pou annan mwens pou depanse *in real terms*. Zot pou bezwen fer pli avek mwens. Sa i bann sakrifis ki bezwen ganny fer e Mr Speaker ki'n arive dan lepase? Bidze Gouvernman oparavan in grosi san realize, si sa ta lagres ti pou kapab soutenab pou lasante nou pei dan le fitir.

Zot in depanse san mazin demen. Ansyen Gouvernman in toultan dir nou fer *savings*, rod bwat kondannen met larzan

lasan. Mon apel menm lekòl Plaisance Primer letan mon ti pe lekòl Mr Speaker, zot ti ankouraz nou pou aste tenm pou met dan pri karnen pou met dan labank.

Sa ti bann fason fer *savings* menm. Selman li sa menm Gouvernman i napa ni en *savings* Mr Speaker. Mon swete ki nouvo Minis Finans anba sa Gouvernman nef, mon repete Gouvernman (nef), i regard bann loportinite pou Gouvernman annan en *savings* ki pou garanti li larzan dan letan dir. E ki pou anpes nou pei al dan menm sityasyon ki nou war nou ver lafen 2020 e komansman sa lannen 2021.

Mr Speaker avek sa evalyasyon ekonomik fon linite enternasyonal, in donn en pe lespwar ki sa lannen pou annan en amelyorasyon dan krwasans global. Sa konpare ek lannen pase Fon Linite Enternasyonal i pe prevwar en lekonomi global ki agrandi par 5.5poursan e par 4.2 an 2022.

Tou lespwar i lo sa konpanyen vaksinasyon e bokou pei lespwar i o parey Sesel. Bann lezot pei ki ekonomi i 2 fwa pli gran ki Sesel, in osi bezwen revwar zot bann diferan Polisi makro fiskal e monneter.

E sa bann mezir i enportan pou met anp plas e

dan li menm mon asire i pou ede pou lekonomi kapab demare.

Pou sa lannen in prevwar ki sekter touris pou depres plis, predir ziska 65poursan. Sa dan li menm nou kapab mazine ki i pou anmennen ek li. E sa dan li menm i fer ki Sesel i ekspekte perdi \$332milyon. E sa ankor dan limen in anmenn en lot dega dan nou lekonomi.

Mr Speaker depi son lendependans, Sesel in lans dan en lekonomi touris. Kot la potansyel ekonomi parey kannel, patsouli e lavanniy ti ganny gete koman en louvraz lesklavaz. Kot zot tou zot fer nou rapel nou bann gran pye ti mizer aköz zot ti bezwen al bat kannel dan bwa.

Kan salerla zot pa ti dir nou poudir lapo kannel larzan e fey patsouli lanmonnen Mr Speaker. Apre tou Mr Speaker sa ti lavi sa lepok kot lemonn teknolozi ek devlopman dan lemonn antye ti ankor baze lo sa lepok.

Mr Speaker dan bann mem lannen 60, apepre 33poursan travayer dan nou lekonomi Sesel ti ganny anploye dan sekter plantasyon. Lannen pase dapre sif Biro Statistik apepre selman 1.1poursan popilasyon travayer Sesel in

ganny anploye dan sekter lagrikiltir, lapes e osi *forestry*.

Madagascar i pli gran kontribiter anver marse lavanniy dan lemonn. E sa i kontribye 10poursan son krwasans ekonomik. Mr Speaker mon poz sa la apre mon a fer en pe refleksyon lo la.

Letan nou pe reflexir annou kit antet ki sekter touris Sesel i reprezant apepre 30poursan nou krwayans ekonomik e nou lapes e lagrikiltir i 4.5poursan.

Nou bezwen entansifye zefor pou kre plis loportinite pou sa 2 sekter agrandi, e sa i ava sa moman ideal pou ban zenn penetre dan en sekter ki annan bokou potansyel ozordi. Avek lavansman teknolozi, in fer sa bann louvraz bokou pli fasil.

Mr Speaker mon apresye pou tande ki Minis Finans in anons plizyer reform, dan sistenm *tax* avek bi pou fer servis vin pli elektronik. E sa pou fer bann biznes pli fasil e sa pour osi amelyor *ease of doing business* dan Sesel. En size ki nou ti koz lo la isi dan sa menm Lasanble.

Mr Speaker par lefe ki Gouvernman pe aboli CSR, mon pe lans en lapel avek tou biznes pou zot realize ki *giveback* i en lafyerte. I en lafyerte letan ou

biznes in devlope e agrandi dan en pei, e dan en kominote. I pou osi en lafyerte letan ou rann en pe lo kominote.

La mon pou osi profite pou remersye tou bann biznes ki ti rann lapel biro Manm Lasanble distrik Plaisance. Fodre konn ou distrik pou ou moman festivite 2020. E nou pe antisipe ki sa lannen i pou pli o nivo en menm pli o ki montanny Copolia.

Mr Speaker lo sa ki konsern VAT, de pliz-an-zour lavi pe vin pli ser bann manman tousel i trimouse pou fer 2 bout zwenn. Plizyer fwa nou al laboutik e ni en resi nou pa gannyen. E sa i klersi ki bann boutikye pa pe anrezistre sa lavant. An dot mo zot pe zwen trik pou nou, pou zot pa pey sa taks.

Me selman zot pas sa bann *tax* lo konsonmater. E konsonmater li an retour i soufer plis, nou war bann gro *building* ki'n ganny batir partou otour Mahe Mr Speaker. La i fer mon mazin sa enn kot Chena kot Mrs Bastienne in bar li partou. Sa mon pou vin lo la en lot zour.

Konstrir par bann boutikye, menm zot pe konstrir dan bann pri kominoter ki ganny war pou bann Seselwa ordiner. Minis fodre biro SRC i



fer en lodit konplet lo sa bann boutikye pou fer sir zot pey zot taks korekteman.

Minis mon pe propoze ki SRC i investir dan en sistenm ki tou boutikye ava servi e ava konekte direk avek SRC. Sa i ava asire ki Gouvernman i ava anmas byen son *tax*, e tou sa ki fodre i pey taks i pou bezwen peye.

Mr Speaker progresyon nou pei pou selman kapab arive si nou *mindset* i enn ki pozitiv. Nou bann senm bann lenerzi pozitiv pou nou ganny rezilta konstruktiv e inovativ.

Gouvernman pe met bokou lanfaz lo devlopman enformatik pou fer Gouvernman pli efikas. E la i le moman pou nou bann zenn ki pli ofe avek teknolozi inovasyon, pou zot ganny mete dan en sant, tou sa bann sanzman e devlopman.

Mr Speaker dan menm laliny mon pe demann Gouvernman letan i pe fer restriktirasyon, pou revwar kote *NISTI* i pou pli byen siteye.

*A mon avis*, ler mon pe get tou sa bann devlopman antoure, mon war ki *NISTI* ti pou pli byen ideal anba Liniversite Sesel, vi ki i en lorganizasyon li osi ki pe anmas zenn dan sa domenn. Sa i reste en sizesyon.

Mr Speaker apre bokou koze deor lo size koripsyon dan servis piblik bokou dimoun dan mon distrik in soulaze ler in tann nou nouvo Minis nef, dan nou Gouvernman nef, dir priyorite se pou tir labi e aksyon koripsyon dan servis piblik.

La nou pe koz labi depi anba kot sa *housekeeper*, in merit pran antet Mr Speaker ki menm sa savon ki in aste ek larzan Leta i pa pou li.

Sa drayver osi ki pe servi transpor Gouvernman, i merit komans realize ki nou loto personnel nou merit pe realize ki sa i propriyete Leta.

Tou sa pou selman arive si sa ki par lao osi i donn bann bon legzanp zot osi. Tou sa bann koripsyon direk ou endirek pa merit en plas dan sa Gouvernman ozordi ki nou pe dirize. Zot devret kanmi pou apel zot bann travayer servis piblik. E Gouvernman *LDS* Mr Speaker pa pou tolere sa bann aksyon.

Minis in koz lo redwir depans Gouvernman, la i anmenn mon lo Minister Lasante. Dan Staz Komite nou kapab al dan ban detay o pli o profon, me pou lemoman mon anvi fer remark dan bann fason ki sa lazans i kapab fer en pe *savings*.

Parey lo kote servis manze dan ban sant lopital e kontra servis *laundry*. Eski i pa neserer pou revwar sa model dan plas, petet nou kapab depans mwens si nou fer sa bann servis *in house* dan plas *outsource* ki ozordi pe kout plizyer milyon Roupri? Dan ou konklizyon Minis ou ti a kapab donn mwan en pti laliny lo sa.

La mon ti a kontan Minis dan ou konklizyon osi si ou ti a kapab eksplik ek sa Lasanble, ki ou Minister in annan, (eskize mon a rebran sa.)

Dan ou konklizyon osi mon ti a kontan si Minis ti kapab ekspils ek sa Lasanble si dan son Minister i annan en seksyon ki revwar ouswa *monitor* bann kontra bann Minister ek Lazans Gouvernman?

Eski i annan en *unit*, en endividi ki fer sir, ki nou vremen ganny en bon dil ki nou ban kontra ki Gouvernman pe fer, avek bann endividi an deor?

Akoz nou pe demann Seselwa pou fer sakrifis? La mon krwar mon pou kit sa lanmenm Minis.

En lot size ki mon'n vremen soulaze osi in soulaz bokou dimoun dan mon distrik, i sa travay reform ki nouvo Gouvernman pe fer dan benefis ek program Lazans

Proteksyon Sosyal, pou retir depans lo lasistans sosyal, pou bann endividi ki kapab travay.

Lontan ti'n plis ki ler Mr Speaker. Sa ti en labi ki Gouvernman avan ti'n tolere, ler bokou nou ti pe rod en zournen dan soley, lapli, loraz. Letan en serten nou ti pe lev granmaten 3er bomaten pou al rod nou zournen, en bann pe lev 10er pe al pran *welfare*.

Menm dan letan eleksyon sa ti sagrinan pou war sa bann *voucher STC*, mannyer ti pe ganny donner annabondans konmsi napa demen.

Ozordi nou ki pe donn lanmen pou peye. Sa en lenzistis dan limenm Mr Speaker. Mon ser ek frer Seselwa ki'n benefisyer ek sa fasilite fasil ki ansyen Gouvernman ti fer zot kado letan in ariv pou zot leve.

Bondye in kre zonm ek fanm pou travay pou son prop dipen, se sa lafyerte endividi, se travay dir. Be pa i gou letan ou travay apre ou rekolte ou fri apre ou transpirasyon? Sesel i kapab annan en 2 louveraz pou sakenn Seselwa si nou ti kapab anpli sa bann *post* ki bann etranze pe okipe.

Mr Speaker mon ava lans en lapel pou tou dimoun ki santi i annan kouraz pou fer 2 louveraz, pou sezi sa bann

loportinite. Menm si i pa ava en plen tan, e mon swete ki sa bann loportinite a osi *available* pou bann travayer Gouvernman. E sa dan li menm i a kapab ed sa endividi pou li kapab akonpli son bann bi ek rev personnel.

Lo sa menm laliny bann zabitan mon distrik in akey lapel pou en restriktirasyon dan *DPA* ki sa i a fer li vin pli efikas.

Dan sa menm laliny mon osi soulaze pou war ki travay pe ganny fer osi lo sa bann antite Gouvernman ki pe fer diplikasyon.

Sa dan li menm parfwa i anmenn serten lanpayaz e kree fristrasyon. Mr Speaker problemn drog i pe kontinyen aroz nou sosyete, nou distrik Plaisance pa'n ganny eparnye.

E mon felisit zefor ki Gouvernman aktyel pe fer pou konbat sa fleo. Mon lans en lapel pou tou zabitan Plaisance ki zot in vin viktim eroin ek bann lezot *hard drugs*, silvouple pran kontrol lo zot lekor, e non pa les sa bann drog pran kontrol lo zot. Sa i ava ede pou redwir en pe depans Bidze Gouvernman sirtou lo *APDAR*, ki pou 2021 nou pe pey zot R78.4milyon.

Lo size *Air Seychelles* nou'n koz bokou lo sa topik isi

menm dan sa Lasanble, mon pou plito anvi zwenn zot isi dan sa Lasanble kot zot pou vin devan zot Bidze. La mon annan plizyer kestyon ki bann zabitan Plaisance in donn mon pou met devan zot e pou rod en pe laklerte.

Mr Speaker sa wikenn ki'n fek pase mon'n ganny plizyer kout telefonn. E mon'n osi aprann bokou vokabiler zoure dan lalang Kreol Seselwa. Sa mon krwar in menm kas rikord diksyonner Mrs Bertha, manman Staniella anler Belvedere.

Friustrasyon sa lalis in ganny *FA4JR*, sirtou bann ki ti vreman bezwen sa lasistans ki pa ti gannyen pou le senp rezon, akoz zot ti pe siport *LDS*.

Bokou kestyon bann rezidan in met devan mwan, sirtou lo bann fason ki bann laplikasyon ti pe ganny *vet* avan peyman i ganny donner.

Lekel ki ti donn dernyen lord Minis? Mon ti a kontan ou donn nou sa osi. La ou a krwar dan ou repons Minis ti ava bon ki ou senm en pti pe lalimyer an bref lo sa. Akoz tro bokou dimoun an deor pe rod leklersisman.

E mon'n menm ganny dir osi, si nou war sa lalis ki ti donner dan Septanm 2020 a Oktob nou kapab tonm sek!

Selman en Manm *FPAC* mon pou napa swa. Si fodre manz karanbol pou tenir mon tansyon mon pou bezwen fer li.

Mr Speaker pou terminen mon anvi dir avek pep Seselwa espesyalman zabitan Plaisance. Wi Mr Speaker, se distrik lentelizans avek en lentelizans enorm. Sa pa dan tou distrik ki annan mon krwar, mon krwar tou bann lezot Manm i ava aksepte.

Gouvernman in prezant en Bidze R11milyon pou sa etidyan ki pe lekol. Mesaz ki mon annan pou ou, pran ou ledikasyon o serye, akoz ou lavenir i depan lo ou lenportans ek sakrifis ki ou fer anver ou ledikasyon. Pa ler zwe ouswa donn latet fermal bann ansennyen.

Sezi tou loportinite ki'n ganny met an plas. Pou ou sa fermye ek sa peser enplor posibilite pou agrandi zot biznes pou kre pis prodiktivite. Gouvernman in met an plas bann *Scheme* Finansman. Avans devan e fer zot biznes bouz pli devan pou ou sa enn ki ti krwar lapares i en louvraz permanan, leve e al travay.

Kot nou pa kapab fer en bout zwenn, Gouvernman i ava asiste ou, anba son program *Social Safety Net*, kot en sonm 77.8milyon in ganny bidzete.

Pou sa travayer servis piblik, travay avek lanmour pou zot louvraz. Travay pou deservi tou Seselwa.

Pou ou sa vyeyar, ou sekirite in garanti. Mr Speaker sa Bidze pa'n kit person ater. E sa Bidze kontrer i pe anmenn lespwar pou Lepep Seselwa.

Pou terminen Mr Speaker ankor enn fwa mon ti a kontan dir Minis ek ou lekip mersi pou sa Bidze. Mersi.

**(APPLAUSE)**

### **MR SPEAKER**

Mersi Onorab. *LDS* in demann en pti sanzman lord dan zot dimoun ki koze. Onorab Monthy pou pran plas Onorab Esparon. Onorab Monthy.

### **HON PHILIP MONTHY**

Mersi Mr Speaker. Bonzour Mr Speaker. Bonzour tou Manm Onorab, e bonzour tou zabitan cascade.

Mr Speaker mon pou tou dabor konmanse par felisit Minis Hassan, *PS Thesee*, *SS Payet* avek zot lekip teknisyen pou sa travay difisil me tre enportan ki zot in fer.

Legzersis prepar Bidze pou en pei, menm si mon pa en *expert* dan Finans, mon konnen ki i pa en latas fasil. Sa latas ki Minis ek son lekip in

antreprann sa lannen, in vin pli difisil ankor avek sa pandemik ki lemonn antye pe fer fas avek.

Sa enn kriz i enn pli sever ki sa pei in deza fer fas avek. Me pa zis sa Mr Speaker, louvraz Minis in ganny rann pli konplike ankor. An rezilta sa bann bal ki sa Parti *US* in donnen dan nou larzan pandan sa bann dernyen lannen. Mon pou zis sit detrwa legzanp kot *mismanagement* in arive; *rent* pou bann *staff* Gouvernman 125milyon par an.

*Rent* pou bann lofis Gouvernman 187milyon par an.

Sekirite pou bann propriyete Leta 195milyon par an.

*Part rental* 1milyon par mwan.

*Board allowance* 36 milyon par an.

Sa zis pou sit enn de Mr Speaker. E mon rekonforte ler mon ekout Minis pou aprann ki sa bann labi pe al ganny adrese. Zot bann aksyon iresponsab e desizyon popilis ki zot in pran zis avan dernyen eleksyon, in fer ki sa pei i lo son zenou ozordi.

Mr Speaker, mon pa en spesyalis dan lagrikiltir. Me kantmenm sa mon konnen ki ler ou annan ou en plant, ki son bann fey in mir e pres pou tonbe, ki son brans in pouri, i

konseyab pou koupe, ki fer ki sa plant i ganny plis nitrisyon e i rezenere Onorab Cosgrow.

Mr Speaker, ki mannyer ou kapab pandan en letan kot pei i sipoze napa larzan, kot sa ki pli vilnerab pe trimouse pou fer viv zot fanmir, sa Gouvernman *US* li i ti pe profite pe aranz son bann dalon avek bann gro kontra.

Ki mannyer en pei ki sipoze premye dan Lafrik dan plizyer domenn, parey zot ti abitye envant zot lekor ler zot ti lo pouvwar. Selman detrwa latant nou ti napa. Sa ti zis bann manev byen kalkile pou vol larzan sa pep.

Mr Speaker, ti pran Prezidan Ramkalawan ek Vis-Prezidan Afif zis detrwa erdtan negosyasyon pou tir nou pei dan sa pirog nanm. Kot milyon par mwan ti pe al dan pos dalon.

Apré zot a ganny lodas vin dir avek sa pep, ki sa Gouvernman pa enterese avek sa ki pli vilnerab. Ler zot ti bizi pe anrisir zot lekor, zot dalon, zot fanmir, eski zot ti mazin sa bann ki pli vilnerab zot? Minis in vin prezant nou en Bidze avek en defisit plis ki R3bilyon. Ki vedir Gouvernman pou bezwen al rod prete sa sonm larzan, pou kapab finans depans pei.

Onorab Lemiel, si ou parti ti enn atraver ou Mr Speaker, si ou parti ti enn, atraver ou Mr Speaker, ki ti onnet e serye, nou pa ti pou bezwen al rod prete sa kantite larzan ozordi.

Alors Mr Speaker, mon bezwen demann mon bann koleg *US* lo lot kote latab, kote pei pou ganny larzan pou kontinyelman mentenir sa bann labi kot sistenm *welfare* ek *URS*, ki'n egziste anba sa sistenm koronpi?

Mon ti a kontan ki pep Seselwa i met sa byen antet. Gouvernman napa ase larzan pou depanse. Nou napa swa, me pou nou vin pli responsab dan lafason ki larzan piblik i ganny zere e depanse.

Si Gouvernman pa fer sa, nou pou dan plis problem ankore. Mon bann ser ek frer Seselwa. Mon rekonforte kantmenm sa, ler mon war sonm ki'n ganny prevwar dan sa Bidze pou lasistans sosyal. Sa i vedir ki sa ki pli vilnerab pou kontinyelman ganny asiste.

Diferans ki pou annan, se ki pou nepli annan labi. Sa ki vreman dan bezwen, a ganny asiste. Mon pou profite osi pou demann Minis pou fer tou sa ki i kapab, ansanm avek Labank Santral, pou sey negosye e trouv en solisyon pou bann

dimoun ki pe war li difisil pou pey zot *loan*, sirtou *loan* lakaz.

Mon konnen ki i deza annan serten negosyasyon lo baz endividyel ant bann Labank Komersyal ek zot bann kliyan. Me si annan okenn lenstans kot Minister Finans ek Labank Santral i kapab osi aport zot kontribisyon, mon ti ava apresye. Akoz mon annan plizyer zabitan ki pe pas dan sa difikilte.

Mr Speaker, nou pep pa devret les nou ganny anbete avek bann parol vid, ki nou tande sorti lo sa lot kote latab. Zot koze konmsi pei pe fer byen ekonomikman. Ki lakantite touris ki pe frekant nou pei, pe kas rikord.

Zot prop Minis Finans e kandida Vis-Prezidansyel dan dernyen eleksyon ti fer kler dan en *interview* avek lapres. Kot i ti deklare ki trezyenm mwan saler pa garanti pou 2021. E ki i annan menm posibilite ki lapey travayer i ganny koupe. Me ki nou ti war ler nou ti pe fer deba pou anil trezyenm mwan saler Mr Speaker?

Annan Onorab dan Lopozisyon ti pres pou defons latab, kot nou ti ganny akize ki nou napa zentere Seselwa e sirtou bann ki pli vilnerab a ker.

Mr Speaker, dan sa Bidze ki Minis in prezante, i fer

provizyon pou lapey tou travayer dan sekter piblik.

**(APPLAUSE)**

**HON PHILIP MONTHY**

E Menm, pou bann travayer *Air Seychelles*. Mr Speaker, ler mon'n ekout Minis, i fer mwan apresye sa sanzman le 24 Oktob plis ankor. Akoz mon war ki finalman sa pei in ganny en Minis Finans ki aktyelman konn konte, e ki annan en lespri inovativ dan sekter ekonomik e finansyel, kontrerman avek sa ki nou'n konnen oparavan.

Finalman sa pep i kapab konmans santi sa nouvo divan ki pe tap lo zot, akoz i kler ki sa bato in fini vire. Mon war ki sa lekip se enn ki pe fer zot travay an tout liberte, san okenn presyon politik sorti *State House*.

Parey ti le ka an 2020, ler plizyer zot ti kont sa bann desizyon politik ki ti ganny pran anba sa Fame *Scheme FA4JR*. Me ti napa lot swa, apard zis obeir. Zot ti pe mazin byennet pei avan byennet politik. Sanmenm sa ki apel profesyonnalizm. Mon annan antyerman konfyans dan zot abilite e entegrite konman gardyen nou lasyet manze.

E Mr Speaker, i tris ler ou vwar en swadizan *Leader*, ki olye rekonnnet travay dir ki sa lekip kot Minister Finans in fer, i swazir pou vin atak zot. Sanmenm sa bann dimoun ki pe enspire pou diriz pei en zour sa?

Mon rekonforte ler mon mazine ki sa pep pa pou zanmen les sa arive. Bidze ki Minis in prezante, i enn ki pe anmenn bokou lespwar pou sa pep, menm dan sa moman difisil e enserten.

Minis pa'n vin anons en bann mezir popilis dan laform bann zoli parol dan zorey nou pep. Me ki kit en gou anmer pli tar dan nou labous ler larealite i arive.

Mr Speaker, sa Bidze i enn ki pe relans nou lekonomi. *COVID* pa *COVID*, pei pa ti pou kapab kontinyen avek sa menm fason ki son lekonomi ti pe ganny zere. Ou pa kapab pe kontinyelman fer menm aksyon, me espekte ki ou pou ganny en rezilta diferan. Non, i pou enposib.

An dizan sa Mr Speaker, mon pou osi dir ek Minis ki bann pti lanpir ankor pe kontinyen dans serten Minister ek lenstitisyon piblik.

Mon konnen ki deza bokou in konmans ganny fer pou kas sa bann pti rwayonm.

Me fodre pa ki nou aret la, aköz se resours Leta ek larzan piblik ki pe ganny abize.

Bann Direkter Resours Imen dan bann Minister ek Departman Gouvernman, fodre fer zot travay dan en fason pli drwat e zis. Sa ki pe abiz larzan Leta silvouple, arete. Zot bann rikord i sipoze a zour e kredib. Tou travayer i sipoze pran zot konze anyel parey i presize dan *PSO*.

Mr Speaker, ou pa kapab annan bann sityasyon kot en anplwaye i akimil ziska 200 zour konze. E ler i pran son retret i pe ganny peye akout 150, 200 e menm R300mil pou sa bann zour ki in akimile.

Mr Speaker, sa i enn bann Pratik ki'n popiler dan plizyer Minister, e ki posibleman ankor pe kontinyen. Alors mon pe fer en lapel avek Minis pou get byen e fer sir ki sa kalite pratik koronpi kot nou resours pe ganny abize i arete. E dan lenstans kot sa in arrive, si annan laprev, mon sipoze sa i bann ka ki *FPAC* a kapab get ladan.

Mr Speaker, sa Bidze ki Minis in prezante i enn ki pe fer nou sorti dan nou *zone* konfor e fors nou re envant nou lekor. A sa moman kot nou ete la, se sa ki nou bezwen. En transformasyon, me pa en

Bidze tranzitwar parey nou'n tann dir.

Zot in sourd lo nou ler nou bann *Leaders* ki ti dan Lopozisyon sa letan ti pe koz lo diversifikasyon nou lekonomi. E La ki nou pe war, a en moman kot reveni total ki sorti kot nou Sekter Tourizm in konsiderableman desann, se nou Sekter Lapes ki pe anmenn plis *forex* dan pei.

Mr Speaker lafason ki sa Gouvernman *SPPF/ US* in zer nou lekonomi, in kontribye pou sa difikilte ki nou war nou ladan. Zot pa'n war li nesese pou maksimiz reveni ki nou ti kapab pe anmase avek nou bann resours.

Si olye zis al fer kado Linyon Eropeen nou pwason, pli presizeman nou ton. Zot ti'n omwen annan kouraz ek lasazes pou negosye en pli bon *deal* pou Sesel. Nou ti ava pe santi nou en pti pe pli byen, fas a sa moman difisil ki nou pe pas ladan.

Apré zot a ganny lodas vin demann nou ki'n arive avek re negosyasyon Lakor Lapes avek Linyon Eropeen. Mr Speaker, tipikman *US*, zot antonn zot ta bannann mil, apré zot anvoy lapo lo nou.

**(APPLAUSE)**



**HON PHILIP MONTHY**

Mr Speaker, Slogan *US* dan dernyen eleksyon sete Koste pou Sesel. Si in annan en moman dan listwar sa pei kot nou devret pe solider ek kanmarad parey sanson i dir, se sa moman la.

Ler mon war sitan negativite ek laenn sorti kot Lopozisyon, i kler ki sa ti zis en slogan vid pou bat latet Seselwa. Me non pa sa ki ti vreman dan zot leker. Erezman sa pep pa'n tonm dan sa latrap. Ler apre zis en miting lo Komite *Platinum Leader* Lopozisyon i deside sorti. Ler nou war zot pe *boycott* vaksen, e apre pas anba, anba pou al pran, ou war klerman ki zot lentansyon.

Ennler ou ava krwar zot pe priye pou ki la kantite ka *COVID* i ogmante. Mon annan lenpresyon ki zot kontan ler la kantite lenfeksyon i ogmante, e ki zot dezapwente ler i desann.

Zot pe kriy *lockdown*, Selman zot konn tre byen ki ekonomikman sa pou en move desizyon pou nou pei. Kwa, zot anv i ki pei i faid? Apre ler ava napa larzan pou enplimant bann depans Gouvernman pou pey travayer, dimoun a revolte e zot dezir ava akonplir?

Mr Speaker en keksoz ki mon anv i mon bann koleg i konpran tre byen. Se ki pou

napa ankor okenn Koudeta dan sa pei, dan nenport ki laform.

**(APPLAUSE)**

**HON PHILIP MONTHY**

Mr Speaker sa parti *US* i krwar sa pei i zis pou zot. Zot krwar zis zot ki'n konn dirize.

Sa zafer avyon i pase, bato i pase, sa ki pa kontan ale in fini sa. Prezidan Ramkalawan i *State House* akoz sa pep ki'n swazir pou met li la. Sa pep in fatige avek zot, e zot pa pe ed zot parti avek zot bann siporter, lafason ki zot in swazir pou konmans zot parkour konman en Lopozisyon.

Me Mr Speaker dan en sans mon kapab konpran, zot nouvo dan sa rol e donk i pran letan pou zot adapte avek zot nouvo fonksyon. Be mwan mon pou dir zot pa trakase. Letan pou zot abitye avek zot nouvo responsabilite zot pou annan.

Akoz zot pou la pou en kantite letan ankor. E tasyon osi en lot parti pa vin ranplas zot. Tousala, *comme* dir manrmay.

Mr Speaker annan manm Onorab ki'n koze ki'n dir Gouvernman pe met sityasyon ekonomik avan nou sityasyon lasante. Sa i konpletman fo Mr Speaker.

Ler ou war ki Sesel i enn bann premye pei o monn kot popilasyon pe ganny vaksinen, i montre ou klerman ki ankor enn fwa, *US* pe zis sey vin bat nou latet.

Ler en zournalis dan en konferans lapres ti demann Dr Gedeon si zot pe ganny bokou presyon politik sorti *State House*, lo la fason ki sa sityasyon *COVID* i devret ganny zere, ki i ti reponn?

Mr Speaker Dr Gedeon ti dir non, e mon pou *quote* li, i ti dir; “O kontrer, nou pe ganny bokou sipor politik, e sa nou apresye”. Se sa ki Komisyoner Lasante Piblik ti deklare lo televizyon nasyonal.

Sa zafer ki Gouvernman pe enterfer avek travay Minister Lasante, i ankor zis en lot mansonz malisyè sorti kot lopoziyon parey zot labitid.

Atraver ou Mr Speaker mon pou dir sa Onorab ki sa 2 keksoz i mars ansanm. Ou pa pou kapab annan enn san lot. Ki lasante ki nou pou annan si nou lekonomi i zero?

Zot in sitan anmenn sa pei, kot trwa kar prodwi ki nou konsonmen nou bezwen enporte. En pep ki mal nouri, ki lasante ki i pou annan? Kote nou pou ganny larzan pou fer vini latizann? Pou pey ners,

dokter, avek tou lezot bann profesyonnel lasante?

Mr Speaker mon gran zanmi lekol Onorab Uranie in deklare dan son entervansyon, ki parler i krwar ki Gouvernman i anvi ekstermin pep Digwa. Be Mr Speaker mon annan sa pou mwan dir Onorab Uranie.

Dir nou, e dir pep Digwa lekel ki ti donn ou sa kargezon mas pou distribye avek dimoun La Digue? Si Sete pa lot ki Prezidan Ramkalawan? Akoz Sesel i pou tou son zanfan, e pep Digwaz osi i bann zanfan Sesel. Mon zis demande, si tou sa mask in aktyelman ganny distribye.

Ler Linyon Estate ti pe kontinyelman fer defisit dan son looperasyon, kot reveni ki ti pe ganny ramase lo baro, pa ti koresponn avek la kantite viziter ki ti'n vizit sa landrwa.

Lekel ki koman *Chairman FPAC* ti pouse pou ki i annan en reform e lord dan tousala? Ki nou'n war apre? Pou premye fwa dan plizyer lannen, Linyon pe fer profi e sa pe benefisye bann Digwaz direkteman.

Mr Speaker nou rapel sa travayer ki ti pe travay Linyon Estate pandan plis ki 30an me ki ti ankor pe ganny zis R5mil? Sa ti en krim sa Mr Speaker. Oule dir mwan Prezidan pa

kontan dimoun La Digue menm?

Si apre 43 an Mr Speaker parti Onorab Uranie pa'n kapab donn zabitan La Digue en lopital. E dan zis detrw semenn lo pouvwar, Prezidan Ramkalawan in kapab ganny finansman pou fer sa lopital ki pandan bokou letan bann Digwaz pe espere. Mon pou dir ou, atraver ou Mr Speaker byensir, ki se pa LDS ek Prezidan Wavel Ramkalawan ki oule ekstermin bann zabitan La Digue. Mon a les zot zize pou zot menm. Akoz sa zonm ki pe asize anler *State House* son lanmen i prop li. Seselwa i konn tre byen lekel ki ti profesyonnel dan ekstermin dimoun.

Mr Speaker zot pe pres *lockdown*, selman apre zot menm ki konplent tou laboutik pe fermen lo La Digue. Zot konplent ki napa travay dan tourism apard zis 10 *vacancy* dan servis piblik.

Be Mr Speaker, eski en *lockdown* pou anmenn plis biznes avek plis travay dan sekter prive? Vre ou war sa bann dimoun in fini bite. Mr Speaker ennler mon demann mon lekor si zot zorey i tande sa ki zot labous pe dir. Pep Seselwa, en *lockdown* pa solisyon nou problem a moman aktyel ki nou ladan.

Mon'n ekout atantivman Dr Sanjeev ek Dr Tirant lo *News Extra* Vandredi pase. E mon pou siport zot dan zot lapel pou ki nou tou nou pran nou responsabilite.

Minister Lasante tousel avek Gouvernman, pa pou kapab fer desann bann ka lenfeksyon, koze par *COVID* dan Sesel.

Sa i bezwen en zefor kolektiv, kot nou tou nou pran nou responsabilite. Akoz Lapolis napa ase resours pou annan en prezans partou dan bann kominote.

Si nou anvi reganny serten normalite dan nou bann aktivite kotidyen, e fer ki ptitapti nou lekonomi i relanse, nou pou bezwen konmans aprann ekoute e swiv bann direktiv sorti kot Minister Lasante.

Mon pou profite pou lans en lapel avek tou zabitan mon distrik Cascade. Spesyalman bann manrmay ki frekant kot bazar, pou obzerv sa bann mezir e pou fer sir ki ka lenfeksyon dan nou distrik i desann.

Se pou sa rezon ki mon'n swazir pou limit mon prezans dan kominote. En desizyon ki pa'n fasil, akoz mon en dimoun ki kontan lo teren e rankontre mon bann zabitan. Zabitan

Cascade, wi nou pe pas dan en moman difisil e ensernten.

Me si i annan en lekip ki pou kapab tir nou dan sa tanpet ki nou pe pas ladan, se pa lot ki sa enn ki pep Seselwa ti an mazorite swazir le 24 Oktob e personn ankor.

Ser, frer Seselwa. Sa sityasyon ki nou pe pas ladan pou amelyore. Akoz i touzour annan botan apre tanpet. Annou alors pa les bann profet ki vin anons zis bann kalamite pou fer nou per.

Mr Speaker, mon rekonnet ki Bidze ki Minis in prezante pa fer provizyon pou nouvo devlopman dan distrik, apard bann proze ki ti'n deza demare.

I enportan alors ki mon met a latansyon Minis, ki son Minister pou bezwen get byen serten proze ki ti'n deza demare dan mon distrik, e ki pou kontinyen.

Bann proze semen ki ganny fer pou benefisye zis enn oubyen de fanmir, pandan ki plizyer lezot fanmir dan sa menm landrwa i ganny kit ater. Mwan pou mwan sa pa akseptab.

Dan sa moman kot resours i limite, nou pou bezwen fer sir ki sa bann pratik i arete. E mon donn tou sa bann fanmir ki pa pe benefisye avek

sa semen an kestyon, mon langazman, ki mon pou fer sir ki zot lavwa i ganny tande e ki en desizyon i ganny pran lo sa size.

Mr Speaker mon pou relans lapel avek bann biznes prive pou renouvle zot langazman, pou kontinyen kontribye dan devlopman nou distrik. Mon remersye tou bann ki'n ede e ki kontinyen pe ede ler nou tap zot laport.

Kot Gouvernman i *fall short*, nou, nou ava kapab antre pou fer sir ki nou distrik i kontinyen bouze. E mon pou demann zabitan Cascade pou annan en pe pasyans.

Mon lans en lapel avek tou mon bann zabitan e pep Seselwa, pou annou leve e adopte en latitud travay dir. Annou pa zis espere ki nou ganny ede. Me ki nou sey ed nou lekor avek nou fanmir. Nou pou bezwen konn nou priorite.

Nou'n toultan tann nou bann granmoun koz lo met larzan de kote pou letan dir. Mr Speaker, letan dir i la. In arive, san ki nou'n envit li. Nou bezwen alors montre ki nou en pep ki rezilyan, parey nou'n toultan ete.

Akoz si nou'n kapab sirviv 43an anba en ladministrasyon SPUP/ SPPF/ Lepep/ US, mon sir e serten ki nou pou sorti dan

sa sityasyon, e pei pou vin pli for e pli prospere ankor.

Akoz anba direksyon nou Prezidan, resours sa pei pou al dan pos tou Seselwa, me pa dan kont zis en pti group. Mr Speaker konman en kretyen, mon pan touzour en pratikan. Me sa rezilta dernyen eleksyon, e sirtou sa laviktwar Cascade, mon'n war ki i bezwen annan en lafors siprenm.

Mon alors priye, pou ki Bondye i beni nou pei avek tou nou zabitan. Ki i kontinyelman donn lafors avek lasazes nou Prezidan pou kontinyelman pran bann desizyon ki pou benefisyé nou pep.

Prezidan Wavel Ramkalawan i en Prezidan ki annan en leker pou tou Seselwa. Akoz Sesel i tou senpleman pou tou son zanfan. Mersi.

**(APPLAUSE)**

**MR SPEAKER**

Mersi Onorab. Wi Onorab Pillay.

**HON SEBASTIEN PILLAY**

Mersi Mr Speaker. Mon remersye Onorab pou son diskour. Selman mon le fer en pti klarifikasyon aköz pangar i *mislead* Lepep Seselwa. Mwan ek mon parti nou pa'n zanmen

*boycott* vaksen. Mon pou dayer profit loportinite pou *remind* tou dimoun ki bann *staff* Lasante pe fer tou posib pou donn bann dezyenm doz vaksen. E tou ki kapab ale al fer li pou nou asir proteksyon nou pei.

E en lot klarifikasyon ki mon le fer Mr Speaker, se ki mon en pti pe konsernen ki si mon pou apros Gouvernman e pou travay ek Gouvernman, bann deskripsyon mon karakter ki mon pou gannyen, se ki swa mo en lisyen koup lake, swa mon'n taye. Sa pou mwan i montre en larogans lo lapar Gouvernman. E mon ti a kontan ki Minis i pran sa an kont. Mersi pou ou permisyon pou mon kapab fer sa Mr Speaker.

**MR SPEAKER**

Mersi Onorab. Mersi pou ou premye pwen. E lo ou dezyenm pwen mon krwar nou'n dil avek. Mersi.

Onorab Monthy eski ou pe rebran lo la? Mon krwar nou kapab pase. Onorab Loze.

**HON JOHAN LOZE**

Mersi Mr Speaker. Bonzour Mr Speaker e tou dimoun a lekout. Mr Speaker, dan tou pei en Lopoziyon i annan li en rol e en fonksyon pou li deservi. Mon war li drol alors ki sa menm

Lopozisyon ki'n Lopozisyon pandan 30an, ozordi letan ou pe deservi menm rol e fonksyon ki zot, zot ti annan pou fer. Zot dekrir ou koman negativ, e tou sord lezot kalite term ankor. Me selman sa i zot swa.

Mr Speaker, tou keksoz ki komans byen, i fini byen. Alors, mon pou komans mon lentervansyon koumsa. "Tanzantan dan liniver, en fenomenn i arive ki sirprann bann ki alert, e ki emervey sitwayen later. Se bann fenomenn rar, kot tou planet i alinyen dan en sel direksyon e sanzman pozitif dan en fason ou en lot, i son rezilta.

E tanzantan Mr Speaker, menm fenomenn i arive dan listwar en pei. Kot i paret ki dan en fason, tou keksoz i tonm byen, enn i swiv lot, konmsi i ti'n ganny planifye koumsa. Enn i ranforsi lot, oubyen eksplik lot, avek rezilta ki en plan byen kordonen i komans aparet. Parey en soley ki pe leve, e ki pe, a pe, lalimyer i grandi.

En parol ouswa en aksyon, ki ti'n ganny dir en pe avan, i pran en lot lanpler, e nou rekonnet ki sa ki ti paret en seri aksyon endepandan, i en aksyon byen kordonen. Par en lekip ki pe koz menm parol, e ki pe lir menm lekritir."

*Maitre* Bernard Georges, Vandredi 19 Fevriye. Fen Sitasyon.

I napa okenn par dan sa sanson ki Onorab Georges in sante kot i reflekte ki negligans son Gouvernman in touy 11 ou plis nou frer avek ser Seselwa avek *COVID-19*. Ofet, pou dir laverite, nou, Lepep Seselwa, nou pa konnen konbyen dimoun ki'n perdi lavi avek *COVID* Sesel.

Nou ganny dir par manm fanmir konmkwa ki serten zot pros in mor avek *COVID*, me ki statistik pa'n reflekte sa ka lanmor. E ki zot menm montre nou sertifika lanmor, kot lo la i ekri an nwanr e blan, "*disease or condition directly leading to death (A) respiratory syndrome (B) COVID-19.*" Me fanmir i dir ou, ki sa bann ka pa'n zanmen ganny anrezistre koman ka ofisyel *COVID*. Sa nou pa konnen, me i annan en kantite lensertitid parmi bann fanmir Seselwa ozordi deor.

E se dan plen milye tou sa *chaos*, ki Onorab Georges in vin sant nou son pti sanson la anndan Vandredi bomaten. 11 dimoun in mor avek *COVID* Sesel. E sa se pirman par negligans zot Gouvernman. Eski Onorab Georges pe sey dir nou ki sa i en aksyon byen kordonen, par en lekip ki pe koz

menm parol, e ki pe lir menm lekritir?

En 100tenn Morisyen ou plis, nou pa konnen, in sipoze antre pou komans travay kot en lotel Ste Anne. Eski se sa ki Onorab Georges i dekrir koman en fenomenn i arive, ki sirprann bann ki alert, e ki emervey sitwayen later?

5mil nou bann frer avek ser ki ti lo *FA4JR* pe al ganny fout a laport, konmsi sak salte. Eski sa, sa sanzman pozitiv, dan en fason ou en lot, ki Onorab Georges ti pe koz lo la?

*Single mothers* ki lo *URS*, pe antre lakaz avek zis lanmwaye lasyet manze pou donn zot zanfan, gras a sa lanmwaye saler *LDS*. Eski sa, i sa menm fenomenn ki arive dan listwar en pei kot tou keksoz i tonm byen Onorab Georges?

Sa zabitan Bel Air ki'n tous son dernyen lasistans *welfare* depi Desanm, in ganny anvoye kot lanplwa depi lafen di mwan Zanvyé, sa menm lanplwa kot person pa ti pe reponn son telefonn. E son 2 zanfan in preski mor lafen pandan 2 semen. Sa i bezwen sa bout kot ou'n dir nou, tou keksoz i tonm byen, enn i swiv lot, konmsi tou in ganny planifye koumsa Onorab Georges.

Paran avek zanfan pe ganny met deor dan lakaz, akoz sa lasistans *part rental* ki zot ti pe touse in disparet e evapore. Eski la Onorab Georges ou pe dir nou ki, enn i ranforsi lot, oubyen eksplik lot, avek rezilta ki en plan byen kordonen i komans aparet?

Rezilta sa Gouvernman *LDS*, se ki zot in pran lespwar sa Nasyon Seselwa, zot in met li dan en poban, e zot in al zet li dan en fon blan. E se pou sa rezon ki nou war ki Onorab Georges in bezwen vin sant en sanson. Sa *speech* Onorab Georges in zis parey letan ki ou pran en boug lakademi bann gran FlonFlon de *Paris*, e ou met li ansarz kiltir Kreol Seselwa, e ou kit ater tou sa ki'n pas zot lavi antye pe defann sa menm kiltir Kreol Seselwa.

Zot in konpletman dekonekte avek la realite Sesel, e sa bann sanson lakademi FlonFlon de *Paris* ki zot pe sante isi dan sa Lasanble, pe zis ganny fer an defans Bidze pli las, ki sa pei in zanmen deza trouve.

*COVID-19* i posed en partikilarite ki okenn lot maladi napa. An mazer parti, lamazorite ka lanmor i ariv dan Sant Izolasyon, antoure par zis bann profesyonnel lasante, e ni fanmir, ni popilasyon pa

zanmen war lanmor *COVID* avek zot prop lizye. Sa i fer ki nou'n devlop en tandans pou dekonekte nou emosyonnelman avek sa bann ka lanmor *COVID*.

Nou pe regard zot zis koman bann statistik, e lamazorite dimoun Sesel ozordi i dir ou, zis 10 ou 11 ka lanmor. Lamazorite dimoun ki pe mor avek *COVID*, zot pe sikonb avek detres respiratwar, zot pe literalman noye dan zot bann prop *fluids*, e zot touse an mor. Eski ou kapab mazin en dimoun aze pe touse *nonstop* 24 lo 24, kot i touse ziska i tous disan e menm bann partikil son prop poumon.

Eski ou kapab mazin douler pe touse 24 lo 24, e an menm tan pe konbat pou respire, akoz ki ou poumon in plen avek likid? Sa ki mon pe dekrir zot i en lanmor fermal, i en lanmor kriyel, i en lanmor konpletman initil, e evitab. Si zis Dirizan *LDS* ti'n met akote son lantetman, e restrikte mouvman a lafen Desanm letan ki zot ti'n premye konpran ki sa bebet ti'n sape, e ti dan kominote. Lanmor ti pou'n ganny evite.

Si zot ti'n ferm pei a lafen Desanm, ozordi pei ti pou'n reouver san lafreyer, e nou tou ti pou pe sirkile libreman. Me avek nou prekosyon, personn

pa ti pou bezwen maltret Seselwa konmkwa ki i pa pe pran son responsabilite, e son prekosyon.

2400 ka *COVID*, an ezans pou 1400 touris, pa fer okenn sans ekonomik pou mwan. O fet, sa i en lensilt pou fanmir sa 10 dimoun ki'n mor avek *COVID*. Me pli pir ankor, mon pa war okenn provizyon dan sa Bidze kabri dan sak pou soulaz detres bann fanmir ki'n perdi zot pros avek *COVID*.

En Gouvernman ki pe kontrol en fon, ki pe anmas larzan *non-stop* lo non *COVID*. I konpletman oubliye pou pran ka avek bann ki pli ganny afekte avek neglizans *COVID* sa menm Gouvernman. En lanterman *COVID* i kout R22 mil, tir R25mil dan sa fon *COVID*, e donn sak fanmir ki'n perdi en pros atraver zot neglizans e lantetman. Tir zot en bon leson ladan, e priye ki tousala i fini lanmenm.

Ozordi Sesel nou annan dimoun ki'n ne avek en kwiyer lor dan son labous, ki oule vin *lecture* travayer Seselwa, konmkwa ki i bezwen pran nenport lanplwa. Sa ki'n ne lo en kousen, pe sey dir avek sa ki pe rente lo en ros lavi pou batir sa pei, ki mannyer ki li ki i pou fer son kontribisyon dan sa pei.



Ozordi dan sa pei, ou annan ou en Minis Lanplwa, ki ni lanplwa pa konn prononse. Minis i dir 'lanpwa'. E ler mon get zot lapros ...

**MR SPEAKER**

Onorab silvouple i pa akseptab pou ou kritik mannyer Minis i koze. Silvouple *retract* e kontinyen.

**HON JOHAN LOZE**

*Retracted.*

**MR SPEAKER**

Mersi.

**HON JOHAN LOZE**

Bidze kabri dan sak pa pe fer okenn provizyon pou kreasyon larises, *it is as if* larises pou kre son lekor. Be kote ki ou pou ganny sa fame lanplwa? Kreasyon lanplwa normalman ganny *driven* par kreasyon larises, *if anything*, kreasyon larises pou al retresi la atraver bann mezir ki zot pe pran.

*LDS* pe sey anmenn sa deba lo lanplwa lo en nivo ki nou pou bezwen asize e diskite si Seselwa, pou anmas salte oubyen non. Akoz se sa bann largiman ki zot in komans vin avek, konmkwa ki ozordi Seselwa pa oule anmas salte. Mwan mon napa problemm avek Seselwa anmas salte, me

egalman mon napa problemm avek Seselwa fer etranze anmas salte.

Sa ki mon annan problemm avek, se en etranze ki pe fer Seselwa anmas salte dan son prop pei. Anba kondisyon normal, mon pa krwar ki i en problemm pou en Seselwa anploy 4 Azyatik pou fer marse son biznes, e sa direksyon ki nou pou bezwen komans al ladan. Kre plis loportinite pour Seselwa leve, e fer son bann rev vin vre.

Si ou, ou konnen ki ou, ou pa le ou prop zanf an al anmas salte, aret vin avek bann largiman zeneralize konmkwa ki travayer Seselwa pa oule anmas salte. Me plito kre plis loportinite pour Seselwa anrisir son lekor, e permet li, sa Seselwa pou kre plis lanplwa, atraver kreasyon larises.

Solisyon pou tou problem Sesel, i dan lanmen sa pep Seselwa li menm, zis kre loportinite, e debout get li kot i debourye.

Sa Bidze kabri dan sak, i enn ki konpletman enkonpreansib pou mwan. Sirtou la, dan sa letan ki nou ladan. I paret ki pandan sa 3 mwan ki'n pase, i annan keksoz ki'n ganny *inserted*, ouswa ki'n ganny tire dan Bidze par kelken byen o plase. E menm Minis,

avek tou son bann teknisyen in ganny ordonnen pou pa touse sa bann keksoz.

Sesel i retrouv son lekor dan en leta kriz ekonomik total, e olye pous pou en kreasyon larises enorm dan sa pei. Sa ki nou war Gouvernman pe fer, se ki zot pe koup lo depans, par koup, koup malere.

Mon ti ava konpran zot polisi osterite, si bann mezir osterite ti pe aplik partou, *across the board*. Me non, Gouvernman pe aplik osterite lo malere, me an menm tan i pe ogmant son prop Bidze e depans. Avek en sel pwa, sa Gouvernman in trouv li en fason pou ganny 2 diferan mezir;- enn pou malere, en lot mezir konpletman diferan pou son lekor, e pou sa bann ki annan.

Bon, les mwan soumet en propozisyon, Minis. Minis Pran Cap Ternay, pran Cap Ternay antye, *sub divide* dan bann diferan *plots*, e donn sa bann *plots* avek bann devloper Seselwa, ki pare, ki kapab, e ki anvi fer bann pti *guesthouses* ant 5 a 9 lasanm.

Letan ki mon dir ou donner Minis, mon le dir donner. Donn Seselwa son later, pour en *peppercorn sum* R1, e les li konstri, devlope, kre larises, e kre lanplwa, lo son

later Sesel, kot in ne grandi e viv. Pli tar ou ava anmas *tax* avek li. Donn loportinite Seselwa pou tir son pei dan sa kriz ekonomik kot i ete.

En pe letan pase mon ti esey propoz menm keksoz avek Mr Savy pou li enplimante lo zil Coetivy, me mon ti ganny eksplike akoz ki sa pa ti pou kapab materyalize. Me la mon pe re-propoz menm lide ankor, me safwasi mon pe sizer Cap Ternay, ki li i pa posed bann menm kontrent ki zil elwanye.

Enn sa bann pti lotel, i fasilman kapab raport en minimum \$80 Ameriken par lasanm par nwit. Pou enn 9 lasanm avek en *occupancy* 66 poursan, ou pe koz ou la \$14, 400 par mwan. Ase pou servis son *loan*, pey travayer, kontribye anver *tax*, e kre larises pou son lekor, avek son fanmir.

Minis, Prezidan Ramkalawan ti dir i *welcome* lide, e ki i pou ekoute e pran lide. Lala, mon'n donn mon premye pou sa deba Bidze, pran, enplimante, fer marse, e fotespere ki plizyer fanmir Seselwa avar benefisyé, e prospere.

Dezyenm propozisyon ki mon oule soumet i enn ki konsern *Air Seychelles*. LDS zot kontan servi sa term *think*

*outside the box*, mon pa konnen ki bwat ki zot pe koz lo la, oubyen ki bwat ki zot in trouve. Me selman pli zot resit sa lapriyer, pli zot *thinking* i reste konservater. Me, vi ki sa i le ka, les mwan, en progresis, avans bann propozisyon ekonomik liberal ki ava eklersi zot ki bann liberal.

Dabor, annou aret per sa *Open Sky Policy*. Dan plas per li, annou *embrace* li, akoz i lesel fason pou sov *Air Seychelles*. Letan ki lekonomi mondyal i komans rebran, Prezidan i devret diriz Minister Zafer Etranzer pou fer en keksoz. Sa se pou demann tou nou bann pei zanmi pou met *at least* en vol aeryen par semen lo Sesel.

Lasin, Larisi, Lenn, Sid Afrik, Kenya, La Tirki, *Bahrain*, Zapon, demann zot e lezot ankor. Plis vol, ava vedir plis konektivite, e diversifikasyon baz koneksyon aeryen ki Sesel i annan. Sa ava anmenn bokou plis reveni pou *Air Seychelles ground handling*, e *Air Seychelles domestic*, ki ava permet zot pou *cross subsidize Air Seychelles international wing*.

Les *Air Seychelles international* konsantre dan kargo, e dan *charter flights* parey ki i pe fer an se moman. Les li spesyaliz dan en domenn

kot i ava kapab dominan. E les *Air Seychelles* e lespwar Lanasyon Seselwa kontinyen anvole.

Koumsa, ki ou *think outside zot proverbial box* Minis! Pa ler ki ou vin dir Seselwa aste *shares* lo lekel ki i pou perdi larzan a 100 pousan. Mon konnen ki mon propozisyon pou *sound counter intuitive* me selman, *give it some thought*.

Minis, mon annan en pe *issues* avek lafason ki koleksyon reveni in ganny e tale dan ou Bidze. Premyerman i annan en reform dan *tax*, 3 mwan i pa'n ase letan pou fer en reform avek ou sistenm *tax*. E pli pir ankor, dan sa 3 mwan ou pa'n fer okenn konsiltasyon avek person, ki mon konpran parfetman, akoz ou pa'n annan letan pou ou fer li.

Alors Minis ou'n senpleman enplimant bann rekomandasyon ki ti dan sa rapor *OECD*, e ou'n *call it a day*, en pti pe parese si ou demann mwan, be Selman sakenn i konn son konnen.

Mon osi apresye lefe ki dernyen reform dan nou sistenm *tax* ti ganny fer par Vis-Prezidan Ahmed Afif avek lasistans *IMF*. E se sa ki'n kit nou avek sa sistenm *tax* defektiv ki nou annan ozordi. Kot *comme dire* li menm, *tax* i

ganny sarze lo *tax*, selman li ki'n kre sa *anomaly* ki sarz *tax* lo *tax*.

Minis, i annan en keksoz ki Onorab Bistoquet in nonm zis an pasan, mon krwar ki petet i pa pe konpran sa *issue* li menm. Minis, akoz ou pa *scrap* sa sistenm *VAT*, e retourn lo en baz *GST* kot ou fer en koleksyon 30 poursan *at point of entry*. En sistenm ki *simple, direct to the point?*

A son *peak* lenportasyon, Sesel i enport R2 bilyon par mwan. Lo 30 poursan sa pou donn ou en koleksyon *tax* 600 milyon par mwan, fwa 12 ou ariv a 7 bilyon par an. Me nou konnen ki *tax* lo karbiran, sigaret avek lalkol I deza bokou plis ki 30poursan, alors la deza, nou pe koz en reveni bokou plis ki 7 bilyon par an.

Minis, Sesel i en pei ris, en pei enormeman ris. Sa ki nou bezwen se en bon reform konpreansiv dan *tax*. Si Sesel i nobou kapte en bon poursantaz son larises ki pe esap li, nou pou nepli zis en *middle income country*, me plito en *high income country*.

Pou fini sa bann zafer pran *loan*, mandyan larzan, e gele pou ganny lenvestisman, nou a fer nou zafer nou menm. E la, mon pou dir zot en morso laverite, nou pei pa ti pou dan

sa ta problemn ki i ladan ozordi, si sa dernyen reform dan *tax* ti'n ganny fer byen.

Nou ti pou pe asiz lo en stok de milyon an rezerv. Sa ki'n arive, se ki vizyon Vis-Prezidan Afif sa letan ti ganny limite par sa ki *IMF* ti dir li, e Gouvernman li a son tour, ti zis swiv konsey Vis-Prezidan Afif ki a sa letan ti *PS* pou Finans.

Pa ganny mwan mal, mon pa pe *impute improper motives* de la par Vis-Prezidan Afif. En *lack of vision*, i pa en keksoz ki mal entansyonnen, me i plito zis en form andikap ki anpes ou realiz ou plen potansyel.

Sesel i *overdue* pou en proper reform dan *tax*, pou ede konpletman *do away* avek sa sistenm *tax* fotif ki kanmarad in kit avek nou. Nou pei i fasilman kapab komans *generate* reveni lo en nivo oksidantal. Nou zis bezwen ganny nou sistenm koleksyon reveni an ord.

La, avek sa kriz ki nou ladan, pei i bezwen anmas larzan vitman. En sistenm *GST* pou permet nou pou komans anmas larzan la deswit, e nou pou anmas larzan toulezour. Ki pou fer bokou pou ede rezourd problemn ki nou pei i ladan.

A sa pwen mon oule fer zis en pti komanter lo lafason ki deba pe deroule. Bidze devan nou Lasanble i enn prezante

par Gouvernman *LDS*. Me sa ki mon pe vwar pe arive, se ki lamazorite bann Manm *LDS* dan Lasanble, komansman par zot *Leader* Onorab Georges, dan plas koz lo sa Bidze ki devan Lasanble, zot pe dedye plis zot letan pou koz lo ansyen Gouvernman.

Menm Onorab Georges in pas plis ki lanmwatye son lentervansyon, zis pou koz lo sa ki'n pase avan. Olye pou fer en deba ki valab e relevan lo valer e merit dokiman ki la devan nou ozordi.

Zot pe zis repete konmkwa ki *US* in *intellectually spent*, me lo zot kote zot pa pe fer okenn laprev *d'intellect*. Zot pa pe ed ni zot Minis, ni zot Gouvernman, ni zot Prezidan par lafason ki zot pe fer. Zot tou, san eksepsyon, zot pe fer 2 keksoz. Zot pe lager kont *US*, apre zot pe investir lenerzi pou esey zistifye en bann keksoz ki en zistifyab.

Zot in vin parey en group dimoun dan en lenstisyon mantal, ki pe lager avek lonbraz lo miray. E parey mon'n deza dir, menm Onorab *Leader* Biznes Gouvernman in pri dan sa zwe. Zanmen mon ti ekspekte en zour pou war son nivo tonm sitan ba!

Sa lalis *FA4JR* ki gouvernman *LDS* in pibliye, i lalis peyman pou mwan

Desanm. Sa i *basically* zot lalis, akoz se zot Gouvernman ki ti la o pouvwar an Desanm. Se Gouvernman *LDS* ki ti la o pouvwar an Desanm. *By* Desanm zot ti'n kapab fini fer nenport ki desizyon ki zot annan pou zot fer, e zot ti'n kapab azir *accordingly*.

Zot osi zot pou bezwen komans aprann pran responsabilite pou zot bann aksyon. Zot in azir dan serten fason, apre zot pa kapab zis asize gele e montre ledwa lo nou, san propoz okenn solisyon.

Me mwan, koman en zanfan Sesel, mon anvi ed zot. Alors mon annan sa pou mwan propoze, *from* sa lalis Desanm ki zot in pibliye, fer nou ganny en lalis tou bann ki zot, zot krwar ki pa ti'n devret gannyen. Kominik sa lalis avek nou ofisyelman atraver Lasanble, e nou, nou ava komans kontribye nou zefor pou asire ki larzan Leta i retourn dan kof Leta.

Be Selman, laverite se ki zot pa vreman bezwen nou pou sa. Zot parfetman kapab azir lo zot menm, zot in ganny elekte non selman dan egzektiv. Me egalman avek en *super majority* dan Lasanble. Alors, servi tou sa pouvwar ki Lepep Seselwa in donn zot pou azir.

Lalit kont drog: Fodre ki Prezidan, avek Gouvernman LDS, i aprann pou aret zwe avek keksoz ki serye. Zot in pran en avyon prive, e zot in fer sove en gran *drug dealer* dan pei. Apre zot debout anler *State House*, e dir avek nou, konmkwa ki sa i enn bann pli gran *drug dealer* Sesel. Be lekel ki'n asiste sa pli gran *drug dealer* pou sove? Pa zot menm?

Vire, zot fer en avyon *Emirates*, retourn dan *parking* pou debark en pasaze, zis pou sa menm pasaze rebran en lot *flight Emirates* detrwa zour pli tar.

Sa lalit kont drog asarnen LDS in vin zis en fars. Se pourtan, zot pe ganny dirize par en Prezidan ki ti deza dir konmkwa, ki li i kapab dil avek sa problem drog dan zis 100 zour. La ozordi ler size drog i leve, zot dir nou ki zot Prezidan avek son Gouvernman in la pou zis en pti pe plis ki 100 zour.

Ler ou pe fer kanpany, 100 zour i ase pou dil avek drog. Me an realite, non, i pa ase. Gouvernman LDS i bezwen realize, ki zot pou bezwen annan en lapros pli serye si zot anvi reisi sa lalit kont drog. Zot pa kapab kontinyen parey ki zot pe ale la an se moman.

Bann gaf politik, ki pe ganny komet par *leadership*

politik, ki apre zot bezwen vin koz mansonz, zis pour kasyet zot bann gaf, pour bezwen arete. Sa bann plan zen ki zot al fer lo Zil dan *luxury IDC*, ki apre i *backfire* avek zot, pe anlev tou kredibilite dan zot lalit kont drog. Alors, silvouple, aranze, e aranz zot!

**(APPLAUSE)**

### **HON JOHAN LOZE**

Lapes. Resaman mon'n soke pou tande konmkwa ki en bato ton pou Sesel ti en size kompleks. Ler Minis pou Lapes Minis Ferrari, in dir sa parol mon'n ganny en sok, akoz lontan nou pe dir li sa nou. Pandan 30an zot in servi sa size bato ton, koman zot seval batay popilis. E pandan 30an, tou ti fasil, e napa nanryen ki ti kompleks. Bato ton ti pou sorti anler dan lesyel ti pou tonm ater.

Me la ozordi ler ou demann li bato ton, i dir ou ki sa i en size kompleks. Ler ou demann li si pe al reouver negosyasyon Lakor Lapes avek Linyon Eropeen, i dir ou ki i swete ki Gouvernman avan ti'n negosye pli byen. Me pourtan, avan eleksyon sa menm Minis ti'n dir fortman, ki i pe al reouver negosyasyon lapes avek Linyon Eropeen.

Ozordi, keksoz ki Minis Ferrari krwar ladan se *aqua culture* ki tonm anba proze *Blue Economy*. In vir ledo avek son prop azanda, e in *take up* azanda Prezidan Michel. *Now*, pran en pe letan lo ou menm pou reflesir lo sa ki mon fek dir.

Minis, koman en zenn Minis mon annan en konsey pou mwan donn ou. I fasil pou azir dan en fason popilis letan ki ou dan Lopozisyon, me letan ki ou'n ganny eleksyon, ou pa kapab gouvern koman en popilis.

E se zisteman sa problemm Minis Ferrari ozordi. I pa pou zanmen kapab delivre lo tou sa bann promes popilis ki in fer letan ki i ti dan Lopozisyon. Akoz la ozordi letan se ou ki pe gouvernen, tou keksoz in konpleks, ou pa kapab fer aparet en bato ton par mazik.

E letan zournalis i kestyonn ou lo ou bann prop parol, ou dir ki la i a fer ou ganny problemm.

Alors Minis, tir en leson dan bann febles ou prop Gouvernman, e aplik li dan lenplimantasyon Bidze.

Aprezan mon annan en kestyon avan ki mon termin sa size lapes. Minis eski Gouvernman pe *issue licenses* pou bann nouvo *commercial long liners*? Si wi, *licenses* pou

konbyen bato, e konbyen zot koute par *license* silvouple? Si ou kapab *take up* sa dan ou repons mon pou byen apresye.

*IDC*: Minis lo sa size *IDC* mon annan zis en pti kestyon silvouple, kote eski lakonpanyen *GICC* i *bank* son larzan? E eski sa lakonpanyen i annan okenn kont aletranze?

Mon pe demann sa pou ed enn mon koleg lo lot kote latab. Mon vwar ki Onorab Andre in sey komans sa lager, me in napa ase kouraz pou li nonm non, e vremen fouy ladan pou met keksoz o kler. Mon konpran li mwan. Sa kestyon *IDC* ozordi in vin en size taboo dan *LDS*. Si ou al lev li tro an gran, sa a kapab termin ou karyer politik deswit. Alors, les mwan, anmenn sa lager pou ou Onorab Andre. Mon zepol i ase larz mwan.

Paviyon Sesel: Mon vwar ki sa size paviyon Sesel pe remont en pe souvan dan sa Lasanble. E sirtou diran sa deba. Alors, permet mwan pou eklersi en pe. En parol ki Prezidan Ramkalawan ti kontan servi lontan, sete "laverite pou liber ou." Be i paret ki koman zot in mont *State House*, sa parol in ganny oubliye, e vitman, zot in adopte koz mansonz koman zot deviz.

Zour ki zot zwenn avek zot dirizan, demann li kan egzakteman ki li, i ti negosye avek Gouvernman Lasin pou ganny paviyon? E si i annan kouraz pou reponn zot avek laverite, mon asire ki zot pou soke zot tou.

Nou bann siporter zot, zot konnen laverite. Ankor enn fwa zot vwar seval pe selebre lo kouraz bef, e mwan mon'n deza dir zot oparavan, mon pa tolere sa bann zafer bef travay, seval fete. *Credit where credit is due* silvouple!

Zot bann aktivis politik, pe distribye paviyon Sesel, ansanm avek kalandriye LDS. E zot pran kalandriye zot met anler lo paviyon, apre zot annan lodas pou vin dir nou ki nou bann siporter i annan problemm avek paviyon Sesel.

Nou bann siporter i annan problemm avek lafason divisiv ki zot pe tret en senbol Linite Nasyonal. Nou bann siporter i annan problemm avek en keksoz ki'n mal komanse. Ki'n komans avek mansonz, olye ganny fer byen, avek tou senserite.

Nou annan bokou pitye pou zot laba lot kote, aköz mon konnen zot pa konnen kwa ki mon pe koz lo la.

Minis, i paret mwan ki ou sel stratezi pou relans *tourism* Sesel, se vaksen, avek *herd*

*immunity*. Apard sa, ou avek ou Gouvernman zot napa okenn plan ankor. Mon konpran, aköz avan plan sete pou *market* Sesel koman en destinasyon *COVID safe*. Me la ozordi nou'n vin destinasyon *COVID* pli pir o monn. Noun riske lasante 2400 Seselwa, an retour pou 1400 touris.

Be si zot sel stratezi pou relans lekonomi se vaksen, *then* ankor mon oule remerisi Prezidan Michel pou sa 50mil doz vaksen *Sinopharm* ki in rode avek *Sheik* pou Sesel.

**(APPLAUSE)**

### **HON JOHAN LOZE**

E la, nou pou bezwen rekonnèt rol ki in zwe dan relansman nou lekonomi. Me Selman Minis, mon krwar petet ki ti ava en pe pli pridan pou devlop en stratezi en pe pli elabore ki zis *herd immunity*. Aköz la keksoz i en pe riske lafason ki i ete.

Mr Speaker, avek ou permisyon mon le ou permet mwan pou adres en size ki'n leve diran deba.

### **MR SPEAKER**

Wi be selman mon'n donn ou 3 minit an plis deza Onorab.

### **HON JOHAN LOZE**



Mersi Mr Speaker.

**MR SPEAKER**

Ou a sey fer li kourt silvouple.  
Mersi.

**HON JOHAN LOZE**

Mr Speaker, a n terminan mon annan sa pou dir, Minis, mon swet ou avek ou lekip bonn sans. Mon swete ki ou reisir dan ou misyon, mon swete pou vwar en *vast improvement* letan ki ou retournen pou *mid-year review*. E mwan menm, avek tou Manm dan mon kote, nou pou fer nou mye pou travay avek ou dan en fason rezonnab, pou ki nou pei i ava kapab pli vit retrouv semen sikse.

Me, mon osi konnen, nou pep pe al soufer, sa sityasyon *COVID-19*, avek sa bann Polisi atoufer dan sa Bidze forse. Pe al fors en sityasyon lamizer nwanr lo serten kous popilasyon Seselwa, ki sa pei pa'n zanmen deza trouve depi lepok mon defen gran manman.

Sa 43an ki zot pas zot letan pou maltrete, in gradyelman e lev lavi nou pep, ziska en nivo ez avek konfor, kot la aprezan nou pep in abitye li avek en serten standar lavi. Enn bann keksoz ki'n sorti for dan sa deba, se bann latak lo koripsyon, e lo *mismanagement* e lo vol larzan.

I annan en keksoz ki mon'n deza dir avan. Mwan Johan Loze mon pa en sen. Dan mon lavenn pa koul delo beni parey sa ki pou zot. *If anything*, mon en bandi.

Me zot parkont ki sen, parmi zot i annan sa ki'n vol larzan kliyan, sa ki'n vol byen e propriyete zot kliyan, sa ki'n vol larzan labank, sa ki'n vol larzan trwazyenm-az, ziska pti larzan *burger* pou *fund raising* lekol Belonie i annan ki'n koken.

Sa ki'n fer R240 mil profi lo lwe later lagrikiltir dan 2an. I annan ki'n menm deza ganny kondannen pou *mismanage* larzan kliyan, e Levek ti bezwen mele pou li pa mont prizon!

Alors, ler mon pe gete, zot imen parey mwan, zot egalman bandi parey mwan. Zis zot pe zwe sen, e pe fer dimoun krwar ki delo beni pe koule dan zot lavenn. Be mon kontinyen, dimoun i annan ankor en pe letan pou konpran zot.

Mr Speaker, Prezidan Ramkalawan in deza dir, ki Langleter si en tren i kraze, sa Minis i *resign, regardless* si sa i son fot ou non. Me si in ariv anba son *watch*, sa Minis li i pou bezwen *resign*.

Diran kanpanyi i ti osi dir, ki si enn son Minis i ganny apele devan Lasanble, akoz en glob pa pe alimen lo poto dan

distrik, sa Minis pou ganny pouse!

Ozordi 11 nou frer avek nou ser Seselwa, ki nou konnen, sa ki nou konnen in ganny touye avek COVID par neglizans sa Gouvernman LDS ki'n *mismanage* sa kriz. Mon ava zis kit sa avek zot pou refleksyon. Mon pa pou dir naryen plis lo la. Mersi Mr Speaker.

**(APPLAUSE)**

**MR SPEAKER**

Mersi Onorab. Avek sa nou a poz e nou a rebran apre midi 2er. Mersi.

**(BREAK)**

**MR SPEAKER**

Bonn apre midi tou dimoun. Onorab Esparon ou annan laparol.

**HON REGINA ESPARON**

Mersi Mr. Speaker. Bonn apre midi tou dimoun a lekout spesyalman bann dimoun dan distrik Glacis.

Mon pou komans mon lentervansyon an sitan de fraz dan prezantasyon diskour Minis Finans lo Bidze 2021, Mon site Mr Speaker. "Gouvernman in erit sa pei dan

en moman pli difisil dan son listwar, kot i ranpli ek defi, ki demann en transformasyon konpreansiv, e nouvo fason fer." Wi ser e frer Seselwa, nou pei pe pas dan en moman en serten, kot keksoz nepli biznes *as usual*, me kot i demann en azisteman, lo tou nivo. I kler ki dan sa sityasyon enserten, pei i bezwen annan en bon disiplin fiskal pou kapab redres nou lekonomi. E i enportan ki nou vin pli pridan dan tou depans ki ganny fer, ki swa lo nivo pei, dan bann Minister, departman ek lazans, me osi kot nou lakour.

Mr Speaker sa sityasyon ki nou ladan, i demann bokou sakrifis lo sakenn de nou. E malgre tou defi ki pei pe pas atraver, i enportan ki sak sitwayen i vin pli responsab, e pran son responsabilite, pou evit gaspiyaz, e aziste son depans kot i kapab.

Fodre ki nou pran kont ki sa sityasyon pe afekte e pou afekte nou tou. E sa ki vilnerab pou vwar zot dan bann sityasyon pli difisil pou met manze lo lasyet son zanfan. Se pou sa rezon ki zot bezwen balans byen zot depans e konn zot priyorite.

Nou pa kapab kontinyen aste gro lisyen porlenn pou met dan salon oubyen nouvo

rido tou le mwan, zis pou fer konpetisyon ek nou vwazen kan nou napa larzan pou fini aste manze pou met dan lasyet nou zanfan. Minis i fer nou konpran ki sa Bidze i enn ki kapab soutenab, alor depans i bezwen ganny fer ek bokou prekosyon.

Mr Speaker mon pa pou kapab koz lo depans Gouvernman san gete kote ki larzan sa pep in mal ganny zere. Akoz se sa ki lakoz sa sityasyon aktyel. Ozordi pei ti pou'n kapab pli byen ki i ete si selman, Gouvernman presedan tin port plis latansyon lo sa bebet ki apel koripsyon, ki'n ronz nou sosyete e anmenn li lo son zenou.

E ozordi i ankor annan serten landrwa ki sa koripsyon i ankor pe kontinyen, kot labi in vin en keksoz normal, e obsesyon pou larzan i fer zot fer tou sord kalite trik, e aksyon malonnet. Mon dir zot fer atansyon, akoz sa pa pou kapab kontinyen. Minis in dir ki i a pe vin *deal* ek zot. Alor arete silvouple !

Dan lot kote i annan bann bizness ki pe ranmas *tax* ki sipoze al pou Gouvernman kot larzan zanmen i ganny deklare e pa pe rantre dan kof Gouvernman. E parey Minis in dir, ki tre byento pou annan reform dan Lalwa *Tax* ki pou

ede met en pe lord e regulariz keksoz. Nou pa kapab kontinyen ek sa mantalite kot li sa bizness i a pe trangle pos sa malere, pou anmas *tax* lo prodwi ki i vann, me selman olye pey sa *tax* ek Gouvernman, i retenir pou son benefis. Sela kot i pe defrod Gouvernman. Minis mon pou demann ou pou konmans *take to task* sa parti politik ki nou tou nou konnen i annan ki pa'n pey *tax*. Apre lezot a swiv.

Bann sityasyon kot travayer i pran gous ek kliyan pou pez *file* son kanmarad e met retar pandan ki lot i ganny tou privez. Kot permisyon pou proze i ganny refize koman en pinisyon oubyen kolabor pou refiz en aprouvasyon, e travay dan en fason malisyé. Pli tar ler ou pe *enjoy* ou zak par gro gous, li delo pe antre dan son lakaz ler gro lapli i tonbe.

E la i fer mwan mazin sityasyon Mr Pat Hoareau Sorento, ki pe viv dan en kosmar. Pou plis ki 5an, lannen ale lannen vini in vwar li pe sibir move zesyon *planning* dan son vwazinaz. E malgre tou lesey pou rod solisyon, i fini an ven, son sityasyon pa amelyore, e sa etranze ki'n konstri obor li i kontinyen pa swiv regilasyon, an krwayan ki i par lao Lalwa

akoz sistenm oparavan ti soutir li.

Vizit parti vizit Mr Speaker devan nou zofisye i koz en bon parol, deryer nou sega i sanz *tune*, e sa ki donn pli gro gous ki ganny rezon. Eski i tro bokou letan mon dir *enough is enough?* Apre zot ava dir ki Gouvernman i otokritik. Ase fer otokritik don !

Mr Speaker i kler ki kot nou ete ozordi, sa konseps travay dir avek lonnekte i bezwen reganny enkilke dan serten kous nou popilasyon, pou re-edik zot lo valer prodiktivite, travay dwat, e retir sa lespri, ki dan travay toultan ou bezwen fer makro, oubyen fer faver enn e pini en lot.

Sanson i dir “fer makro pou ou prop lekor me pa fer li pou anbaras ou kanmarad.” Alor mon pe dir, annou arete sa bann mantalite, annou travay dan en fason drwat e onnet, silvouple.

Mr Speaker, personn dan sa pei pa devret pe viv dan en fason mizerab. Mon krwar ki si nou tou nou leve e nou pran kont ki lavi i la pou nou debourye, nou tou nou pou reisir. Mon kapab dir sa e pran legzanp lo mwan menm. Mr Speaker, apre mon maladi, mon tin kapab zis trennen e depann lo Leta pou sonny mwan. Me se

pa sa ki mon ti fer. Mon ti promet mon lekor ki mon pou debout for ankor, e se egzakteman sa ki mon’n fer. Mon konsey pou tou dimoun ...

**(APPLAUSE)**

### **HON REGINA ESPARON**

... mon konsey pou tou dimoun ki ankor kapab, se leve al debourye. Pou bann ki pe depan lo lasistans edik zot lo lenportans pou nourri zot prop lekor e zot fanmir, olye reste oubyen vin depandan lo lasistans sosyal.

Sa i anmenn mwan direkteman lo sa sityasyon labi ki’n pase kot ASP Mr Speaker. E mon apresye ki omwen Gouvernman i rekonnet ki sa robinen ti’n ler pou regle e ki sa departman i enn ki bezwen plis *oversight* e plis kontrol, kot lasistans i ava ganny donneren lo merit e non pa koman en faver politik. Sa i a osi les ASP konsantre lo zot prop *Scheme* e rod pli bon fason fer peyman avek mwens birokrasi.

Lo sa *note* lasistans sosyal mon ti ava voudre felisit nouvo Minis ek son lekip kot Lanplwa, akoz zanmen monn deza vwar sa kantite *vacancy* lo rezo sosyal e menm dan Nasyon ki pe ganny pibliye. Mon’n menm vwar zot bann direkter e zofisye

pe pran sa vremen serye e met dimoun dan lanplwa. Seselwa pran sa bann sans e donn tou sa ki nou kapab donner. Annou arete pran *sick leave* oubyen pa vin travay. Annou pa les sa repitasyon ki Seselwa i pares alor nou bezwen rod etranze vin permanan.

Annou fer sir nou ganny gete koman zonn ek fanm Seselwa debrouyer, ki kapab fer sa pei avans devan avek nou kontribisyon. Sa a retir sa move tas ek persepsyon ki Seselwa pa le travay lo nou. Mwan mon krwar dan zot e mon konnen ki zot bann debouryer. Nou tou ansanm, annou kontribye dan devlopman e fer nou pei avans devan.

Mr Speaker, nou'n tann en Manm lo lot kote latab koz lo Per Fondater ki ti annan leker pou malere dapre zot sa. Selman nou bliye ki sa menm Per Fondater, ki ti pran later ek malere e donn son fanm 52 pti bout later. Kote leker ti ete sa letan ki ti pe fer sa ?

**(APPLAUSE)**

### **HON REGINA ESPARON**

Larepons i reste ek zot.

Minis lo kote labi atraver ou Mr speaker, i annan ki enkrwayab. Ki mannyer ou apel sa, ler dimoun ki'n mor,

son kart bis ki i ti gannyen atraver *Welfare* i ankor pe ganny servi e resarze tou le mwan kot *SPTC* anba Fon Sekirite Sosyal, se pa labi sa?

Ki mannyer i apele, ler en travayer ki annan responsabilite dan en Minister pou zer bann lakaz lwe, i fer sa Minister pey en lakaz vid R25mil e en lot R20mil par mwan pou 1an edmi, menm si sa lakaz napa person ki pe reste ladan. E li dan *weekend* i lwe sa menm lakaz ek son bann dalon pou lwazir e fer loka ladan? Eski zot apel sa en travayer responsab ki pe travay e avek en konsyans, pou fer sir pou fer sa pei avanse?

Wi sa i bann kalite koripsyon ki ti pe pase anba Gouvernman *US* e se selman ler sanzman in arive ki tousala in ganny dekouver. Apre zot anv i ankoler letan *Father* i dir ki se en kales kase.

Dan en demars pou fer desann pri lavi, Prezidan in demann sa ki lwe akomodasyon pou redwir sa pri. Parski an se moman bokou fanmir, larzan ki antre kot lakour in desann en kantite e i annan ki pou desann plis ankor. Dan sa moman difisil annou annan en leker pou kanmarad. Akoz finalman si ou lakaz i tro ser i pou reste debout vid e nou frer e ser pou

lo semen avek son pake. Mon repete ki i en zefor kolektif ki nou tou nou bezwen fer.

I nesese ki nou sorti dan nou *zone* oubyen kwen konfor e nou vin pli reseptiv ek bann nouvo loportinite, ki pe vin a nou laporte. Nepli tan pou nou get touris koman diber lo nou dipen akoz avek *COVID* sa diber i preski napa. Tou pe fonn.

Nou bezwen anbras bann nouvo realite e loportinite ki prezant devan nou, pou nou fer de bout zwenn. Minis in fer resorti e mon repete, nepli tan pou swazir louvraz, tou louvraz i enportan. Kot lakour se nou sa paran ki bezwen edik nou zanfan lo sanzman ki lakour i bezwen fas avek.

Si nou ti abitye manz 4 gato nou pou bezwen manz 2, e nou kit 2 pou demen. Sa ki ti abitye bwar 2 labyer tou le swar, i a bwar 1 oubyen i a kit pou *weekend*. Annou al ver prodiksyon lokal e redwir lo marsandiz enporte.

Gete kwa ki nou kapab met dan later deryer lakaz, en pti baton mayok, 2 pti pye brenzel, piman, tomat e lezot. E mon kontan ler mon vwar bokou lakour pe servi bann boutey plastik, koman en resipyan pou plant ladan, kot zot pa bezwen al aste pot fler enporte. Otan ki zot kapab

resikle i bon pou nou lanvironnman.

Mr Speaker, mon byen kontan aprann ki dezormen Gouvernman pe al fer demars pou rebran sa bann later lagrikiltir ek bann ki'n gannyen, e pa pe servi.

Mr Speaker later lagrikiltir i en keksoz valer pou en dimoun ki ganny son lavi atraver plante. I annan bokou fermye solid e serye ki anvi lans dan prodiksyon agrikol, me zot pa kapab fer li akoz napa later e malerezman sa ki'n ganny later lagrikiltir pa toultan ki zot pe servi sa parey i devret.

En zenn fermye ki mon'n koz avek i dir mwan parfwa i dekourazan, ler ou pe rod en pti bout e ou vwar sa ki'n gannyen deza, pe rod ankor. I dir mwan ki i enportan ki letan sa legzersis i ganny fer, i ganny fer dan en fason zis, e ki i annan konsiltasyon ek tou akter konsernen. E napa malis dan ban prosedir pou pini ou dekouraz sa en ki fek komanse.

E kan sa legzersis i ganny fer en letid aprofondi i fer avan, pou fer sir ki sa dimoun ki nou pe rebran sa later lagrikiltir avek, pa enn ki anvi e esey son mye pou demar son biznes lagrikiltir. Me ki sa vilen manni ek nou pa ek nou ki ti egziste avan in ser li e anpes li avans

devan. Dan bann ka parey mon ti a voudre ki sa bann dimoun i ganny en sans, met zot kes devan e en desizyon ki zis i ava ganny pran.

Mon ti a osi kontan konnen ki manner Gouvernman pou dil avek bann dimoun ki'n servi later lagrikiltir pou lezot keksoz, tel parey met gro batiman lo la, apartman lo la oubyen konstri zot prop sato lo la.

Sa later ti pou lagrikiltir ki telman enportan parey ki nou'n realize sa detrwa mwan ki *COVID* pe ravaz nou pei. Alor sa ki'n servi, (ou kapab les mon koze Onorab)? Mwan ki annan laparol ase ronfle laba ou. Sa later ti pou lagrikiltir ki telman enportan parey ki nou'n realize sa detrwa mwan, ki *COVID* pe ravaz nou pei.

E alor sa ki'n servi li malapropo in kas son Kontra bay lo sa later. Dan sa ka zot devret ganny sarze en penalti i, pou anpese ki i labi i kontinyen. Me sa mon akit dan lanmen Egzekitiv pou deside ki manner pou aprobe.

Mr Speaker, mon'n toultan port en latansyon spesifik anver bann fanmir pli vilnerab, e la ki lasistans sosyal pe al redwir en kantite i annan ki pou trouv zot dan en lanmizer.

Avek sa antet mon demande ki Egzekitif i konsider tou keksoz e vwar tou opsyon disponib e posib avan pran en desizyon, kan zot reviz pri komodite esansyel ki *STC* i ofer anba sibvansyon. Mon rekonnnet difikilte finansyel ki pei e *STC* i fer fas avek. E mon osi rekonnnet sa groser defi ki bokou paran tousel pe fer fas avek la an se moman e mon pa ti a voudre ki okenn zabitan Glacis i al dormi lafen aköz in pan kapab aste komodite de baz.

An menm tan nou bezwen pas sa konsern, mon bezwen pas sa konsern ek Minis, ki travayer *STC* in anvoy pou mwan pou dir Minis get en kou ki pe pase laba kot *STC*, kot en *Ex CFO* ki en etranze ki dapre konpran son *GOP* in ekspire depi Out 2020 e i pa pe travay. Selman *STC* i ankor pe pey son gro saler, son lakaz e osi donn li en loto lakonpanyen pou monte desann ladan.

Dapre konpran *STC* pe depanse environ R125 a 150 mil lo la par mwan. Minis kler en tors lo sa kalite labi pou nou silvouple. Sa i fer mwan konpran aköz ki travayer *STC* ti sot dan semen e dir pey zot, zot trezyenm mwan saler.

Mr Speaker les mwan fer en pti revi lo mon distrik fas a

sityasyon *COVID* e fas a sa Bidze ki devan nou. Ozordi, malgre ki Gouvernman ti ava anvii konstri plis lakaz dan distrik Glacis, me avek teren ki tre limite, e kot negosyasyon, pa'n al ase lwen, nou war ki nou'n ganny kit deryer dan sa domenn. Me mon ti a swete, ki Minister pou zesyon lakaz, ti a kapab konsider met bann dimoun dan distrik Glacis ki lo lalis priyorite lo *national quota*. Koumsa enn, de zot ti a kapab ganny konsidere dan bann lezot landrwa, ler pe fer alokasyon, an atandan ki sityasyon i amelyore.

Lo kote bann proze distrik, malgre en pe retar proze peser in bouze e avan lafen Mars, lapas ava'n fini fouye e *rock armouring* ava'n konplete. Me pou *gear store* ek *ice plant* negosyasyon i ankor *ongoing* e i a vini pli tar dan lannen.

Bann peser e Lasosyasyon Peser vwala rezilta sanz sa Gouvernman. Alafendefen zot sityasyon i ava amelyore.

Lo proze *day care*, malgre en pe problem, proze in reisi konplete, e byento kontrakter a rann louvraz. Me, en keksoz ki mon pa pou kapab reste trankil lo la se lafason ki bann pti proze Gouvernman Lokal in ganny fer dan distrik Glacis anba Gouvernman *US*. Napa enn sa

bann proze ki'n ganny vreman konplete.

Semen pou al kot simityer Lanmisyon, in fer en bout e lot bout kot peron i sipoze vini pa'n fini. La pou konplete nou bezwen annan en lot *tender* pou sa pti bout ki reste.

*Parking* kot *day care* kot legliz, peron ek miray pa'n fini. E sak fwa ou demande zot dir ou ki fodre *re-tender*. Mon konpran byen ler Minis i dir nou ki kontra i ganny donner dan kontra. E se la kot bann *inflated invoice* i antre, e en proze ki ti pou kout R20 mil, i ariv R40mil letan I *re-tender* pou konplete. Mazorite proze en kontrakter i komanse e en lot ki vin fini. Sa se bann zafer *scratch my back, I'll scratch yours*.

Mon kapab dir ki mon kontan mannyer Minis Hoareau pe met en lord laba kot Gouvernman Lokal. Les zot kriy lasasen. Mon konnen avek sa madanm sak sou ki ganny depanse pou bezwen ganny *accounted for*. Konmdir koze bann ki pran gous oubyen donn gous fer byen atansyon e fer sir zot laliny i drwat.

Mr. Speaker, pou nou pei kapab sirmont tou sa bann defi ki devan nou I enportan ki lo nivo distrik osi keksoz I bouze, keksoz ki pou fer sa arive se



annan en ladministrasyon ki fonksyonnen. Kot i annan konsiltasyon e bon kordinasyon lo nivo distrik.

I enportan pou nou ganny konsilte pou nou konn bezwen an term mende, pou kapab donn en servis ki efikas e ki zwenn bezwen tou nou zabitan.

Mon demande ki I annan plis konsiltasyon ant bann lazans ek Lotorite Distrik. Parfwa ou krwar ki i annan Minister ki refize kominik ek Lotorite pou partaz lenformasyon.

Pran par egzant pou ou ganny lenformasyon lo lekel ki koup dibwa, oubyen lekel ki pe netway semen, ou pe donn lezot servis? Ou vir an ron, e sel letan ki ou konnen lekel bann kontrakter se letan zot pa'n ganny peye, e zot vin tap ou laport, pou fer serten demars pou zot.

Dan sa lespri pou koup gaspiyaz i osi neser ki bann *duplication* i ganny adrese. Par egzant, sa legzersis koup pye dibwa dan distrik i devret ganny byen gete. En dimoun pa kapab si i annan en pti pye dibwa lo son propriyete ki pe pouse lo en lateras, les li vin en gro pye, e apre tay kot Gouvernman pou rod lasistans pou koupe.

Annou pran nou responsabilite e retir sa pti pye

dibwa letan i ankor pti avan i vin en danze. Ozordi i annan 3 lazans ki responsab koup pye dibwa *DRDM*, *PUC* e Gouvernman Lokal. Akoz sa pa ganny met anba en sel lazans e evit *duplication*? Koumsa en dimoun pa ava ganny peye de fwa pou menm louvraz.

Menm zafer pou bann Lazans Sekirite. Pran par egzant kot *SFA* kantmenm i annan *autonomous* lo son Bidze i bon fer resorti, mon pa konpran ki mannyer en sel landrwa i annan 3 *firm* sekirite ki veye. *Eagle Watch* i vey en bout, *Ace Security* en lot bout e *Regular Police* en lot bout. Letan mon lo sa size sekirite mon santi ki bann *security firm* i devret ganny ankouraze pou anploy nou Seselwa, olye vwar bann etranze ki sekirite en pe partou.

Mr Speaker, anvi ki mon sorti dan en distrik avek en gran Kominote Peser, mon *welcome* sa nide ler Minis i dir ki Gouvernman i annan plan pou devlop e amelyor bann fasilite dan bann distrik, pou nou peser artisanal e konstri en fasilite lo *Airport* pou resevwar pwason ki pou ganny enporte. Sa i en lide ki bann peser Glacis i apresye me zot pe espere pou ganny plis lesplikasyon lo la.

E lo sa fame *FA4JR*. Mon ti ava demande ki i annan en larepons konkret par Minis lo en evalyasyon ki'n ganny fer lo sa lalis, ki nou ti demann ek Gouvernman *US* lannen pase, avan nou osi nou ti ganny fer *redundant* e disparout. Nou'n vwar *SS* ki pe enplor bann ki ti ganny larzan ki pa ti lo merit pou rann.

Atraver ou Mr Speaker, mon konpran ou byen *SS*. Anba sa Gouvernman avan ou pa ti pou kapab dir non, akoz ou osi ou ti pou pas par lafnet parey nou koleg Onorab William.

**(APPLAUSE)**

### **HON REGINA ESPARON**

Me nou'n touzour apresye sa louvraz ki ou ek ou lekip pe fer pou redres nou pei. Mon osi fer en lapel avek tou dimoun, pou vin devan dan en fason onnet e fer sa ki zot vreman devret fer, sa se pou ran a Sezar sa ki pou Sezar.

Mon osi apresye ki letan nou koz lo reveni *tax* kot *SRC*, ki Minis i konmans avek bann manm dan lotorite ki dwa.

Mon ti ava osi demande ki Gouvernman i fer sir ki avan okenn Polisi e sanzman dan Lalwa ki ganny fer ki afekte *business* prive, silvouple konsilte

avek sa bann *business*. Akoz se zot ki pou kapab donn en pli bon apersi. En bon relasyon ek sekter prive, pou definitivman ed zot dan demars pou fer revini monte. Mon dir sa akoz bokou *policymaker* pa pe konpran fonksyon ek loperasyon ki serten sekter prive i pas ladan.

Mon'n tann Minis koz lo koripsyon e mon anvi fer referans avek nou bann Lalwa ki devret ganny amande, pou vin en pe pli strik, e sa i ava anpese ki bann dimoun ki'n vole i zis ganny met deor san okenn kont ki ganny rann.

Nepli sa lepok kot ou vol dan ta 50, ou ganny transfer dan ta 100. Avek *LDS* nou pou kler en tors lo ou. *PSO* i demande pu sispann e apre en mwan pran en desizyon me sa i pa ase.

Sa bann endividi fodre rann sa pep sa ki pou sa pep. Letablisman Gouvernman pa en *shopping centre* kot ou pran sa ki ou le ler ou le. Nou bezwen annan respe e pran ka avek bann byen e larzan Leta.

Mon pe vreman apresye ki bokou pe ganny fer pou retir drog dan kominote. *ANB* ek son lekip mon vwar pe fer en netwayaz dan pei e menm dan zot prop lorganizasyon. Mr Speaker mon vwar ki popilasyon pe byen akerir sa

zefor par Prezidan Ramkalawan pou elimin drog e anmenn sa ki koupab devan lazistis.

Be i remarkab e regretab pou vwar bokou lipokrizi lo kote US ,ki pa pe aksepte ki ler nou pe penetre zot laliny defans zot kriy *foul* e roul ater parey foutboler Neymar dan dernyen *World Cup* ti fer.

La en sel kou zot koz labi drwa imen. Drwa imen pa vin koz ek nou la 2021. Akoz pa bliye ki depi 1977 apre Koudeta se zot parti ki ti vyol drwa imen sa pep! I annan i lager pou demann kestyon konsernan zanfan, me selman zanmen mon'n tan li vin koze lo tou sa bann zanfan, bann frer ek ser Seselwa ki 6 pye anba later, oubyen ki Surya in fini fer zot vin lasann. Lipokrizi vre pa pou zanmen arete !

Zis en pti *reminder* pou ANB. Pa bliye pou zot entansifye zot travay pou pas anler North East Point, akoz aktivite kot klinik Mrs Delhomme i kontinyen, *comme* dir *Anglais* 'business as usual.'

Mr, Speaker, letan mon pe pas lo mon distrik, mon pa pou kapab pa koz lo *Regional Home For Elderly* ti sitye dan distrik Glacis ki tonm anba Minister Lasante.

Mon lentansyon se pa pou kritik bann *staff* e travayer sa

lenstitisyon, me pou ouver lizye lotorite konsernen lo bann keksoz mal ki *staff* menm in met a nou lentansyon.

E lefe ki zot larzan i al direkteman lo kont Minister Lasante, zot pe kontribye alor zot devret pe ganny trete lotreman e non pa konmsi en mandyan. Mon'n deza port a latansyon Minister e osi, *Council for the Elderly*, pou regard tre pre lo bann konplent ki fanmir ek *staff* i fer lo sa lenstitisyon, e rod solisyon. Parfwa ou larm i verse ler ou pas laba, pou tann sa ki bann pasyan e *staff* i rakont ou.

Letan mon pe ariv ver mon konklizyon, mon kapab dir ki mon vwar nou ozordi dan en kriz ekonomik ki vreman sever e zanmen nou pei in pas ladan. Ozordi kontan, pa kontan si larzan sa pei ti'n ganny depanse byen e pa mal apropro, nou pa ti pou lo koray dan en kales kase.

Ozordi nou pe rekolte fri ki Gouvernman US in plante, e mon pou dir ki in met en gou anmer dan labous tou Seselwa. Sa i rezilta bann aksyon egois, par en pti group ki ti toultan krwar ki zot ki ti Bondye later, e zot ti pou la pou leternite.

Sa ki ti dir ki Prezidan Ramkalawan pou vwar *State House* '2000 zanmen' in anval zot lalang parey bours gonfle !

Lezot pe kont reken dan lagon St Joseph, tandis ki serten pe zis gele parey pti baba vant byen plen, ki per pou dormi pangar i a toufe !

Antretan sa menm *Father* pe met en lord dan sa dezord ki zot Gouvernman *US* in mete dan kof sa pei. Fer tou zot sabotaz, zot *press* kominike, zot *press conference*, e nenport ankor ki zot anvi, sa solda pa les tonbe pou debout avek, pou debout for.

Dr Gedeon ti dir letan ou nanryen fer, pa fer nanryen. Me mwan mon ti a kontan dir avek Dr Herminie, olye zis asize e dekouraz bann travayer Lasante, akoz ou pa met ou *PPE* e ed Minister Lasante donn vaksen?

**(APPLAUSE)**

### **HON REGINA ESPARON**

Eski ou'n tro politisyen ki ou'n oubliye ki mannyer i donn sa kalite pikir? Dan sa letan lensertitid ki devan nou ek sa lepidemi ki nou pa kor konnen kote nou pou al bite avek, mon pran laparol dabor pou felisit tou mon bann koleg dan Minister Lasante. Mon fyer ki mon pei nou pei Sesel i parmi sa 3 pei dan lemonn, par devan bann pei was lo program

vaksen. Parey sanson i dir," sa gro nyaz nwanr pe ale."

Mon felisit Minis Finans ek son lekip pou tou zefor ki zot in mete pou vin nobou prezant Lepep Seselwa ek en Bidze pou sa lannen difisil. E ed nou vwar sa lalimyer lo ki mannyer nou pou avans devan dan tou tanpet. Kontinyen avek sa travay byen dir. Seselwa i deryer zot. Pa les sa 4 pti moustik fatig zot dan zot zorey.

Mr Speaker, ozordi mon kapab dir ki ler mon'n ekout *Leader* Lopozisyon donn son reaksyon lo diskour prezante par Minis Finans, ou a krwar i ti pe fer en lot repons *SONA*, prezante par Prezidan Ramkalawan.

Sa diskour in enn ki i montre laenn, i bliye li menm ki ti pe demann *lockdown*, selman i dir les touris antre. Ozordi ler Prezidan i bouze pou al fer deboury, pou rod 2sou an plis pou met dan sa kof vid, oubyen pou rod 2 pyes pou repar sa kales, i konplent. Ou a krwar ki tou sa ki Prezidan pou fer i bezwen demann permisyon ek *US*. Ayoyo. Be ki mannyer eski tousala i apele?

Mr Speaker *LOTO* i sipoze *Leader* Lopozisyon dan Lasanble Nasyonal, e non pa dan *State House*. Mon dir zot les nou Prezidan debourye pou

bous sa bann trou ki *US* in fouye e kit avek nou. Fodre ki zot aret vin zis met bar dan larou Egzekitiv, e krwar zot pou anpes Gouvernman fonksyonnen. Sa *no way!*

I byen zot dir pran aksyon ek sa ki pe fer koripsyon, selman zot menm ki kriy lasasen koman aksyon i ganny pran. Olye oli zot devan e oli zot deryer?

Prezidan i met *LOTO* lo Komite *Platinum*, premye aksyon ki *Leader* son parti i fer koman i ganny nominen, i fer li sorti. Apre i sot deor e i kriy lasasen e dir Gouvernman pa oule ekout li! Bann aksyon ki pli move ki en pti baba ki pa le pran siset, ni tete, ni bibron kantmenm son manman i donn li e i kontinyen kriye.

Mr Speaker fodre ki Lopoziyon i grandi e vin pli responsab, pli rezonnab e pli responsab. Ozordi dan sa sityasyon ki pei i ladan, se selman koze fran ek laverite ki pou delivre nou,

Annou met tou dan lanmen sa ki pli gran ki nou e nou ava vwar son rezilta.

Pou zabitan mon distrik ek Lepep Seselwa an zeneral, mon dir zot kouraz dan sa letan difisil. Pa perdi lespwar, aköz mon konnen, ki Minis Finans ek son lekip pou vey byen nou

larzan. E kot zot vwar koripsyon, aksyon pou ganny pran. Nepli sa letan soutire, me tou pou ganny ekspoze.

Mon annan konfyans osi lontan ki Wavel Ramkalawan i Prezidan sa pei, Ahmed Afif i Vis-Prezidan ek son lekip, ki pe diriz nou pei ki Sesel e tou Seselwa pou sorti venker dan sa tanpet ki nou pe pas ladan ozordi ! Pa bes lebra tonbe aköz ansanm nou kapab fer li, e nou pou fer li. Mersi. Mr Speaker

**(APPLAUSE)**

**MR SPEAKER**

Mersi Onorab. Onorab Henrie.

**HON GERVAIS HENRIE**

Mersi Mr Speaker. Bonn apre midi tou dimoun, sirtou zabitan Mont Buxton,

Nou reste dan en pei eksepsyonnel. Malgre tou lensertitid e difikilte ki lannen 2020 in anmennen, napa en lot landrwa ki mwan avek ou ti a kontan ete an se moman.

Kredi pou sa, parey i tou letan leka, pa pou nou politisyen. Kredi i pou ou, lepep Seselwa. Nou pe sirviv sa pandemik aköz ou travay dir, ou sakrifis e ou soutyen pou ou vwazen e ou kominote.

Mon pe vwar bokou dimoun pe avans devan, non

selman pou ed son fanmir ek son zanmi, me osi dimoun ki zanmen in zwenn e probableman, zanmen i pou zwenn.

Ou zenerozite pou donn ou kanmarad en sans parey mon ti enplor ou dan mon larepons lo diskour *SONA* en mwan pase, i evidan dan ou kontribisyon pou fon *COVID-19*, bann donasyon pou Minister Lasante e dan *Bond* Trezor.

Sa i nou valer. Valer Seselwa. Nou pran swen avek kanmarad. E i sa bann valer, ki merit defini ki pou arive dezormen. Akoz sa bann defi, e loportinite ki nou pe fer fas avek la konmela, i pa ditou en zafer zis retourn keksoz parey ti ete avan.

Nou bezwen reve pou al pli lwen ki kot nou ti ete yer. Tap tou pou tou pou ariv pli lwen posib. Nou'n ganny en nouvo loportinite pou re batir nou lekonomi e nou pei pou le meyer. Dan en zefor pou lans en nouvo letap ki a rann Sesel pli for, pli zis avek en lavenir pli asire, ou bezwen dabor konpran ki sa Bidze i vedir pou ou, ouswa ki mannyer ou merit vwar ou lekor ladan, ki ou en zanfan, en zenn Seselwa ou en retrete.

Minis pou Finans in dir lefe pandemik *COVID-19* lo

lekonomi Sesel pou lannen 2020, in enn pli pir ki nou'n deza eksperyanse.

Bann mezir ki'n ganny anonse dan sa ladres, i saki Gouvernman i senserman krwar pou tir nou pei dan son premye resesyon ekonomik pou pros 12an.

Nou Nasyon pe fer fas avek en defisit primer fiskal, pou en sonm R2.642 bilyon ki ekivalan 11.8poursan nou *GDP*, e en total defisit 15.3poursan nou *GDP* pou lannen 2021. Sa i pli o defisit depi reform makroekonomik 2008.

Sa i akoz en pandemik ki disi Desanm 2020 ti fer 1,004 Seselwa perdi zot louvraz dan en moman kot ti annan en ralanti dan marse lanplwa. Plis ki 3800 bizness ti tourn ver Gouvernman pou ganny lasistans finansyel pou pey zot travayer. Plizyer mil Seselwa pe bezwen fye lo sa pti mwenza ki zot in met de kote pou fer de bout zwenn.

Mr Speaker, nou bezwen admet ki prezantasyon sa Bidze R11 bilyon, 013 milyon, 648 mil, 296 in vin dan en moman difisil.

Malerezman sa ladministrasyon avan nou pou ganny rapel pou kit nou avek en leritaz det, kot ozordi lakantite larzan Sesel i drwa i R18 bilyon

ki preski 100poursan nou total *GDP*.

Me i annan lespwar. I annan keksoz pozitiv ki pe vini. Sa Bidze pe fer 2 keksoz, osi senp ki sa. Lo en kote i rekonnèt larealite. Sa se nesesite pou anmenn Bidze Gouvernman lo en baz pli soutenab, par koup depans Gouvernman, retir labi ek koripsyon dan servis piblik e retir depandans lo lasistans sosyal pou bann endividi ki kapab travay.

Lo lot kote i donn solisyon par met an plas bann Polisi, pou relans nou lekonomi dan Sekter Tourizm, Lapes, Lagrikiltir, servis finansyel, e lekonomi nimerik.

An gro bann mezir ki'n anonse i pozitiv. Irespektiv ki sityasyon ou ladan, sa Bidze pou enpakte lo ou lavi toulezour dan en fason ou en lot. Dan sa peryod parey nou ete nou pe pas ladan ozordi, Gouvernman i oblize avans devan koman investiser prensipal dan lenfrastruktir, servis e program sosyal ki an retour, i ede kree lanplwa, ogmant demann dan konsonmasyon, fer agrandi e ouver lekonomi e asir byennet sosyete.

Sa Bidze pe met fondasyon pou transform nou pei, dan sa prosen 5an atraver en prose

byen organize pou asire ki nou retourn lo en nivo krwasans ekonomik soutenab.

*LDS* pe pran son letan pou fer keksoz byen e dapre Lalwa e fer li byen.

Mon asir pep Seselwa ki sa ki pa'n ariv dan sa dernyen 3 mwan pou arive dan sa prosen 3an.

Me pou sa arive fodre nou tou nou zwe nou rol dan sa peryod difisil, e aret krwar i rol Leta tousel pou donn lasistans dan sa moman difisil.

Letan Bidze in donn bann lakonpannyen en *tax break* e osi aboli *CSR*, sa i vedir ki Gouvernman pe les sekter prive zener larises pei, par tenir plis zot profi pou reenvestir dan zot biznes, pou li agrandi e pou zot kree lanplwa. Zot konpran mon bann koleg *US*?

Letan Minis i demann bann biznes pou reve al o de la nou lafrontyer, sa i vedir Gouvernman i enterese vwar bann biznes Seselwa anmenn plis deviz etranzer dan pei, atraver eksportasyon bann prodwir tradisyonnèl aletranze ki ozordi lemonn pe rode, sirtou dan sekter farmasetik.

Valer lendistri global sa bann prodwir, an Dolar *Americain* disi lafen 2019 ti kronm swivan: koko ti 35.2bilyon, lavanniy 866milyon, patsouli 67 milyon,

kannel 760milyon, Gomon 8 bilyon e dimyel 9 bilyon.

Alor, eski i dezoner si Seselwa i rekomans investir entansivman dan sa bann lendistri pou nou ganny en pe sa ta Dolar? I sertennman pa dezoner, ler lemond pe rode.

Zis pou note, ki nou zil vwazen, *Madagascar* ti eksport 56pousan lavanniy ki konsonmen atraver lemond pou lavaler \$584milyon an 2019. Tandis ki *Maurice* ti ganny \$21 milyon dan sa lendistri. Kot i konsern kannel, *Sri Lanka* i katriyenm pei dan lemond ki eksport plis e *Madagascar* ti ganny \$5milyon avek kannel lannen pase.

Vwala bann lide tanzib ki sa Bidze pe met a la porte Seselwa e i nou responsabilite pou sezi tou loportinite.

Alor letan Dirizan Lopozisyon i dir sa Bidze i mank sibstans – atraver ou Mr Speaker, mon oule demann Onorab Pillay ki sibstans i oule ankor?

Sa Bidze pe donn li en saler R53mil, 737. 33sou par mwan. I donn li en loto ofisyel, karbiran avek en drayver. I donn li en lofis avek en sekreter, en asistan personel e 2 konsiltan ladan. I donn li sekirite kot son lakour. Eski i santi i ankor mank sibstans?

I pe garanti en total saler R3milyon, 913 mil, 660 pou son 9 koleg *MNAs* dan Lopozisyon an 2021;

Son Parti *United Seychelles* pou ganny en kontribisyon pros R3milyon. Son Dirizan Parti pe al ganny en pansyon, mon estimasyon apepre R50mil koman ansyen Speaker tou lemwan.

Sekreter Zeneral son parti pe ganny en pansyon, mon estimen apepre R40mil koman en ansyen *MNA* ki'n servi apepre 3 term. Trezorye son parti pe ganny en pansyon koman ansyen Minis. Napa menm sibstans dan Bidze 2021, Onorab?

Sel keksoz ki'n napa sibstans ladan pou mwan se son diskour ki in lir, me i pa'n ekrir li menm.

**(APPLAUSE)**

### **HON GERVAIS HENRIE**

Mr Speaker, mon pe dir avek zabitan Mont Buxton ki mon reprezante isi anndan, zot annan par dan sa Bidze, malgre propagann Lopozisyon. Rekonstriksyon lekol La Rosière pe al ganny R38milyon. Proze konstriksyon nouvo blok lekol Beloni Segonder pe ganny R10 milyon sa i 2 landrwa kot nou zanfan i al lekol.



Travay renovasyon lo Sant Kominoter Distrik pe ganny R300mil. R1.2 milyon pe ganny prevwar pou bann pti proze kominoter dan distrik.

*PUC* pe ganny R780mil pou sanz tiyo dan rezyon tiyo delo dan rezyon Mont Buxton – La Rosière. Dapre dernyen konversasyon mon fer avek direkter proze Dimans, kontrakter in preski fini pas tiyo delo e met tou bann *fittings*. *PUC* i satisfè tou keksoz i annord e i reste zis pou ouver tiyo les delo koule.

*NSC* pe ganny en sonm R1.5milyon pou antretenir bann fasilite sportiv dan distrik, ladan mon plis ki sir bann *multipurpose courts* dan distrik a benefisye. Kort Mont Signal i annan plis ki 3 mwan, mon'n ekri lotorite konsernen e enform zot ki tou le de *ring basketball* i ater, tandis ki kort Greenwich plan pou konstri en fasilite twalet e landrwa asize in la tro lontan.

Parmi nouvo proze, ki mon ti a avar apresye vwar se travay pas tiyo sorti Le Niolle / St Louis pou vin Mont Buxton anpasan par Roche Bois konplete. I enportan ranplas sa bann tiyo *asbestos*. Dan proze sa proze in ganny retar, akoz en propriyeter in met Gouvernman otaz e pe

demann en konpansasyon R7 milyon.

Me mon ava admet, desizyon ansyen ladministrasyon pou taye e komans konstriksyon sa semen ki pas par dernyen flat Ex-Hines atan pou eleksyon Lasanble Nasyonal 2016 ti konpletman mal. Se en legzanp kales kase ki Prezidan Ramkalawan in koz lo la. Aprezan gete ki'n arive ? Letan konsiderasyon politik i pas avan tou, zis pou reste o pouvwar, ozordi en kominote in ganny met otaz.

Mon not en sonm R9.118 milyon anba lalis proze Departman Lenfrastruktir koman alokasyon *Special Housing Poverty Alleviation Projects*. Mon pe demande, mon pa pe fer malelve, ki posibilite en bout sa sonm i servi pou rekonstri ansyen lakaz *Emergency* koman en lakaz *semi-detached*. Sa i en propozisyon ki ti ganny fer avek departman konsernen depi Out 2017, sa lannen i fer 4an.

Mr Speaker, mon apresye demars Gouvernman pou komans en program restriktirasyon dan servis piblik avek bi pou anmenn plis lefikasite, koup depans e gaspiyaz e redwir labi.

Depi ki mon ti ganny elekte an 2016, mon obzekte legzistans Departman Lenformasyon, finalman en desizyon apropo sa departman in ganny pran.

Dan sa demars ki Egzekitiv pe fer, pou redwir lakantite departman ou lazans ki pe fer menm travay dan servis piblik, mon pe propoz sa bann lide swivan:

Ki *Seychelles News Agency* i zwenn avek *National Information Services Agency NISA*. Sa osi depi 2016 mon pe demande, ki Gouvernman i rezet plan pou entrodwir en Prozedlwa pou etabli *SNA* koman en antite ki debout lo li tousel.

*SNA* i plito merit vin divizyon *online NISA* e komans sarz lodyans pou akse serten son bann lartik ki byen reserse. Dan sa menm loptik, mon pe propoze ki Gouvernman i etabli en nouvo younit anba *NISA* ki a ganny responsabilite transform bann dokiman ofisyel dan laform nimerik – sa ki nou apel *scan* an *Anglais* sorti kot *Arsiv, DPA* avek *Rezistrar* parmi lezot.

Si Gouvernman, parey in leka *Maurice*, pa pran en desizyon pou enn fwa pou tou pou sov bann vye dokiman ki form parti nou patrimwann

istorik, nou pou perdi net en gran bout nou listwar.

Mon dakor avek lide Prezidan Ramkalawan pou Lenstiti Kreol vin en fakilte resers dan Liniversite Sesel.

Deza *UniSey* i annan son prop Lenstiti Langaz Kreol avek Resers Kiltir ki ti formen an 2016. Lemoman in arive pou met sa de lenstitisyon ansanm. Laliny Bidze Lenstiti Kreol a vin en don finansyel pou *UniSey* tou le lannen, ki ava ed li amelyore.

Tan ka batiman Lenstiti Kreol, mon pe demann Mer Lavil pou konsider servi son letaz savedir sa enn anler, pou gard en koleksyon lar Nasyonal lefet ki lontan nou pe rod en *National Art Museum*.

Mon osi akeyir lanons pou restriktirasyon *NISTI*. Mon krwar *NISTI* i bezwen restriktire pou li konsantre lo ed bann antreprenner Seselwa, pou devlop bann nouvo prodwi. Sa i ava enkli devlopman e komersyalizasyon bann nouvo teknolozi. Sa i a osi en loportinite pou sa lenstiti ganny en pe reveni. Me fodre ki rol sa antite i ganny re-oriyante spesifikman ver propagasyon linovasyon, adopsyon e lilizasyon teknolozi dan biznes, parey lobzektif nouvo Minister anba responsabilite

Mrs Devika Vidot pe anvizaze. Sa a anmenn lavites dan servis e osi redwir kou fer biznes e pri komodite lokalman.

Mon akeyir plan pou kreasyon en Lekol Ekselans avek lide pou fer li kot *headquarters* Minister Ledikasyon i ete. I en lide ki pou enspir performans e lanbisyon, bann zanfan; i ofer posibilite en nouvo partenarya ant Gouvernman e sekter prive; e si nou annan en Lekol Ekselans, pou mwan i fer sans ki nou materyaliz plan pou annan en lekol vokasyonnel pou bann marmay ki pa doue akademikman.

Mon pe propoze, ki *DICT* i ganny responsabilite kree en *portal*, ouswa *sitweb* kot tou lantrepriz lokal i oblize mon repete i oblize, fer lavertisman pozisyon travay ki zot annan lo sa *site* avan.

Pa tou dimoun ki lir zournal Nasyon ouswa regard televizyon toulezour. Avek en *sitweb*, sa ki pe rod travay i kapab tyeke nenport ler, e nenport landrwa kot i ete. Sa lide, i enn ki'n pe ganny aplike *Malaisie*, kot Gouvernman in entervenir pou asire ki son sitwayen *Malaisien* ki pe rod travay, pa ganny rezon pou dir zot pa ti konnen ti annan tel out tel loportinite lanplwa, mon pa

vwar nanryen mal pou nou Sesel adopte sa lide.

Mr Speaker, letan ki mon lo size restriktirasyon, mon pa kapab rat sa sans pou koz lo serten alokasyon bidzeter ki nou merit revwar: Ozordi, i annan en alokasyon pou parti politik ki'n ganny elekte dan Lasanble Nasyon pou asiste zot avek zot depans pandan lannen,

Eski nou pa kapab konsider en rediksyon ziska 25poursan lo sa sonm R6.5 milyon dan sa moman osteriter?

Pareyman ozordi, lartik 58 (2) e 66A (13) Konstitisyon i fer provizyon pou peyman en gratwite anyel pou bann ansyen Prezidan e Vis-Prezidan.

Pansyon tou le mwan ki zot gannyen i dapre Lalwa *Presidential Emoluments*. Apard sa pansyon ki ansyen Prezidan avek Vis-Prezidan i gannyen tou le mwan, zot osi ganny en gratwite 25poursan lafen lannen.

Eski zis en pansyon pa ase? Akfer fodre zot osi ganny gratwite ki dan Bidze 2021, i ariv R734, 906?

Kan nou ti dan Lopozisyon, nou'n koz bokou lo nesesite met en sonm limit ki Fon Pansyon Sesel, i merit pey bann dimoun ki ganny pansyon

retret pou asir soustenabilite sa fon.

Dan sa menm loptik, si i annan en landrwa kot nou merit komans sa leklersi e montre legzanp, i dwatet dan Bidze nasyonal ki fer provizyon pansyon bann pozisyon konstitisyonnèl.

Eski i pa devret annan en limit oubyen *capping* lo pansyon konstitisyonnèl? Nou bezwen mazine ki sa bann menm endividi i osi benefisyè avèk Pansyon Sekirite Sosyal e peyman Fon Pansyon Sesel.

Pansyon konstitisyonnèl pa devret en sonm egzorbitan, me en tokenn lapresyasyon ki pei i rekonnèt sa ki ou'n donnèn. I dwatet en sonm rezonnab.

Pou sit sif ki dan liv Bidze ki devan nou, nou annan 2 ansyen Prezidan ki pe tous R69 e R64mil pansyon konstitisyonnèl respektivman par mwan.

Nou annan 2 Vis-Prezidan ki pe tous R56 e R55mil pansyon konstitisyonnèl respektivman par mwan.

Pou bann ansyen Minis ki pe servi depi Premye Repiblik, sa alokasyon R7.3 milyon pou lannen 2021 i reprezant en total R608mil pansyon konstitisyonnèl par mwan.

Pou bann ansennyen MNAs ki'n servi depi Premye Repiblik i reprezant en sonm R1.2milyon pansyon konstitisyonnèl par mwan pou 65 MNAs an kontan bann ansyen Speakers, Depite Speakers, LGB e LOTO.

Me pa zis politisyen ki ganny pansyon konstitisyonnèl. I osi annan bann Ziz, Prokirer Zeneral, Ombudsman, Chairperson Komisyon Eleksyon e Anbasader. Nou pe viv dan en moman troublan. Sa i moman pou sakenn de nou, montre ki i vèdir ler nou dir mon en Seselwa avan tou, akòz mon pare pou donn mon kanmarad en sans.

Annou pa fer parey bann lezot pozisyon konstitisyonnèl, ki ti fer voras e pran zot gratwite anyel lafen lannen 2020, ler menm Prezidan ti fer lapel pou zot pa pran.

Mr Speaker, lo non mon distrik, mon byen apresye vwar bann sanzman ki pe fer dan servis piblik. Me mon ti a kontan vwar bann mezir al en pe pli lwen pou adres size bann pti lanpir dan Gouvernman, kot zot egziste fodre nou demantibil zot.

Mon mesaz pou tou travayer servis piblik i koumsa: Gouvernman pe anpoy ou akòz i bezwen ou. Ou annan en rol

pou zwe e fer sa ladministrasyon mars parey en biznes. Ou bezwen delivre. Ou napa en dyob pou lavi e alor ou krwar ou kapab trenn ou lipye. Koman *MNA*, mon fatige tay dernyen travayer servis piblik pou obliz zot rann servis mon bann *constituents* pou bann senp pti keksoz. Annou pa oublie, i sa menm dimoun ki pey ou saler ki ou pe fer vir an ron. Pou ou ki pe fer li arete !

*LDS* in ganny elekte lo en platform politik ki'n promet sanzman. Sanzman reel. Pou ki pep Seselwa i vwar keksoz ganny fer diferaman. Nou pe donn servis piblik en Bidze pou realiz sa promes.

Mr Speaker, Lopozisyon i bezwen avoue ki letan zot ti o pouvwar zot pann responsab dan fason ki zot in reazir vizavi kriz *COVID-19*. Bann mezir ki ti ganny enplimante, pa'n fer korekteman e dan fason ki byen.

Eski bann teknisyen Minister Finans avek Labank Santral, ti agree avek sa 25poursan rediksyon lo *loan HFC*? Ouswa kriter pou lasistans anba program *FA4JR*? Ozordi pa i annan en kantite kestyon en kantite konfizyon larepons nou bezwen konnen lekel ki ti pran desizyon final.

Problenm avek Parti *US* i se ki, dan nou moman maler, zot lapeti pouvwar i ogmante. Zot in pli enterese pou raport eleksyon zeneral 2020. Kantmenm zot kandida prezidansyel e Vis-Prezidan ti tenir portfolyo Minis Finans, a en moman dan zot karyer, zot ti pare pou plonz nou lekonomi avek zot.

Annou pa oublie, i fer dezyenm fwa parti *US* i rin nou lekonomi e fer nou al rann lapel kot *IMF*, sa pti pilil anmer, ki defen Prezidan Rene pa ti oule anvale.

Erezman Lepep Seselwa in anvoy *US* pronmnen. Zot in nepli la pou profit dan moman febles pou servi vilnerabilite nou frer avek ser, pou zot ganny ankor plis e partaz avek zot bann ser kordon ki pa merite.

Ozordi i kler ki repitasyon Parti *US* dan listwar nou pei i sinonim avek gaspiyaz, move zesyon e labi. Dan en pti rezimen kourt nou konstata ki.

An 2013, R1.8milyon dan Lanbasad Sesel *UAE* e 21poursan Bidze, ouswa R9 milyon atraver bann Lanbasad ti ganny depanse san okenn laprev;

Pou kreasyon *PDM* an 2011, *US* ti pey R15milyon.

An 2016, pei ti perdi \$6.7milyon atraver peyman pou

2 lakonpanyen *Irlandais* baze *Maurice* pou Kontra *FIU* e *NDEA*.

An 2018, pei pa ti ankor kolekte ziska \$35milyon an term *tax* dan *SRC*.

Tandis ki 1759 kliyan ti dwa *SBFA* en sonm R80 milyon *loan* omwen 3 *MNAs US* ti enplike dan sa skandal;

Ant 2015 a 2018, *AMSA* ti drwa Lazans Swen Lasante lavalan R40 milyon materyo pou sant dyaliz.

Ant 2014 a 2020, konstruksyon Stad Lanmizik ti sorti 5.1 milyon inisyaman pou ariv R22 milyon.

Ant 2014 a 2018, Parti *US* ti fer tranzaksyon lwe ouswa vann later avek *STC* pou en sonm R56 milyon.

Ant 1996 a 2019, Parti *US* ti ganny 46 morso later avek Gouvènmman, pou en lavalan R5.7 milyon, me laprev i montre ki zot in pey zis R250mil.

Ladan menm, Mr Speaker, zot pe fer kankan pou dir zot ki'n konstri *ICCS* e ki Leta i drwa zot R16.5 milyon.

Sa i bouton. Alor si Sesel i lo son zenou ozordi, lekel ki devret ganny zize?

Si Seselwa pe ganny klasifye koman vilnerab e pov, lekel ki merit rann sa bann byen malaki?

Mwan, mon en optimis. Mon krwar dan rezilyans pep Seselwa. Nou Nasyon in prouv son abilite pou sirmont divers defi e pou prospere de nouvo a plizyer repriz o kour nou listwar date 250an.

Me sa progre pan ariv par azar. Sesel modern in zour stabilite, lape, devlopman avek bann lenstitisyon efektiv aköz en Lopozisyon responsab ki'n la depi 1993.

Sa Lopozisyon yer, ozordi i Gouvènmman. Pa tro krwar, ki aprejan nou pou les en pti group foutter de zour vin menas stabilite nou pei ...

**(APPLAUSE)**

**HON GERVAIS HENRIE**

... avek zot lesey dezespere pou ensit vyolans.

Mr Speaker atraver ou mon oule rapel *Leader* Lopozisyon en parol mon ti dir avek li dan en *taxi* pe al lo *Airport* Lonn an 2018. Mon ti dir li ki pou annan detrwa moman dan listwar politik nou pei, kot en zenerasyon politisyen pou bezwen debout kot a kot malgre nou diferans ideoloji pou defann Sesel e rod sa ki meyer pou li.

De fwa depi retour miltiparti, nou vwar en Dirizan Lopozisyon demontre sa

grander lespri, klervwayans e matirite politik.

Les mwan mon rapel zot ; - Prezidan Ramkalawan ti diriz en lekip *SNP* - ki mon fyer mon ti form parti - koman en Lopozisyon lwayal avek Sesel, lwayal avek Sesel ki ti solider avek ladministrasyon Prezidan Michel dan lenplimantasyon reform makroekonomik 2008.

Nou pa ti ensit Seselwa pou mont lo semen. Lot lenstans, ti pandan kriz piratri *Somalien*, sa ti lesel moman dan listwar Lasanble Nasyonal kot Lasanble ti ganny *recall* pandan *recess* pou en Sesyon Dirzans, pou diskit en Mosyon *sponsor* konzwentman par Msye Ramkalawan koman Dirizan Lopozisyon e Mrs Marie-Louise Potter koman *LGB*.

Mr Speaker, Onorab Pillay i annan ankor bokou pou aprann. E i merit fer li avek liminite pou li kapab vin sa vre Dirizan Lopozisyon.

Ozordi nou pe debout lo en presipis ant lespwar avek dezespwar. Letan mon ekout son diskour dan ki in esey kestyonn lentegrite sa lekip teknisyen ki'n pas sitan lannwit pou prepar sa dokiman Bidze – mon demann mon lekor ki son perspektiv lo nou sityasyon ekonomik nou pei ozordi? Eski i vwar nou ver lanmwatye

vid ouswa in vwar lanmwatye plen?

Preski son lekip antye ki'n enkli Onorab Lemiel, Vidot, Uranie e Loze, in reste pri dan negativite. Olye eksplik Seselwa ki mannyer zot pe benefisye direkteman dan sa Bidze zot dekrir li vag.

Olye dir nou ki kantite Seselwa ki'n geri avek viris *COVID-19* e ki kantite ki'n ganny vaksinen – zot vin koz lo to lenfeksyon e selektivman sit enn de statistik ki zot kapab servi pou abes nou pei pli ba. *Shame on you US!*

**(APPLAUSE)**

**HON GERVAIS HENRIE**

Mon forse dir zot sa, akoz Sesel pa koze. I sibir zot traizon an silans akoz i realize, ditor nou fer li, se ditor nou prop lekor. Eski sa 120 mil *Anglais* ki'n mor, Premye Minis Boris Johnson ki'n touy zot?

Eski sa 10 *Mauricien* ki'n mor akoz *COVID-19*, eski Premye Minis Pravind Jugnauth ki'n touy zot? Annou koz sa ki fer sans. Sel Gouvernman ki'n touy dimoun dan listwar Sesel, se lekel?

**(APPLAUSE)**

**HON GERVAIS HENRIE**

Zot ki pou reponn sa keston.

Pou konklir Mr Speaker, mon apresye loportinite, kot mon donn mon premye larepons lo en diskour Bidze koman en *MNA* parti mazoriter ki osi o pouvwar. Sa i en loportinite ki zabitan Mont Buxton in konfye mwan atraver en dezyenm manda.

Mersi pou krwar dan mwan avek parti *LDS*. Sel keksoz mon demann zot, se pou kontinyen fer konfyans nou Gouvernman. Pou nou kontinyen travay ansanm e akonplir sa ki meyer pou nou pei avek nou pep. Ansanm annou fer nou mye pou asire ki lasante, sekirite e byennet sak Seselwa – sirtou bann ki pe pas dan dir an se moman i ganny byen pran ka avek.

Ansanm annou lager pou redres lekonomi nou pei avek menm viger, ki nou pare pou koup depans Gouvernman, retir labi ek koripsyon dan servis piblik e retir depandans lo lasistans sosyal pou bann endividi ki kapab travay.

Nou pe ganny teste koman en Nasyon e koman en pep. Par devan pou annan moman pli dir ankor. Me mon swete ki lespri solidarite avek linite pou sa ritm ki nou pou mars lo la ansanm akote kanmarad ver sa lalimyer

o fon tinel. Mon lapriyer toulezour i se ki koman Seselwa, nou a kontinyen donn kanmarad en sans e nou a kontinyen pran swen avek enn a lot. Mersi pou ekout mwan. Mersi Mr Speaker.

**(APPLAUSE)**

**MRSPEAKER**

Mersi Onorab. Onorab Arissol.

**HON SANDY ARISSOL**

Mersi Mr Speaker. Bonn apre midi Mr Speaker. Bonn apre Midi Minis avek *PS* Thesee. Bonn apre midi *Leader* Lopozisyon, *Leader* Gouvernman Biznes e tou bann Manm Lasanble Nasyonal, zabitan Bel Ombre, tou Lepep Seselwa e ou nou bann frer ki viv aletranze.

Mr Speaker, avan mon komanse mon ti a kontan demann bann zabitan en leskiz an vi ki zot vwar mwan pe koz dan en *mask*, me mon menm mwan ki la.

*(laughter)*

**HON SANDY ARISSOL**

Mr Speaker, i ava fer mon premye diskour lo Bidze ki mon'n ganny sans koman Manm Lasanble ki sorti dan parti mazoriter, ki pe reprezant



distrik Bel Ombre. Mon anvi dir mersi zabitan Bel Ombre pou zot donn mwan sa privez pou koz lo zot non.

Mr Speaker, Bel Ombre in en distrik kle dan devlopman pei an sa ki konsern Bidze, *tax* e osi sa konponan deviz pou pei. Bel Ombre i en distrik ki annan en laspe touristik, en laspe alimanter kot son zabitan i kontan plant dan lakour e osi vann son fri ek son legim avek lezot. En laspe lamarin kot nou annan bokou bato lapas e en gran group peser ki kontribye dan lekonomi nou pei.

Mon swete ki Bidze i fer provizyon pou ki nou por lapas avek bann neseseite ki Minis ti vizite i ganny met an plas. Elektrisite avek delo spesifikman. Ki nou por lapas i ganny devlope apre tou sa letan ki in la Bel Ombre koman en moniman. E mon swete sa kominikasyon ki egziste ant Minister Lapas ek Lasosyasyon Peser Bel Ombre i kontiny lo en bon semen pou ki en *Scheme* lasirans, en nouvo *Scheme tax* pou bann peser tousala i ganny met an plas apre ki zot in zis tann koz lo la pou plizyer letan.

Koman sa enn ki'n ganny sa privez pou reprezant sa distrik depi lo lapwent Anse Major, letan ou loter Dan Zil, Mr Speaker. Ou pas kot Patricia

Laboudallon ziska anba montanny kot Madanm David an alan Mare Aux Cochons, e tou sa laspe touristik e andemik i fer ki nou distrik i vin en distrik inik dan li menm, avek sa ki nou annan konpare avek lezot distrik lo Mahe e dan Sesel. Bel Ombre sa.

Mr Speaker, mon komans koumsa akouz mon anvi ki nou tou apresye sa ki nou annan ozordi, e protez sa ki deza la pou ki nou zanfand i kapab apresye lasyer e fri travay ki sakenn de nou nou'n sakrifye, nou'n devoue e plante dan later Sesel.

Ozordi parey Minis Finans in dir, nouvo Gouvernman in pran responsabilite pei dan en moman kot lemonn e Sesel pe fer fas avek difikilte, me Gouvernman i pli determinen ki zanmen pou li anmenn Sesel ek Seselwa pli lwen.

Mon kontan lapros ki'n ganny pran pou retir nou pei kot i ete ozordi. Gras a *COVID*, me pli enportan se sanz fason ki nou pei in ganny dirize pandan plizyer lannen. Bout ki mon'n pli kontan, se enstri dan nou pep pou pran nou responsabilite. Aret depan lo Gouvernman e vin pli inovativ dan pran responsabilite nou menm, nou fanmir avek nou pei.

Me parkont *COVID* in fer nou reveye dan nou vye fason fer keksoz. In montre nou tou diferan *skill* ki nou ti napa oubyen bann *skill* ki nou ti annan e nou pa ti pe servi e sa in fer ki nou'n sorti dan nou konfor. Menm labank ozordi fodre ou parey en *Ninja* pou ou ganny ou larzan, savedir ou bezwen antre dan en *mask*. Si ti napa *COVID*, kote ou ti pou dan en *mask* labank pou tir ou larzan, san ganny difikilte avek sekirite devan laport?

Mr Speaker, en keston ki mon anvi demann avek Lepep Seselwa, avek nou tou ki pe ekoute ozordi. Eski se Mr Danny Faure avek Parti *US* ki'n anmenn *COVID* Sesel? Kestyon ki mon anvi demande, eski se Prezidan Ramkalawan avek *LDS* ki'n anmennen *COVID* Sesel? Mon repons Mr Speaker, i reste non pou tou lede. Me *COVID* in debark Mahe, ozordi i pe fer letour dan Sesel.

Eski nou koman en Gouvernman nou pa pe fer ase, nou pa pe fer tou pou nou kapab edik, enstri e siport nou pep pou konbat sa pandemi parey lemonn pe fer?

Eski si enn ou zabitan i mor ou vire e ou blanm Minister Lasante, swa ou blanm Gouvernman. Eski ler enn ou zabitan i refize pran son vaksen

ou blanm Gouvernman? Eski ler nou koman en pei e sitwayen pa pran son responsabilite, nou vire e blanm liniver? Mr Speaker, mon poz sa la.

Mr Speaker, letan enn nou zabitan i mor avek *COVID*, nou pa kapab fer politik avek. Nou bezwen les nou mor repoz anpe. Zis parey Madanm Jeannine Chung-Faye in fer resorti bomaten. Les nou bann mor repoz anpe.

Me parkont Mr Speaker, nou bann frer ek ser ki'n mor avek *COVID*, nou pa kapab konpar zot avek enn nou frer ki'n ganny anmase dan *Marine Park* Ste Anne. Nou pa kapab konpar sa. Letan nou anmas enn nou ser oubyen enn nou frer i disparet lo later Sesel. Perdi, person pa konnen oli li. Letan enn nou frer i ganny eksploz dan en transpor, i ganny brile avek lasid, son fanmir pa remark li. Nou pa kapab konpar sa avek en dimoun, enn nou frer, enn nou ser ki mor avek *COVID*.

Mr Speaker, me parkont tou sa bann atosite ki mon'n koz lo la, nou ti kapab anpese, Mr Speaker. Me parkont en Gouvernman ki ti sitan kontan son pep, se li ki ti ordonnen pou fer tou sa atosite avek nou bann frer, avek nou bann ser. E ozordi i blanm Gouvernman si

enn nou frer oubyen enn nou ser i mor avek COVID.

Mr Speaker, letan en Manm i vini, i vin avek bann lekspresyon imaze pou donn lenpresyon i entelizan oubyen i en lot plannet dan liniver, mon anvi dir li in *fail*! Nou tou nou konnen ou rezilta en latet zonnyon.

Letan ou pa krwar dan Bondye Mr Speaker e ou toultan koz mansonz. Fabrik mansonz lo enn ou ser e enn ou frer. Ler ou pa krwar koman en kretyen, ou pa krwar dan Bondye parfwa ou sey bwar pwazon oubyen ou sey met dife, pa pou anmenn ou okenn par, Mr Speaker. Me sa ou ganny apele dan term Kreol, an vi ki nou dan semenn lalang maternel. Ou ganny konsidere koman en bandi lo later Sesel.

**(APPLAUSE)**

**HON SANDY ARISSOL**

An Franse nou ti ava dir ou'n vin en *flonflon de paris*..

*(laughter)*

**HON SANDY ARISSOL**

Me parkont Mr Speaker, mwan mon pou profite ankor e ankor pou mwan remersye bann travayer lasante pou zot zefor ek zot senserite, pou diriz e gid

nou dan sa travay. La sa responsabilite i mor lo travayer Minister Lasante. Letan ti annan dife lo *landfill* sa lager ti pou Lazans Tenny Dife. Ler i ava annan en dezas dan pei sa lager i ava al ver DRDM. Sakenn nou responsabilite, *chacun pour soi, mais Dieu pour tous. L'homme propose mais Dieu dispose*. Kouraz mon bann frer ek ser dan Minister Lasante. Ankor enn fwa mersi bokou e annou aplodi zot byen for.

**(APPLAUSE)**

**HON SANDY ARISSOL**

Mr Speaker, se pour sa rezon nou lo kote LDS nou pou asire ki Bidze Minister Lasante i ganny aprouve. Nou pa zis siport zot lo ledan, me nou pou aprouv zot Bidze. Pour ki bann travayer menm dan sa moman difisil ekonomikman ki nou ladan, bann travayer lasante i ava ganny tou zot benefis ki Minis in anmennen pou zot.

Mr Speaker, eski Bidze prezante par Minis Hassan dan sa nouvo Gouvernman, pe al aboli sekirite sosyal?

Eski Bidze prezante par Minis Hassan pe al aboli pansyon ki nou bann vyeyar i gannyen ?

Eski pe al aboli lasistans ek benefis sosyal ki nou bann zanfan, nou bann orfelen zot gannyen? Oubyen bann dimoun avek en dezabilite spesyal, en abilite spesyal, eski tou sa bann benefis ozordi ki Bidze pe anmennen pe al ganny aboli?

Alor mon kit sa la pou nou bann frer ek ser Seselwa ki pe swiv, konpran, ekoute e analize.

Eski Gouvernman pe al aboli sa ki nou appel *part rental*? Oubyen avek labi ki'n egziste pou plizyer lannen anba en Gouvernman US, Gouvernman pe al entrodwi en sistenm *capping* si mon'n byen konpran. Ki tou dimoun i ava ganny asiste parey. Me non, sa enn Bel Ombre i ava ganny 10mil me sa enn Port Glaude li i pou ganny zis R1500. Eski sa i fer ki Bidze i mank sibstans parey nou'n ganny dir, Mr Speaker?

Eski Bidze ki pe ganny prezante par Minis Hassan napa lapey pou travayer dan sekter piblik? E pou fer, e si pou napa lapey bann sekter piblik sa i pou fer ki bann Digwa pou mor lafen e pou kontinyen al lo peron zot MNA, Onorab Rocky e menm vol son kastrol bouyon bred lo dife dan son lakwizin !

(laughter)

### **HON SANDY ARISSOL**

Mr Speaker, eski US pa ti dir son MNA, Onorab Rocky Uranie, ki dimoun pou vin lo ou peron akoz ou osi ou ti al lo zot peron pou al rod zot vot. Alor Mr Speaker, mon ti a kontan dir avek Onorab Rocky, olye konplent Onorab, debarbouye al debourye pou Digwa!

Eski Bidze pa in fer provizyon ki La Digue i ganny en nouvo lopital, pou ki bann manman ava kapab kwi manze pou pti baba parey zot Onorab pe rode. Me olye fer petisyon Onorab, koz lo bal zonnyon, koz lo kilo zonnyon e koz lo latet zonnyon siport Bidze, aprouv Bidze. Bann manman a ganny landrwa pou kwi manze pou zot pti baba Onorab.

Mr Speaker, letan Onorab Ghislain i vin dan Lasanble Nasyonal dan son palto, e i dir ek Digwa ki pli ale zis en pe dimoun ki pou kontinyen met palto dan sa pei. Mon anvi dir avek Onorab Ghislain, Mr Speaker, wi mon dakor avek li, parske zis li ki annan drwa vin dan Lasanble Nasyonal e met palto. Me Sheryl Louise, Bel Ombre, pa ganny drwa li. Paul Ernesta, Takamaka pa ganny drwa. Zis Onorab Ghislain ki

pou annan drwa met palto dan Lasanble Nasyonal.

I annan en bann ava annan lakaz La Digue, zot ava annan osi lakaz lo Mahe e zot a kontinyen met palto. Parey i annan plizyer zot Mr Speaker, enkli Onorab Ghislain, i annan plizyer zot ki ti refize pey zot *loan*. Sa osi i enportan pou Lepep Seselwa konnen dan sa moman difisil ki nou ladan. E Onorab Ghislain i enn menm Mr Speaker, ki lo lalis ki ti refize pey son *loan* kot *SBFA*. E mon swete la ozordi ki in nobou rann son *loan*. Rann ou *loan* Onorab. Mersi bokou, Mr Speaker.

Letan Onorab Ghislain i koz lo pri marsandiz, Mr Speaker, mon anvi dir li, lekel ki'n dan Lasanble a 3 repriz, Mr Speaker, pa Onorab Ghislain? Pa son Gouvernman ki ti o pouwar tou sa letan? Eski i ti napa kouraz pou koz lo pri marsandiz pou zabitan La Digue? Mr Speaker, mon kit sa la pou li reflexir lo la.

Eski Bidze pa'n fer provizyon pou asiste bann fermye e rode kote nou pou pli kapab ed zot. Tou sa letan *US* pa ti konnen Mr Radegonde i egziste? Onorab Ghislain ler ti *MNA*, pa ti konnen Mr Radegonde i egziste? Onorab Noline Sophola, ler i ti la i pa ti konnen Mr Radegonde ti

egziste? Onorab Tep Constance ler i ti la, i pa ti konnen poudir Mr Radegonde i egziste? Gran mersi en latet zonnyon i fer Mr Radegonde vin popiler?

*(laughter)*

### **HON SANDY ARISSOL**

Mr Speaker, eski Bidze in kennsel tou letid bann zenn Seselwa aletranze? Oubyen sa sityasyon *COVID* dan serten sa bann pei ki in fer ki nou bann zenn zot ankor Sesel. Annou pa oublie sete sizyenm Lasanble ki ti kriye aotvwa pou fer nou bann Seselwa, nou bann zenn Seselwa ki ti pe etidye desann aköz sa sityasyon. Anmezir sityasyon i ava amelyore nou bann zenn pou kontinyen anvole, Mr Speaker.

Mr Speaker, avek tou sa koripsyon ki'n pase dan nou pei anba *US*, nou Gouvernman atraver nou Minis Finans ek son teknisyen, e atraver tou bann travayer zot in nobou met ansanm en Bidze pou nou pei. Mr Speaker, mon anvi dir zot mersi bokou *PS Thesee*. Mersi bokou avek ou lekip e nou aplodi zot byen for silvouple.

***(APPLAUSE)***

### **HON SANDY ARISSOL**

Mon anvi dir avek Minis Mr Speaker, kantmenm ou'n ganny kriy avek, ou'n ganny sey fer per, zot in sey imilye ou. Reste for Minis, sa ki zot in toultan fer oparavan, zot kontan *bully* bann Minis, *bully* bann teknisyen e fer zot per. Se sa sityasyon ki nou ladan ozordi parski bann teknisyen ti ganny *bully* anba dernyen Gouvernman! Me nou sa Lasanble Nasyonal nou pou siport ou avek tou ou bann travayer Minis.

Mr Speaker, mon kontan e Lepep Seselwa i kontan lalis pou *FA4JR* ki'n sorti e in vin piblik. sa osi zot ti refize e zot ti rod tou leskiz pou pa donn nou sa lalis. Pa bliye sa bann moman ki Lasanble Nasyonal ti ganny dizourd mal apropo. Seselwa zot rapel laba deor? Akoz? Se la kot labi ti pase. Kestyon ki mon anvi demande Mr Speaker, kote Minis Cosgrow ti ete sa letan ki ozordi i dan Lasanble Nasyonal ?

I pa ti mazin bann pti biznes sa letan li? Letan bann desizyon banal ti ganny anmenn kot *Cabinet*, kot i ti ete sa bann letan li? Rezon i senp, labi e ankor labi. Apre zot a ganny lodas e kouraz pou vin koz lo lasyet manze pou Seselwa.

Letan zot dalon ti pe donn bal dan nou larzan, e menm bann ki pa ti bezwen ti ganny asiste. Biznes ki ti *dormant*, biznes ki'n fer milyon, bann endividi ki pe lwe zot lakaz, zanfan pe al lekol prive, fek aste transpor nef, selman Mr Speaker, zot menm ki'n ganny asiste anba vye sistenm.

Biznes ki'n ganny milyon an term lasistans, se li menm ki'n donn lasanm lotel pou nanryen avek gro sef dan *US*. Mr Speaker, Lotel Ile du Nord i lo lalis. I lo lalis Lotel Ile du Nord, mon vwar Vis-Prezidan Meriton, ansyen Vis Prezidan in monte e in ganny en *défrayé de tout*. E sa in kout pei plizyer milyon Roupie an term reveni.

Mr Speaker, mon anvi dir avek bann *US*, letan zot pe rode kote Prezidan Ramkalawan in ale, rode kote zot ansyen Vis-Prezidan ti ete Desanm. Prezidan Ramkalawan li i pe kontinyen rod bann pyes, pou sey met ansanm avek nou kales kase pou sey re dres li. Se pour sa rezon i monte, desann. I pe rod pyes pou sa kales kase, Mr Speaker.

Ki mannyer apre tou sa bann lese fer Mr Speaker, zot ti espekte ki Gouvernman i donn en trezyenm mwan saler lannen pase? Me se zot menm ki ti kriye get malere, get Seselwa

apre ki zot, zot in otoriz en kantite depans pa neseler, en kantite gaspiyaz. Apre zot vire e zot dir donn Seselwa en trezyenm mwan saler.

Mr Speaker, fodre tou bann ki pa ti merite zot devret rann sa bann lazan. Se la kot *LOTO* ti dir lo non *US* annou aret konplent koripsyon, fer aksyon. Mr Speaker, la mwan mon demann avek Gouvernman pou fer premye aksyon, fer tou sa bann biznes ki'n ganny larzan ki pa ti merite, fer zot rann sa bann larzan, koumsa i ava kapab antre dan kof Leta pou nou asiste nou bann frer ek ser Seselwa.

**(APPLAUSE)**

**HON SANDY ARISSOL**

Zis parey Prezidan ti dir dan enn son speech ki Onorab Lemiel ti *remind* nou dernyen fwa kot i pou pran avek bann ki ris e redonne avek sa ki pov. Mr Speaker, in fer en aksyon, in pran 40 morso later avek bann Alibaba, bann voler e in remet avek Leta. Zis parey Maison du Peuple osi ki'n ganny donner avek Lepep Seselwa. Parey in ganny dir, li osi mon krwar i bezwen retourn a Lepep Seselwa.

**(APPLAUSE)**

**HON SANDY ARISSOL**

Maison du Peuple pa pou fanmir bann gro dimoun sa, me pour Lepep Seselwa, Mr Speaker.

Tou biznes ki pa'n pey zot *tax* anba *US*, fodre ki ladministrasyon i fer zot pey zot *tax*. I ava antre dan kof pour ki Desanm tou Seselwa ava kapab omwen avek lagras, si tou i mars byen, ganny zot trezyenm mwan saler. Fotespere Seselwa enkli bann siporter *US* zot konpran, aköz ti napa en trezyenm mwan saler dernyen fwa.

Sa diskour ki Lopoziyon ti devret fer koman en Lopoziyon ki pou la pou plizyer lannen. Olye dispit ek Minis, lager ek bann Seselwa ki reste aletranze, ki pe fer bann komanter lo rezo sosyal. Mr Speaker, sa i sagrinan parske zot bliye se zot Gouvernman ki'n anvoy plizyer sa bann Seselwa aletranze. E se pou rezon zot pe koz atraver rezo sosyal.

Plizyer sa bann Seselwa ti perdi zot lasyet manze, e zot fanmir ti ganny martirize e viktimize. La ozordi sa menm parti politik zot ganny lodas e toupe koz lo lasyet manze e koz lo lasyer Seselwa.

Mr Speaker, mon ti a kontan demann Minis, letan ou rann nou repons Minis, sey rod en pe leksplikasyon, mon ti a kontan lo sa bann gard Botswana yenn ki ti vin Sesel la. Ti annan en karantenn zot ti antre dan pei, ti pe lwe en lakaz ziska R50mil anler Anse Boileau. Minis rod en pe lenformasyon, dir nou konbyen ti koute sa bann Botswana yenn. Ki zot ti vin fer Sesel Minis, rod en pe detay pou nou.

Zot ti vin *spy* lo bann Manm Lasanble Nasyonal? Zot ti vin *spy* lo bann Minis? Zot ti vin *spy* lo bann zofisye dan *SPDF*? Minis rod en pe lenformasyon pou nou konnen konbyen ti kout pei tousala. E mon profite demann Onorab Pillay koman *Chairman FPAC*, pou nou fer en lanket dan sa zafer. Rode akoz sa bann dimoun ti vin isi e ki zot rol ki zot ti fer e konbyen in kout pei.

Mr Speaker, apre ki parti *US comme* dir Onorab William, zot in antonn zot ta bannann mil e i annan en bann ti pres pou toufe, zot anvoy tou zot lapo lo nou, parey zot abitye fer. La ou krwar dan sa Lasanble i annan en nouvo parti politik ki dan Lopozisyon. Zot paviyon i *COVID*, zot moto Lasyet Manze, zot logo se en Latet Zonnyon. En nouvo part politik sa.

Olye koz lo lasyet manze, zot devret kanmi e onte pou zot koman bann Manm, e koman en parti ki swadizan ti annan lepep aker! Soutir tou sa bann labi dan nou pei. Les bann Irlande antre dan nou pei parey in ganny dir, vann nou pei pou 2 boutey *whiskey*, kontra in disparet *State House*. Fer bann dil sal e en Avoka ti ganny peye zis R300mil par mwan. La ozordi li osi i an Irlann.

La kestyon pou zournalis demande, Mr Speaker. Degre bann *SPPF* ti malen, pli entelizan ki Minis, voler i pas obor zot nennen zot pa vwar.

Si en group dimoun in kapab vol en Gouvernman, eski zot ti vreman Kosto, Kapab, Konpetan parey zot ti apel zot lekor? Oubyen senpleman zot ti parey, mon pa ava dir. En latet zonnyon, dan en kilo zonnyon, dan en bal zonnyon.

Zot in soutir zot dalon, Mr Speaker. Pran *loan* kot *SBFA* e pa rann zot *loan*. I annan en bann in taye, lot in kite e sa i fer ki bann travayer ki ti pe travay onnetman kot *SBFA* in bezwen sanz zot plas travay, menm si zot pa ti anvi. Akoz zis detrwa zot ki ti krwar pei pou zot.

*SBFA* ti'n vin en labank pou en en pti group fanmir, ser, frer, tonton, belser, dalon, travayer. E zot ki ti a pe donn



bal dan nou larzan. Pa bliye i annan enn la anndan tou!

Mr Speaker, e zot ser menm ki ti vin *garantor!* Gran mersi *LDS* i demaske zot e apre zot ganny lodas vin koz lasyet manze e donn en trezyenm mwan saler bann travayer. Zot in donn bal dan benefis sosyal. Menm si sa pa ti devret gannyen in gannyen. Zis Minis i telefonnen i dir donnen, “larg dilo Madanm Bal, *comme* dir Jean-Marc Volcy. Letan zot ti *busy* pe akiz Naddy Zialor in vole e son *laptop* ti dan lakour kot mwan Bel Ombre. 1.3 milyon perdi, 1.8 milyon perdi. Minis Cosgrow kot i ti ete, Mr Speaker sa letan li? I ti la, i pa ti la li? Mon kit sa la.

Bann kart *STC* kot sakenn i ganny diferan sonm, kart en bann i vann e bann zis pa servi. Larzan kredi ki annan kot *PUC* pou senpleman pey *bill* detrwa endividi, swa dalon. Tousala i annan, Mr Speaker. Ki mannyer ou espekte ozordi i annan larzan dan kof, pou nou kapab asiste bann dimoun la deor?

Bann proze dan distrik ki’n ganny fer san Minis konnen. Proze semen ki’n deservi zis en fanmir, kan larestan fanmir zot malad ti bezwen desann dan fotey. Ti

annan en lari ki ti ganny konstri zis pou servi en Larue.

Tousala Mr Speaker, sa pti pei in sibir anba *US*. La zot ava ganny lodas vin koz lo lasyet manze Seselwa! Si nou ti les zot ankor 5an *mon Dieu Papa*, nou pa ti pou egziste koman en Nasyon *weh*, e en pei! Zot ti pou’n vann nou avek Sesel. Foutou!

Me Speaker, dan tou sa detres diskour Minis dan son finisyon i koz ansanm pou pei. Sa i bon mo *comme* dir Onorab Gill, ‘*Together!*’ I bon note akoz nou osi nou krwar ladan Minis, *together*. Travay e rod byennet pou Seselwa. Minis in dir fodre nou tou, e mon repete nou tou nou devret fer sakenn son bout pou ki nou pei i sorti lo son zenou kot *US* in met nou e *COVID* in zwenn nou.

Sa Ramkalawan ki zot ti dir zanmen pou monte *State House*, i *State House* Onorab Loze. Sa *LDS* ki zot pa ti oule, nou pou la pou plizyer lannen Mr Speaker, Onorab Ghislain. Sote, pile, al egzile sa ki oule. Sa ki’n pran pou rann, Onorab Uranie. Sa ki koupab pou ganny zize Onorab Vidot.

Bann det ki zot ek zot Gouvernman in fer, Onorab Gill in dakor, in aksepte pou nou travay dir ansanm pou nou kapab met pei lo en bon semen.

Tande Onorab Gabriel, bezwen pran legzanp, Mr Speaker.

Alor mon ti a kontan zot dir avek sa detywa siporter ki reste dan bazar Onorab Cosgrow, aret dir ek Seselwa lala tik anler sa, sanmenm sa bann mezir. Pa akoz tik anler ki nou bezwen enplimant serten mezir, Onorab Lemiel in *remind* nou. Me nou pou kontinyen pran ek ris pou nou donn sa ki bezwen. Serten mezir pe ganny enplimante. Se sa, akoz *US* ek son 144 voler ek detywa siporter ki pa ti tro konnen ki zot pe siporte, parey Onorab Pillay ki'n anmenn pei kot i ete ozordi.

An vi ki Sesel i pou tou son zanfan, Onorab Aglae ek sa lalis ki ou'n mansyonnen, atraver ou Mr Speaker, menm si in bliye mansyonn Madanm Proks.

*(laughter)*

**HON SANDY ARISSOL**

Mon anvi dir li, Bel Ombre osi zanfan, nou zanfan Sesel nou. Se pour sa rezon mon pou donn sipor Bidze prezante par Minis Hassan. Zabitan Bel Ombre ki leve al travay pou kontinyen ganny zot saler. Pour ki tou paran ki vreman bezwen lasistans sosyal i gannyen, dapre son merit. Pour ki sa manman tousel ki bezwen sa lasistans *part rental* i

kontinyen, e tousala ava ganny fer dan tou transparans e sa ki merite i ava gannyen atraver sa Bidze.

Pou konklir Mr Speaker, pou ou ki ankor pe asiz lo ou deryer pe get dan lesyel, fodre ou leve al travay, pou ou form parti sa lot Bidze ki pou ganny prezante par nou Minis e par nou Gouvernman. Ou ava fer sir ki ou osi ou ava ladan. Pa les ou ganny kit deryer. Form par sa Sesel ki annan plizyer loportinite prezante dan sa Bidze par Minis Hassan.

Mr Speaker, mon anvi dir avek Lepep Seselwa ansanm, nou kapab fer li e ansanm nou pou fer li, pour Bel Ombre, pour Sesel e pour Lepep Seselwa. Mr Speaker, mon ti a kontan remersi ou.

***(APPLAUSE)***

**MR SPEAKER**

Mersi Onorab. Onorab Loze, zis dir mwan kisisa ki ou anvi adres silvouple avan ou komans adrese.

**HON JOHAN LOZE**

Mersi Mr Speaker. Mr Speaker, mon zis anvi kontan ganny ou gidans lo *plagiarism* silvouple. Akoz si en Manm i al dan Parlman *L'Australie*, i pran *speech* Mr Antony Albanese, i

tradwir an Kreol e i fer vin lentrodikeyon son *speech* lo Bidze dan Lasanble Nasyonal Sesel, mon an vi konnen ...

**MR SPEAKER**

Aret la. Aret la silvouple, Onorab Loze. Mon pa pou kapab *rule* lo sa size. Mersi. Non.

**HON SEBASTIEN PILLAY**

(*Off-Mic*)

**MR SPEAKER**

En *point of order*. Yes Onorab Pillay.

**HON SEBASTIEN PILLAY**

Yes. Mr Speaker, mwan mon annan en konsern, se ki si en Manm lo mon kote latab i *raise* en *issue*.

**MR SPEAKER**

Wi.

**HON SEBASTIEN PILLAY**

E mon apresye ki ou'n donn ou *ruling*. Me selman mon kontan osi ki ou'n les li koze pou ou kapab donn en *ruling*. Akoz lafason ki ou'n koz ek li, se ou pe dir, pa koz ditou. Ou konpran.

**MR SPEAKER**

Non.

**HON SEBASTIEN PILLAY**

Se sa ki mon pe fer kler. Akoz si par egzanp mon ti pou met en size devan ou petet, akoz mon pa oule fer en *issue about* sa.

Pran *Order 59(5)*.

**MR SPEAKER**

Wi.

**HON SEBASTIEN PILLAY**

Mon pa konnen si ou'n ganny sans get lir.

**MR SPEAKER**

Ale, dir nou ki i annan ladan.

**HON SEBASTIEN PILLAY**

*Order 59(5)* i koz lo *imputation against another Member*. Ok? Mwan en kantite keksoz in ganny dir la lo tou lede kote latab, i normal pou nou tou koze. Si nou pou re striktir lankadremman travay e nou pou met *Order 59(5)* dan bin, i ok. Me si nou pou respekte li, nou tou nou respekte li. Akoz mon napa problemm avek sa mwan. Mon'n byen apresye tou bann *speech* fer par lot kote latab. Parey nou nou'n koze, lot kote in koze. Napa problemm ek sa. Mersi Mr Speaker.

**MR SPEAKER**

Pou nou lenstriksyon, lir nou *Order 59(5)*.

**HON SEBASTIEN PILLAY**

*59(5) i dir ou the conduct of the President, the Vice-President, Speaker, Deputy Speaker, Ministers, Leader of the Opposition, Leader of Government Business, Members or Judges of Superior Courts and Magistrates and all constitutional appointees and their families, shall not be referred to except upon a motion moved for that purpose.*

Now, koman Speaker *it's your determination* pou ou realize, si en dimoun i fer sa. E mwan mon ti a kontan pou benefis bann Manm, nou tou nou anvi dir en kantite keksoz, me se pour sa rezon ki mwan mon pou *refrain* dan *impute* oubyen atak karakter Minis personnelman. Mon ava fer serten komanter lo Polisi me pa lo karakter dimoun.

**MR SPEAKER**

Wi, eski sa *Order* i komans *the conduct of ...?*

**HON SEBASTIEN PILLAY**

*Yes, the conduct of ...*

**MR SPEAKER**

Ok, me dan sa ka Onorab *Leader* Lopoziyon, mon santi poudir bann remark ki'n ganny fer la, in ganny adrese lo laparol ki'n ganny dir dan sa Lasanble.

Me selman mon a pran ou pwen serye e mon a re pas lo sa *Order* pou mon lenstriksyon e pou gete a lavenir. Mersi.

Ok, nou a termin deba lo Bidze. Minis pou donn son repons demen bomaten. Me avan nou kit lasal mon ti a kontan zis pran en pti pwen ki'n leve. E zis pou nou fini avek e yer pandan lazournen Onorab *Leader* Lopoziyon ti eksprim son dezir pou ganny leklersisman lo 2 size. Enn ti lo *GOP* pou Ste Anne e lot ti lo *FA4JR*.

Lo *FA4JR* nou ti dakor ki akoz Minis i la i kapab koz ek Minis direk e Minis i ava adres sa apre. Lo size *GOP*, mon ti anvoy son kestyon kot Minis Lanplwa e Minis Lanplwa in donn mwan en repons ki mon ti a kontan partaz avek zot. E son repons i lir koumsa.

Mon remersye *Leader* Lopoziyon pou ou kestyon atraver ou Mr Speaker. An vi sityasyon kot manm piblik pe kontakte Minister pou eksprim zot mekontantman, ki zot osi pe fer atraver rezo sosyal e osi vi ki sa topik konsernan travayer etranze ki'n antre dan pei pou vin travay lo zil Ste Anne in leve plizyer fwa dan Lasanble Nasyonal diran sa 2 zour ki'n pase. Mon kontan ganny sa loportinite pou eklersi sa

sityasyon e met lenformasyon kler a laporte piblik.

*Club Med*, nouvo lotel lo Zil Ste Anne, ti apros Departman Lanplwa e antre an diskisyon lo son plan rekritman plis ki 1an pase. Pli prezizeman an Novanm 2019. Lenformasyon ki zot ti donnen sete ki zot bezwen an tou 417 travayer pou zwer lotel ki annan 294 lasanm. A sa pwen lotel ti ganny avize pou komans zot bann demars pou rekrit travay Seselwa an premye lye.

Lotel ti agree pou angaz li dan en kanpany rekritman pou promot son bann pos atraver sa bann mwayen swivan, *Job Fair* ki ti fer le 4 e 5 Mars, 2020. Lavertisman dan lapres ekrire pou 3 zour pandan mwan Mars ek Zen. Atraver platform rekritman *JOBO* pandan mwan Mars, Avril, Me, Zen, Out, Septanm. Atraver *spots* lo *SBC* ek *TeleSesel* an Mars, Avril, Out, Septanm. Atraver *Google* e *Facebook ads*.

Lotel ti osi travay an kolaborasyon avek *SETS*, *Job Plus*, ensi ki Departman Lanplwa, pou vwar si i annan dimoun kalifye ki pe rod en lanplwa pou zot kapab rekrite.

Dan sa enn kanpany rekritman, lotel ti resevwar 602 laplikasyon sorti kot aplikan lo marse lokal. Apre seleksyon,

468 ti ganny kriye pou *interview*, me selman 398 ki ti raporte. Dan sa 398 ki ti ganny *interview*, 227 ti ganny ofer lanplwa. Lotel ti reisi rekrit 176 travayer Seselwa ki ti aksepte lof lanplwa. A sa moman donnen, notaman Seselwa lo nivo *manager* dan domenn tel ki resours imen, lakwizin, zesyon stok, zesyon bann lasanm. Responsab *laundry* e osi responsab Departman Teknik.

Pou note ki i annan departman tel ki zesyon lasanm ek *laundry*, kot bokou Seselwa in ganny rekrite. An Septanm 2020 swit a serten mankman lo marse lanplwa a sa moman donnen, apre ki zot ti'n pas atraver sa kanpany rekritman, lotel ti apros Departman Lanplwa pou rekrit travayer etranze dan 245 pos, pou en dirasyon 1an dan bann domenn tel ki;- finans, lakwizin, *bar*, kot ti annan mankman. E osi lo kote program animasyon vilaz spesyalize ki en nouvo konsepsyon pour Sesel ki sa lotel pe anmennen.

Lotel *Club Med* i annan en *quota* 65poursan ki fer en total 271 travayer etranze. An se moman in anploy 167 Seselwa e 157 travayer etranze.

Biro lanplwa pe kontinyen travay ek sa lotel pou rekrit plis travayer Seselwa. Parmi sa 157

etranz e i konpri 40 Morisyen e bann lezot nasyonalite. An Zanvye 2020 letan ki Departman Lanplwa ti inisye sa nouvo stratezi pou zwenn ek bann biznes pou pibliy bann pos, Departman Lanplwa ti apros sa lotel pou partisipe, afen ki zot a kapab idantifye Seselwa pou bann pozisyon ki ankor ouver.

I enportan fer resorti ki lotel i sipoze ouver milye Mars, e anvi bann langazman finansye ki'n annan lo lapar sa biznes pou ouver son laport a parti sa letan, i pa pou pridan pou Minister revwar sa bann pos ki'n aprouve. I bon note ki a sa moman ki sa bann pos ti ganny aprouve lannen pase. Sityasyon lo mars lanplwa ti diferan ek a ler aktyel.

lotel *Club Med* pe osi vin ek en konsep ki totalman nouvo pou Sesel, kot i bezwen annan en serten kantite etranze pou transfer sa bann *skills* ek nou Seselwa. E ki a zot tour ava kapab partaz zot konesans avek zot koleg Seselwa kan zot vin zwenn lotel.

Sa laprouvasyon lan in ganny donner avek bi prensipal pou ki sa biznes in nobou etablir li e ki apre sa pou donn sans ki plis Seselwa i zwenn sa lorganizasyon.

Dapre konsep lotel *Club Med Ste Anne*, i pa lentansyon sa lotel pou gard sa bann travayer plis ki lan dan pei, me plito ki zot ganny anvoye dan bann lezot bran enternasyonal.

Lotel *Club Med* in reasir Departman Lanplwa ki i reste touzour angaze pou rekrit Seselwa e se pour sa rezon ki sa lotel in partisip ek nou dan sa nouvo stratezi, pou pibliy bann pos konzwentman.

Toultan sa pa konplete, Departman Lanplwa pa pou aprouv okenn lezot laplikasyon pou travayer etranze pour sa lotel. I pou kontinyelman annan en travay konzwent ant Lotel *Club Med* e Departman Lanplwa pandan lannen, pour ki sa bann travayer etranze i ganny ranplase par Seselwa ki kalifye, a sa lenstan, ler zot permi i fini diran sa lannen.

Me i enportan pou dir ki sa lotel i annan en langazman pou ouver apartir milye Mars, e i bezwen travayer pou fer marse son loperasyon. Minister Lanplwa an korperasyon ek bann Lasosyasyon tel ki *SHTA* e *SCCI*, pou kontinyen travay ek bann biznes lo sa nouvo stratezi pou met Seselwa dan lanplwa e Seselwa i ganny ankouraze pou fer laplikasyon ler loportinite i prezante e gard

zot langazman pou raporte pou *interview*. Mersi.’

Mon a demann Madanm Clerk sirkil sa *statement* avek tou bann Manm, akoz i annan bann sif. Pou fer kler, *Leader* Lopozisyon ti demann spesifikman lo bann sif travayer etranze, travayer Seselwa, *management positions* e lezot kategori. Me i a ganny sa bann detay dan sa dokiman. Mersi bokou.

Wi, Onorab Pillay, wi.

### **HON SEBASTIEN PILLAY**

Mersi Mr Speaker. Mersi pou sa larepons ki nou’n gannyen *from* Departman Lanplwa. *Once* ki nou ganny sa bann sif nou a kapab *digest* ankor en pti pe sa bann lenformasyon ki nou pe gannyen. E prezan nou a kapab konnen ki mannyer nou pou antanm lot parti sa size. Se *given* sityasyon pou nou konnen konbyen Seselwa adisyonnèl ki pou kapab reelman ganny plase. Akoz Minis son stratezi Gouvernman pe *rely* lo abilite replas Seselwa o pli vit posib dan lanplwa.

Ou’n mansyonn *FA4JR*, mon pa konnen si ou a permet mwan zis fer en pti komanter *very briefly* lo la. Ki mon ti zwenn avek Minis e mon’n osi zwenn avek Oditer Zeneral *regarding* son Bidze, dan

prezans Vis-Chairman *FPAC*, Onorab Mondon avek Onorab Sandy Arissol e Onorab Churchill Gill.

Mon’n resevwar en dokiman ki *provide* serten reanmenazman Bidze Oditer Zeneral ki nou pou partaz avek Minis *through* ou lofis, pou nou kapab kontinyen. Akoz nou konnen Minister Finans pou pe travay konzwentman avek lofis Oditer Zeneral pou kapab fer en revè lo size *FA4JR* e pou nou konnen kwa ki’n pase.

So, antretan mon ava demann, en kantite Seselwa pe demande, akoz ki nou pa pe fer bann *public hearings*. Ti ava bon nou eksplike ki nou dan en sityasyon en pe difisil pou mwan kapab fer *public hearings*, akoz mon napa sa lespas ki nou bezwen. E mon pe swiv bann gidans ki mon pe gannyen avek Sekretarya Lasanble. Me ki *as soon as possible* ki nou pou kapab komans fer li, nou pou komans fer li.

Me bann *meeting* pou kontinyen pou ki nou kapab konnen ki mannyer nou *deal* avek sa sityasyon. Pa zis *FA4JR*, me lezot size ki’n *come up* dan lezot rapor.

Mon profite pou dir ek Lepep Seselwa ki zot pou vwar ki kontrerman petet a zot

krwayans, zot pou vwar byen vitman ki mon pa vin la pou defann swa protez okenn endividi, swa defann okenn desizyon ki mon konnen i mal ler in ganny pran.

Mon pa dakor avek a desizyon pou donn sa kantite *GOP* en lotel, me sa bann dimoun i bann eksper dan lanplwa, zot konn pli byen ki mwan. E mon pa kapab blanm sa Gouvernman, me mon pe *focus* lo sa desizyon. E pou mwan lenportans se fer sir poudir Seselwa i kapab ganny en travay.

Mon remersi ou bokou Mr Speaker e mon swete ki nou Departman Lanplwa i kapab donn nou lezot lenformasyon *as and when* ki zot gannyen. *Thank you*, Mr Speaker.

### **MR SPEAKER**

Mersi. Mon remye tou Manm e mon a remersi ankor enn fwa Minis ek *PS*. Minis nou a atann ou demen bomaten 9er pou ou repons lo sa *Bill*. Nou ava *adjourn*.

**(ADJOURNMENT)**